

رواية

فكا

١٦+

محمد الباسم

داركتاب للنشر والتوزيع



كتاب

مسئول النشر

طارق رمضان

مدير التوزيع

عمر عبد السميع

مدير العلاقات

مها عادل

الطبعة الأولى

الكتاب : روكا

تأليف : محمد الباسم

تصنيف الكتاب : رواية

مصمم الغلاف : عبد الرحمن سندوبي

إخراج : أحمد عبد الرحمن

المقاس ٢٠ × ١٤

رقم الإيداع : ٢٠٤٠٢ / ٢٠١٨

الترقيم الدولي : 2 - 24 - 6597 - 977 - 978

جميع الحقوق محفوظة

'all rights reserved . no part of this book may be reproduced '
stored in aretrieval system , or transmitted in any from or by any
means without prior permission in writing of the publisher .

ثم جميع الحقوق محفوظة لا يسمح بإعادة إصدار هذا الكتاب
أو أي جزء منه أو تخزينه في نطاق استعادة المعلومات أو نقله
بأي شكل من الأشكال ، دون إذن خطي مسبق من الناشر .

العنوان : ٧٤ تقاطع الفلكي مع محمد محمود - القاهرة - مصر

التليفون : ٠١٠٩٧٥٥٣٣٢٨

Email: darkitabone@gmail.com

إهداء

إلى أبطال روايتي الحقيقيين.. إليكم أنتم
إلى أولئك الذين سمعوا لي أن أقتبس من
تجاربهم أحداثاً..



شبه مقدمة

بسم الله الرحمن الرحيم

لا تتعجب إن وجدت نفسك أحد أبطال هذه الرواية، أو حتى رأيت حدثًا من حياتك يتكرر بين سطورها.

لم أقصد التقليل من شأن أحدٍ، أو شيطنة فريق على حساب آخر، فكلنا بشر لا نتصف بالملائكية ولا العصمة، وجميعنا يتعلم من أخطائه وأخطاء غيره.

حاولتُ توصيل الصورة كما هي بأسلوب يحترم حياء القارئ، وأعتذر لكم إن كان هناك أمرٌ قد حاد عن هذه الطريق...



مرّ أربعة عشرَ عامًا على زواجهما، وقد تغيّرت الأحوالُ
كثيرًا عن ذي قبل، أخرج «ألبوم» الصور من مكتبه،
وصار يقلّبها ويستعيد معها الذكريات حتى وصل إلى
صورة حفل الزفاف؛ تجمعت عبراته في مُقلتيه، وأحداث
ذاك اليوم تظهر أمامه وكأنها كانت أمس.

دخلت ابنته ذات الثلاثة عشرَ عامًا تتسلل إلى غرفة
مكتبه، وتُبسّط ذراعيها من سعادتها بعد حصولها على
المركز الأول في مسابقة ثقافية نظمتها المدرسة، حاولتْ
لفت انتباهه بحركتها، لكنه سارح في حفل زفافه.

اقتربت منه ووضعت شهادة التقدير التي كانت تُمسك
بها على المكتب؛ تحولت تعبيرات وجهها بمجرد وقوع
عينها على صورة تجمعه بـ زوجة أخرى في حفل زفاف!

- «بابا! مين دي؟! حضرتك متجوز على ماما؟!»

انتبه إليها وجفّف تلك القطرات التي تسللت على
وجنتيه، ورفع رأسه نحوها وهو يتسمم ابتسامة مصطنعة،
وأشار بسبّابته، وأجابها بصوت خفيض:



- هوووس.. هفهمك كل حاجة بس من غير ما ماما
تعرف، اتفقنا؟!!

- اتفقنا.. بس تقول لي كل حاجة بالتفصيل.

- ماشي.. بُصِّي يا حبيتي...



الفصل الأول

من عربة قطار «مترو» الأنفاق المنتظر في محطة جامعة القاهرة، ووسط زحام شديد نزلت فتاة سمراء البشرة سوداء العينين، متوسطة الطول ترتدي ثوباً فضفاضاً، وحجاباً طويلاً يصل إلى المرفقين، وترسم على وجهها ابتسامةً تعبر عن فرحة وصولها إلى ما طال انتظاره، وسهرت الليالي من أجله.

وخطت الخطوة الأولى في حرم الجامعة وكأنها يمامة ترفرف في جو السماء، تترشق المباني واللافتات بحثاً عن كليتها حتى اصطدمت بإحدى الشجيرات؛ انتشلت الصدمة تركيزها، كأنها استيقظت من حلم جميل، وصارت تتساءل متعجبة: هي فين كلية الآداب؟!

أوقفت فتاةً أطول منها ببضعة سنتيمترات، وعلى عينيها العسليتين نظارة تقيهما من أشعة الشمس، وطرحه قصيرة تغطي شعرها، وسألتها: من فضلك فين كلية الآداب؟



بادلتهـا تلك الفتاة الابتسامة، وأجابتهـا ضاحكةً: شكرك
كده فرقة أولى!

- آه، بالظبط، وحضرتك؟

- حضرتي؟ حضرتي طالبة في نفس الكلية، يللا بينا
بقى؛ عشان مشوارنا طويل، لآآخر الجامعة!.. علا
الصوت بالضحكات، وانطلقتا تتعرفان:

- اسم حضرتك إيه؟

- من أولها كده حضرتك، لآ أنت تنسي حضرتك
دي خالص، أنا لسه فرقة أولى زيـك.. أنا يا ستي اسمي
هايدي، وأنت؟

- عاشت الأسامي، اسمي رقية.

- فرصة سعيدة يا روءة.

اتسعت ابتسامة رقية وهي تردد: روءة! حلو روءة..
بس ممكن تقوليلي يا «رُقِيَّة»؛ علشان بحبه كده؟!

- ممكن طبعًا، وسوري لو ضايقتك.

- لآ، ولا يهـمك.. بس إزاي فرقة أولى وأول مرة تدخل
الجامعة وعارفة الطريق؟! أجابتهـا بسخرية من نفسها: لآ
يا حبييتي أنا بـعيد السنة!



- الله أكبر، ربنا يبشرك بالخير.

ومن باب الجامعة الرئيس دخل ذاك الشاب الوسيم، ذو البشرة الخمرية المائلة إلى البياض، يحمل على ظهره حقيبة ويتصبب عرقاً من شدة حرارة ذاك اليوم، ولكن لا يشغل عقله سوى قضاء هذه المرحلة، وكيف سيصل إلى حُلُمِهِ الذي ظنَّ أنه بدأ منذ خطوته الأولى إلى كليته.

دخل مدرجه في قسم التاريخ بكلية الآداب حيث بدأت المحاضرة الأولى، ورحب الدكتور بالطلاب الجدد، وبدأ يُعرِّف نفسه لهم، ويحدثهم عن تاريخ هذه الكلية العريقة، ومراحل تطورها، وهو ينظر إليه محدقاً، ويتخيل نفسه جالساً مكانه، ولا يهتم لما يقول حتى انتهت المحاضرة، ولا يزال سارحاً، وفجأةً فُزع بقول زميله:

- صباح الخير يا شبح، أنت بتحب وللا إيه يا عم؟
المحاضرة خلصت.

- ها؟!.. لا، ما فيش سرحت بس.

- قشطة.. ولا يهملك، اسمي علاء عماد، وأنت؟

- خالد مصطفى.. تشر فنا.

- ما تيجي نلف شوية في الجامعة.



- لا يا عم أنا عاوز أحضر المحاضرات كلها.
- يا أبا محاضرات إيه؟ ده أول يوم وكل واحد هيدخل
يهري في المهري وخلاص.
- لا روح أنت.. أنا هحضر
- قشطة يا معلم.. سلام

وفي مبنى كلية الآداب الرئيس، في قسم اللغة العربية
بالطابق الثاني تجلس رقية بين زميلتين، وبجوارهن يجلس
شaban، ومنذ دخولها قاعة المحاضرة وهي تتأفف مستنكرةً
جلوس البنات والشباب في مقاعد مشتركة.

وبدأ الدكتور حديثه عن مادته، وعرض مُقرَّرها على
لوحة العارض الضوئي، وفي نهاية المحاضرة أعلن عن
ندوة سيحاضر فيها بعد يومين للحديث عن اللغة العربية،
وكيفية الحفاظ عليها، ولكن ستكون في كلية دار العلوم..
تساءلت رقية مندهشة: دار علوم؟! مش دي كلية كيميا
وفيزيا؟!.. إيه دخلها في اللغة العربية؟!

بعد يومين.. بدأت الندوة في دار العلوم تحت عنوان
«لُعُنَّا عالمية»، وجاءت رقية وهايدي متأخرتين، وبمجرد

دخول القاعة؛ ابتسمت رقية ابتسامةً عريضةً ممترجة بتأوّه،
وصاحت في سرور: الله! الحقّي يا هايدي ده الشباب في حتة
والبنات في حتة، الله! الله!

- ده يمكن بس عشان دي ندوة، وبعدين فيها إيه يعني
لما يقعدوا جنب بعض؟ هياكلونا يعني يا رقية؟!
- ها!، لأ ما فيش.

تحدث المحاضرون عن كلية دار العلوم أثناء الندوة،
وما تدرسه من مواد شرعية ولُغوية؛ ما زاد حُبَّ رقية
للغة العربية، وتعمدت أن تتجول داخل الدار كي تعرف
عنها أكثر.. دخلت أول مدرج أمامها وحضرت محاضرة.

كان المدرج مزدحمًا جدًّا، والطلاب يقف بعضهم بجوار
المنصة، وبعض آخر يجلس على حافتها، ألقت نظرةً؛
وانشرح صدرها عندما رأت الشباب يُخصص لهم مقاعد،
وكذلك الطالبات هن مقاعدهن، وجهت نظرها نحو
الدكتور؛ وإذ بعينها تقع على شخصٍ آخر.

رجعت إلى بيتها وتغمرها سعادة عارمة لما حدث في
مدرج كلية دار العلوم، لكنها أخفت هذا، وطرحته جانبًا،
واستعادت حديث محاضري الندوة عن تلك الكلية التي
تدرس اللغة والدين في الوقت نفسه، وسَمَّتها الهادئ الذي

أراحها نفسياً، وقررت أن تفتح والدتها وأخاها في التحويل
من كلية الآداب.

وجدت الجو مُهيئاً ومناسباً للمناقشة على مائدة العشاء،
فأخرجت والدتها وأخاها من صمتهما:

- ماما.. حودا!

- نعم يا ماما؟

- نعمين.

- حصل حاجة كده النهارده في الجامعة، وكنت عاوزه
أخذ رأيكم في قرار.

- خير.. حصل إيه؟

- وقرار إيه ده اللي هتاخديه؟

قصّت عليهما ما حدث في ندوة اللغة العربية، وأعربت
عن ارتياحها للكلية، وأضافت ويدق قلبها قلقاً: ده اللي
حصل، أما القرار بقى...

- إيه؟

- انطقي

- القرار إني عايزة أحول من آداب لغة عربية لدار العلوم!

وعلى غير العادة صمت الجميع برهةً زادت من قلقها، وأردفت هناء فجأةً: بصي يا حبيتي أنتِ مابقيتيش صغيرة، وما شاء الله عارفة أنت عايزة إيه، اعملي الي شايفاه في مصلحتك، لكن... (قاطعتها)

- لكن إيه؟!

- لازم تستخيري ربنا الأول، وربنا هيوفقك لي فيه الخير.

- عندك حقك يا ماما.. إن شاء الله هصلي الاستخارة قبل ما أنام.

استخارت ربها وبعد بضعة أيام، كانت قد انتهت من ترتيب حقيبتها، وعزمت الانطلاق إلى الجامعة، وجلست على طاولة الإفطار تلتقط لُقيَمات حتى لا تتأخر؛ انتشلت هناء تركيزها وسألتها عن نتيجة الاستخارة:

- ما قولتيش يعني يا رقية.. نتيجة الاستخارة إيه؟

أجابت رقية مندهشةً: سبحان الله! كنت لسه حالاً هقول أهو، قرأتي أفكارى وللا إيه يا أمي؟!

- قلب الأم بقى .. ها؟ قولي.
 - بُصِّي .. أنا كل يوم أعدي عليها الصبح، وبصراحة
 حاسة بارتياح شديد، وكل يوم بيزيد.
 - على بركة الله، دي بشارة من ربنا .. ربنا يوفقك يا
 روح قلبي وأشوفك أم زي العسل.
 - ربنا يكتب لك الخير حيث كان، وأنا تحت أمرك يا
 ستي في التحويل، عقبال أمّا أحول لك لبيت عريسك.
 انتفضت من جملة محمود، وتغمغت بالكلام: عريسي؟!..
 لأ عريس مين لسه بدري أوي .. الحمد لله شبع، تسلم
 إيدك يا ماما .. وخرجت مسرعة، وسرحت من جديد فيما
 حدث هناك.

في ساحة كلية الآداب بين مبنى الكلية الرئيس ومبنى
 اللغات وقسم التاريخ يجلس خالد تحت إحدى المظلات
 المقابلة للمكتبة المركزية التراثية، ويده كتاب مقرر تاريخ
 ما قبل الإسلام، وإذ فجأة يجد أمامه هايدي.
 - صباح الخير .. ردّ بخجل مُغمغماً: ها!.. صا!! صباح
 الخير.

- أنتَ معنا في أولى تاريخ صح؟

- أيوا.

- طب ممكن أصور منك المحاضرة؟ أو لو معاك تسجيل صوتي يا ريت.. أردف بلهجة قاهرية يغلب عليها الريفية: أيوا طبعًا، مش في مشكلة.. اتفضلي.

تركته وحيدًا وذهبت كي تنسخ المحاضرة، وهو جالس يحدث نفسه:

- أنا إيه خالّاني سمعت الكلام واديتها الكشكول؟ دلوقتي ما هتصدق، وكل شوية تيجي تتكلم معايا، وأنا مش عاوز أدخل السكة دي.. بس أنا برضو ما غلطتش أنا ساعدتها وخلاص، وبعدين ما أنا واثق في نفسي.

وعادت بعد قليل، وبابتسامة خفيفة، وبكل احترام:

- متشكرة جدًا، يا ... اسمك إيه؟

- خالد.

- متشكرة جدًا يا خالد، أنا هايدي، فرصة سعيدة

- الشكر لله، ولا يهملك.. وعاد يقرأ في الكتاب.

في بهو^(١) دار العلوم تقف رقية وكأنها دخلت الجنة من فرحتها، ترمق معالم الكلية، وتدعو الله أن يُعَجِّل إجراءات التحويل، وتذكرت ذاك الشاب صاحب اللحية القصيرة، والابتسامة الصافية الذي دخل متأخراً يومَ حضرت أول مرة، وظلّ واقفاً طوال المحاضرة بجوار منصة الدكتور، ومن جديد ظهر أمامها بطلته البهية وهو يسبح بمسبحته الإلكترونية الزرقاء؛ نظرت في الأرض وانصرفت قبل أن يلحظ السعادة التي لا تمتلك إخفاءها أمامه.

دخلت مدرج «أبو حنيفة» رقم «٤»، وكعادة الشهر الأول كان المدرج مُكْتَظًّا بالطلاب، لم تجد مكاناً للجلوس، وقررت الخروج، وأثناء التفاتها للخروج سمعت صوتاً من بين المقاعد ينادي:

- تعالي.. تعالي هنا يا أم أخضر.

عادت وألقت التحية أثناء الجلوس بجوار تلك الزميلة المتبسمة: شكرًا يا حبيبتني، أنا رقية محمد، وأنتِ؟

- حسناء محمد، يعني أخوات، تشرفت بيك.

- الشرف لي يا جميلة.

١ - المكان الواسع المخصص لاستقبال الضيوف، والمقصود هنا مدخل الكلية الرئيس

دخل الشاب نفسه المدرج أثناء تعارفهما؛ فاحمر وجهها وصمتت، ولكن الصمت المفاجئ هذا لم يكن ممزوجاً ببهجة رؤيته كما سبق، بل كان تفكيراً في هذا الشعور، هل هو حلال أم حرام؟ وإن كان حلالاً فيجب أن ينتهي بالزواج، ولكن يجب أن يعرف هو أيضاً شعورها، ويبادلها إياه!

بدأت علاقة صداقة قوية بين رقية وحسنا منذ هذا اليوم، ومن قوة تلك العلاقة كانت زميلاتهن يعتقدن أنهما أختان حقاً؛ لأن الاسم وحده لم يكن الشيء المشترك الوحيد بينهما، بل إن السمّ وطريقة الكلام والثياب مشتركون بينهما أيضاً.

ظلت رقية تنتقل بين كلية الآداب، ودار العلوم إلى أن قُبلت أوراق تحويلها إلى دار العلوم، وأثناء تلك الفترة طالما قابلت هايدي وتكونت صداقة بينهما أيضاً، ولكن لم تكن بقوة العلاقة التي تجمعها بحسنا ذات الملبس الفضفاض والحجاب الطويل، والفكر المشترك بينهما، الذي لا بد أن يكون دافعاً لتفضيلها على هايدي التي ترتدي «البناطيل» وإن لم تكن محددة لجسدها، ولا مشكلة لديها من مصادقة الزملاء ما لم يكن هناك تعدد لحدود الاحترام.

انتصف الفصل الدراسي الأول، وظهرت ملامح التغيير على خالد الطالب الريفي الذي كان يُعَاتِب نفسه إذا تحدث مع فتاة، ويخجل ويتلعثم لسانه إذا رَدَّ على سؤال إحداهن؛ أصبح يتحدث معهن بلسانٍ لَبِيقٍ، ويتبادل الأرقام والحسابات دون حرج.

وذاك علاء يجلس مُحدِّقًا في كل سائرة أمامه، الجميلة وغير الجميلة، فهو لا يهتم الجمال أو عدمه، إنما يهتم بأمور أخرى! وانتشله خالد من تركيزه بضربة على ساقه مُداعِبًا:

- ارحم ركبك يا ابني.. نشفت!

- يا عم ارحمنا أنت بمبادئك، خرينا نستمع بشابنا..
نخرب بيت جمال أهلك - قاطعه مداعبًا لإحداهن.

ضربه خالد على كتفه مازحًا: عيّل شمال.. ربنا ياخذك.. أتت هايدي خفيفة الظل، طفولية الشاعر أثناء حديثهما:

- صباح الخير.. إزيك يا كابتشن منك له؟ أجابها علاء:

- أحسن منك أكيد.

- الحمد لله تمام، أنتِ إزيك؟

- الحمد لله زي الفل.. كتاب دكتور عبدالعظيم نزل؟
- لأ، طلع.
- أبو أم خفة دمك منك له، المهم يا ظريف منك له، طالعين الرحلة وللا إيه؟
- أنت طالعة؟
- مش عارفة لسه، هفكر.. أنت طالع يا خالد؟
- آه هطلع إن شاء الله.. أهى حاجة تغير جو المدينة والمذاكرة.
- خلاص قشطة أنا كمان جاية.
- آآآآآآه.. طآآآآآيب
- جاي يا علاء؟
- شور يا برو.. هي إمتى صح؟
- الخميس الجاي.
- ولمحت هايدي رقية آتية من بعيد:
- طب قشطة.. نتقابل في الرحلة بقى، ماحدش يتأخر
- سلام يا خالد..

- وأنا شفاف يعني؟

- سلام يا خفيف

رقية.. رقية

- هايدي.. حبيتي كنت بدور عليك حالاً:

- بتعملي إيه هنا يا بت يا درعية أنت؟

- جاية أشوفك وأعرفك على أختي.. وجهت هايدي
نظرتها إلى حسناء التي انشغلت عنها برقية:

- أسفة يا قمر ماخدتش بالي.

- شبهك فعلاً يا رقية.. أنتِ معانا في الجامعة؟

- أيوا مع الدرعية دي في الفرقة نفسها.

تساءلت هايدي متعجبة: في نفس الفرقة إزاي؟! اوعوا
تكونوا توأم!

- حسناء محمد، ورقية محمد

- بجد؟!

- أنتِ صدقتي وللا إيه؟ صاحبتني بس أكثر من أخت
طبعاً .

- آآآآآآآآآآآآ آلي خدتك مني.. ماشي يا ستي ربنا يخليكو
لبعض.. ماتيجوا معانا الرحلة.

- رحلة إيه؟! فين؟! مع مين؟

- مع الواد العسل الي هناك ده

- واد؟!.. لأ من أولها كده لأ

- ما تيجي أعرفكم عليه.. احمرّ وجه حسناء غضباً
وهبت في وجهها:

- لأ طبعاً.. إحنا مش بنكلم شباب.. عن إذك يا رقية
الظهر هياذن! وانصرفت وحدها.

- معلش يا هدهد حقك عليّ هي ما تقصدش معلش.

- إيه التشدد ده؟ ده مافيش ذوق خالص.

- معلش يا حبيتي، عن إذك علشان ألحق أصلي أنا
كمان.

- سلام يا روحي.. هستناك نروح سواها؟.. وما
تجيبش البتاعة دي معاك.

- تماموز.. سلام عليكم... أسرع لتلحق بحسنا.



وفي طريق المسجد، عاتبته:

- ليه كده بس يا حسناء؟ .. أخرجتها!

- يا شيخة اتقي الله أنتِ كمان، أنتِ إزاي أصلاً تصاحبي
واحدة بتتكلم مع ولاد، ومقضيها كده؟ .. أستغفر الله
العظيم، دي كمان مُدنية وعاوزانا نشاركها الذنب.

- حرام عليكِ، ده بالعكس هايدي محترمة جدًّا، وقلبها
أبيض، وبتعامل بنية صافية.

- يعني أنتِ كمان بتبرّري لها بدل ما تنصحيها؟

- لأ، مش تبرير ولا حاجة، بس النصيحة بتكون بشكل
كويس، مش نكشر في وشها ونجري، وبعدين مش مرة
واحدة كده، الموضوع هيجي بالتدريج.

- بالتدريج آه، لما واحد يضحك عليها وتتكسر عينها
يبقى هينفع التدريج بتاعك ده.

- ما علينا.. أنتِ ادعي لها وربنا يسترنا جميعًا، والحمد
لله الذي هدانا وعافانا.. يللا يا أختي مدي الصلاة
هتفوتنا، وبطلي نمّ.

- لأ، مش هينفع أصلي أصلاً.

- اعممممم.. طيب يا أختي بس بدل ما تدوري على عيوب الناس صلحي نفسك الأول وماتكذبيش.. وقالت مداعبةً إياها:

- اترزعي بعيد كده لحد ما أخلص صلاة وأرجع لك.

- ماشي.. وابقى ادعيها يمكن ربنا يهديها.

وفي صلاتها تذكرت ذلك الشاب من جديد بعدما قررت أن تصرف النظر عنه ولا تفكر فيه حتى لا يكون ذنبًا وتعاقب عليه، ودعت الله في سجودها:

- يا رب إن كان هذا الشعور حلالًا ولا يغضبك؛ فألهمني الصواب ويسر لي الحال، وإن كان شرًّا ويغضبك؛ فابعده يارب عن تفكيري، وسخر كل الوسائل للبعد عنه.

وبالخارج حسناء جالسة تفكر فيما حدث، وتتساءل:

- يا ترى أنا كده غلطانة على اللي عملته مع هايدي ده؟ طب بس إزاي أشوف معصية قدامي وأسكت؟! طب ما كده هسيء لصوره الملتزمات، وممكن أكون سبب إنها تعند في المعصية! يا الله.. ده أنا كده هشيل ذنبها.. أستغفرك ربي وأتوب إليك.. أنا لازم أعتذر لها وأفهمها موقفني، وكمان عشان ما أزعلش أختي رقية.

واستقبلت رقية بوجه مبتهج:

- معاكِ رقم صاحبتك الي في آداب دي؟

- وأنت هتعملي إيه برقمها؟.. اوعي تكوني عاوزه
تتصلي تصحيحها بأسلوبك الي يطفش ده تاني.

- لأ، هعتذر لها والله.

استعجبت رقية من حالها المتغير: سبحان مُغَيِّر الأحوال،
ده أنتِ كنتِ هتقيمي عليها الحد من شوية!

- خلاص بقى.. هاتي الرقم، وبعدين ما أنتِ عارفة
إننا في الأيام دي مش بنبقى طايقين حاجة.

- لأ، تعالي نروح نعتذر لها وجهًا لوجه أفضل.

- ماشي.. يللا..

الجميع يُخطئ ويصيب، وعلينا التنبيه والنصح، لا التوبيخ
والتعنيف؛ فكم من مخطئ عاند وفَجَّر بسبب أسلوب الكلمة.

محمد الباسم

الفصل الثاني

أثار الموقف غيظاً هايدي، وأصرّت العناد حتى وإن كان حراماً ستفعله نكايّةً في تلك المتشددة؛ وعادت لتجلس مع خالد وعلاء.. وصلت حسناء ورقية إلى كلية الآداب للاعتذار، تظاهرت هايدي بعدم رؤيتهما، وظلّت تمازح علاء غيظاً.

- بصي يا رقية بتعمل إيه؟!.. بالله عليكِ نعتذر لها إزاي دي؟

- ما أنتِ لو نصحتي بشكل كويس ما كانتش هتعمل كده!

- أنا هرجع مش هعتذر لحد، ضميري مش هيرخي لي لو اعتذرت.

- تعالي بس اعملي الي عليك وخلاص.. أشارت رقية
من بعيد لها كي تأتي؛ تحركت نحوهما وهي تتأفف، ولا
تنظر جهة حسناء.

- خلاص بقى يا هايدي حقك عليّ ما كنتش أقصد
أزعلك.

- والله كل واحد حر في نفسه، مش ربنا أنتِ الي
هتحاسبيني!

- أستغفر الله العظيم (قالتها حسناء في نفسها) واستمرت
على ابتسامتها، وأردفت:

- خيركم من بدأ بالصُّلح بقى يا هايدي، وأنا متأسفة
تاني، سأمحيني بقى وخليّ قلبك أبيض، يرضيك يعني أموت
وأنتِ مش راضية عني يا دودو؟!.. انشرح صدر هايدي
وانطفأت ثورة غضبها، وعقبت وهي تقترب منها لتعانقها:

- بعد الشر عليكِ يا حبيبتى، ولا يهملك بس بالراحة
عليّ شوية.

- الله.. الله، ده أنا أجيب لكم اتنين لمون وشجرة بقى،
أنا هنفسن كده.

- أنت في القلب هنا يا روق روق...

حوالي الساعة التاسعة مساءً ليلة الخميس (الأربعاء ليلاً) يجلس علاء مع صديق له يعمل بمركز لإصلاح أجهزة الهواتف المحمولة، ودخلت فتاة عشرينية لتصلح عطل في هاتفها:

- سلام عليكم.

- وعليكم السلام ورحمة الله وبركاته.

- لو سمحت التليفون ده يفصل لوحده حتى لو مشحون على آخره، وزارر الباور يعلق.

- تمام.. بس هتيجي تاخديه بكرة؛ عشان معايا شغل ومش هلهق أخلصه دلوقتي.

- طب بس بالله عليك تخلصه ضروري؛ عشان كل شغلي عليه.

- إن شاء الله.

ومنذ دخول تلك الفتاة حتى خروجها لم تتركها عين علاء، ودققت في كل تفاصيلها، وبعدما انصرفت التفت يميناً ويساراً، ثم همس في أذن صاحبه:



- بقولك إيه يا أسطى، في مصلحة!
- مصلحة إيه؟
- التليفون ده هنعمل منه مصلحة جامدة.
- أنت عبيط يا علاء؟ دي مديا هوني في إيدي والكاميرات مصورة كل حركة!
- هو حد قال إننا هنسرقه؟
- أو مال مصلحة إيه بس؟!
- إحنا هناخد الصور من التليفون ونفبركها، ونساومها مقابل مبلغ، وده «آي فون»؛ يعني شكلها مريشة.
- لأ يا عم حرام، إحنا عندنا إخوات بنات.
- يا أسطى مش هننذيه، ده كلام بس عشان نعمل مصلحة وخلص.
- يا ابني عندنا بنات، وداين تدان.
- يا ابني ماتخافش، إحنا هنستفاد إيه لو أذيناها؟..
- هي المصلحة تخلص وكأن مافيش حاجة حصلت.
- أمين.. بس فيفتي فيفتي.



- يخرييتك عاوزين نعيدي كفاية «الفريندزون» عندك
اتملت.

- عادي يا «ماري» أدينا بنتسلي، يعني يبقى الجمال ده
كله وما أستمتعش بشبابي؟!!

فزعها علاء بصوته الغليظ ضاربًا على رأسها بيده:

- قومي فزي أكوي لي الهدوم دي عشان ألبسها بكرة،
وبطلي لعب على التلفون.

- طب مش هعمل لك حاجة.. اكو لنفسك.. هو أنت
تخرج وتعط وأنا أكويلك؟

- وأنت لازمك إيه لِمَا أكوي أنا؟

- مش بعرف أكوي، وديها للمكوجي!.. دخلت عفاف
عندما علا صوتهما بالشجار:

- بسسس.. أنا هكويهم لك يا قلبي، روح أنت بس
احلق وظبط كده وسبيك من البت دي، وعط براحتك..
ثم وجهت نظرها نحو علا ساخرة:

- وأنت خليك مرزّية على التلفون كده، ابقني قابليني
لو دخلتي حتى معهد يا فاشلة.

- هفلح وهتشوفوا، بس برضو ما خليت هوش يمشي كلامه عليّ.

كانت الشمس تودع النهار، ويغيب الضوء رويداً رويداً، وفي ذلك الجو الذي ترتاح له الأنفس بمجرد النظر إليه والتأمل في حركته، كان هؤلاء الطلاب يعقدون حلقةً أمام مياه بحيرة «قارون» والشمس تُعانق مياه البحيرة عناقٍ وداعٍ، وبالمنتصف قارورة بلاستيكية تحدد سائلاً ومسؤولاً، ولأُسمح لأحدٍ أن يرفض إجابة السؤال الموجه إليه مهما يكن.

وبلفة عفوية من هايدي؛ قررت القارورة أن يُسأل «خالد» من «علاء»، وبدا سؤاله عجيباً؛ لأنه بالرغم من كونه سؤالاً مألوفاً إلا أنه كان غير متوقعٍ من علاء.

- خالد.. البنت اللي هتتجوزها.. إيه مواصفاتها اللي في دماغك؟! وفي اللحظة نفسها كانت هايدي ترقب إجابته ترقبَ نتيجة الامتحان.

أجابه «خالد» ناظراً لأعلى، وعقله ينظم الحروف والكلمات قائلاً: والله.. زي أي شاب يعني، تكون بنت ناس، محترمة، في سني مثلاً أو أصغر، أو لو أكبر مش مشكلة!.. ضحك الحاضرون لقوله، لكن «هايدي» كانت

تتخيل نفسها في كل صفة يقولها، وتخيّلت نفسها بجانبه في ليلة الزفاف، إلى أن قطع ذلك التفكير بقوله:

- أمّا الشيء الخاص أوي بقي، والأهم من ده كله: إنها تكون ملتزمة!

- هاهاهاااي.. ابقّ قابلني لو لقيت حاجة من دي الأيام دي، قال ملتزمة قال، وتعالّت الضحكات.

انتهى اليوم وفي طريق العودة كانت هايدي مشغولة البال بخالد وكلامه، وكيف تُحقّق له تلك الموصفات؛ ووجدت أن الحل الوحيد أن تقترب أكثر من رقية، وتقلدها في كل شيء كي تبدو تلك الفتاة التي يتمناها، وعلى الفور أمسكت هاتفها، واتصلت برقية:

- سلام عليكم.. إزيك يا روق روق؟

- وعليكم السلام ورحمة الله، ده من إمتى ده وأنت بتقولي سلام عليكم في التليفون مش ألو؟

- أومال لما تعرفي أنا متصلة بيك ليه هتعملي إيه؟

- خير! في إيه؟

- ما تتخضيش خير إن شاء الله، بصي يا ستي، أنا عايزة أختمر زيك.

- الله.. بجد يا هدهد؟.. ما شاء الله، ما شاء الله، ربنا
يثبتك يا قلبي، وأول خمار يا ستي هدية مني ليك.
- حبيتي تسلمي، أشوفك السبت بقى إن شاء الله في
الجامعة.

- لأ، الحد بقى عشان ما عنديش سبت.

- آه صحيح.. خلاص أوكيه.

فرحت رقية فرحاً شديداً، وشكرت الله على سرعة
استجابة دعواتها بهداية هايدي، اللهم لك الحمد.. اللهم
لك الحمد.

اقترب موعد امتحان الفصل الأول ورقية تحاول أن
تُنجز موادها التي تزيد مُعاناتها كل يوم، لا يتبقى إلا
القليل، وعشرات الأبيات الشعرية لابد أن تُحفظ، إلى
جانب المواد الأخرى، وهي تحاول بأقصى ما تستطيع أن
تُخلي تفكيرها من زميلها ذاك، وكيف وهي تراه كل يوم
تقريباً، وكل مرة تتألم أكثر؛ فقررت أن تقتسم هذا القلق
مع صديقتها حسناء:

- بقولك إيه يا حسناء.

- نعم.. قولي يا ستي.

- بما إنك صاحبتني، وأكثر من أختي كمان، وتقريباً شبه بعض في كل حاجة.

- اممممم.

- كان في موضوع كده شاغلني من ساعة ما دخلت الدار، ومش عارفة أشيله من دماغي.

- قولي يا حبيبتني.. وأنا كُلي لك آذان صاغية.. لأ مُصغية زي ما الدكتور قال.

- مش هتبطلي شغل صحح لي شكراً ده الي جاب لنا شلل؟

- يا ستي سيبك من شغلي دلوقتي، قولي بس سامعاك أهو، وهكتم خالص ومش هعدل لك حاجة.

- طيب.. بصي يا ستي، بصراحة كده هو أنا مش عارفة ده صح وللا غلط، وللا ينفع أقوله وللا لأ، وكمان خايفة يكون حرام وأشيل ذنب وأنا مش واخدة بالي.

- اممممم.. قولي بقي.

- عارفة أنتِ الواد الي دايماً قاعد في المقعد الأول
وبيتناقش مع كل الدكاترة في كل محاضرة ده؟
- آه.. أبو نضارة ومسيحة زرقا.. أحمد زغلول.
- وأنتِ عرفتِ اسمه منين؟! .. قالتها بعصيةٍ وتعجب.
- من الفيس، ده ٢٤ ساعة بينشر في جروب الدفعة.
- فيس؟!
- المهم ماله يعني؟
- صراحةً كده يا حسناء.. بس ده سر بالله عليكِ ما
حد يعرف.
- سرّك في بير يا ستي ما تخافيش.. ما له بقي؟
- بصراحة من أول ما شوفته وأنا حاسّة بإنجذاب له وفي
بالي على طول! ومش عارفة أخلص من الشعور ده إزاي.
- أستغفر الله العظيم.. إيه يا بنتي ده حرام كده؟
- حرام إيه بس ده مجرد شعور، وبعدين ده غضب
عني، يعني حاجة ربّانية.
- بصي يا رقية، الشيطان بيدخل لكل واحد فينا
بطريقة مناسبة لطريقة تفكيره، وأنتِ ما شاء الله ملتزمة،

وأكيد مش هتتجوزي غير واحد زيك ملتزم وعلى خُلق؛
فأول ما ده جَه في وشك الشيطان علقه في دماغك وكل
شوية يوسوس لك ويشغلك به عن الطاعة.

- آه والله عندك حق، ده حتى في الصلاة مش سايبني.

- أهو.. عشان تعرفي إنه أمر شيطاني مش رباني.

- طب أعمل إيه طيب وأنا كل ما أحاول أشيله من
دماغي أشوفه في وشي؟.. أنا والله تعبت ومش عارفة أركز
في المذاكرة، والامتحانات قربت!

- بصي.. أنتِ غُصِّي بصرك، ما تبُصِّيش ناحية مقاعد
الشباب خالص، وادعي ربنا يبعد عنك الوسوس دي،
واشغلي نفسك بالذكر أحسن.

- تمام.. الله يكرمك، ولو شوفتيني بصيت ناحية الولاد
ابقي عاقبيني.. ماشي؟

- ماشي.. وغمرهما الصمت قليلاً، ثم استأنفت الحديث
فجأةً:

- صحيح هو الفيس ده بيتعمل إزاي؟

- إيه يا ماما فزعتيني، قولي إحم وللا حاجة!

- معلى ما أقصدش أنتِ اللي بتتخلى من أقل حاجة.. المهم بيتعمل إزاي؟
- وأنت هتعملي بيه إيه؟
- عادي يعني هتابع لو في حاجة مهمة وللا حاجة على الجروبات.
- ماشي يا أختي أبقي أعرفك.

اقترب الفجر والجميع نيام، وفي ذاك الركن المظلم في غرفتها تسجد رقية سجدتها الأخيرة في قيامها، أطالت السجود إلى درجة يُظن أنها قد ماتت! وظلَّت تُناجي الله وتدعوه دعاءً مُلحاً.

- يا رب سترتني وحفظتني من سوء، وأنعمت عليّ بصديقة زي حياء تعينني على طاعتك؛ يا رب احفظها وإياي وهايدي، وجميع بنات المسلمين، يا رب وفقنا جميعاً في الدراسة، يا رب ثبت أختي هايدي، واحفظها من الفتن، يا رب كُتبت لي كلية فيها الدين واللغة؛ فيارب وفقني وفقهني في الدين، اللهم أعني على ذكرك وشكرك وحسن عبادتك.



يارب لا تُعلّق قلوبنا بغيرك، وقربنا إليك، وتقبل منّا
الطاعة، واغفر لنا الزلات والمعاصي، يارب يسّر لأخي
محمود الحال واجزه عنا الجنة، يارب أنت وحدك تعلم
هو تعب إزاي علشاننا، وبفضلك يا ربي كان سبباً في عودتي
إليك.. يارب احم أمي واشفها من مرضها وأطل لنا في
عمرها وبارك فيها، ويارب طمّنّا على بابا لولسّه عايش،
ويسر لنا وسيلة الوصول إليه يارب.. يارب لو كان أحمد
ده من نصيبي فيسرّ لنا الزواج، وضع في قلبه حبي، وإن كان
من نصيب غيري؛ فيارب انزع حُبّه من قلبي، ولا تعلقني
به... وفاضت عيناها دمعا، ورُطّب لسانها بالاستغفار،
وشعرت بارتياح شديد عَقِب تسليمها، فتنهدت بفرحة،
وإذ الفجر يُأذّن له.

انتقلت إلى غرفة أخيها كي تُوقّظَه للصلاة، أطالت
الطّرق على باب الغرفة، لكنه لم يرد! فتحت الغرفة ولم
تجده بها، زاد القلق وأضحت في حيرة من أمرها، هل
تصمت حتى لا تقلق والدتها خوفاً عليها، أم تجربها لعلها
تعلم؟! قررت الصمت وذهبت إلى غرفتها كي تُحضر
هاتفها واتصلت به، الهاتف يرن ولكن لا رد!

- يارب استر.. أعمل إيه بس؟.. وسمعت صوت
رنين الهاتف: الحمد لله جه، خرجت، ولا زال الصوت
يعلو، لكن «محمودًا» لَمَّا يَأْتِ، وهاتفه في المنزل!

- يارب يكون نزل يصلي، يارب سترك.. لأ كده أنا
مش عارفة أتصرف، هقول لماما وخلاص، وربنا يستر
وتكون عارفة هوفين.. ذهبت إلى غرفة أمها، ولم تجدها
أيضًا!...

يُرِيدُهَا مَرْيَمَ وَهُوَ لَيْسَ بِيُوسُفَ، وَتُرِيدُهُ مُحَمَّدًا وَمَا هِيَ
بِعَائِشَةُ!

محمد الباسم

الفصل الثالث

- يا ربي!.. فين ماما هي كمان؟.. يا ماما

- إيه يا رقية بتزعقي ليه؟ أنا هنا أهو

- كنت فين يا ماما أنت كمان؟

- كنت بتوضي يا ماما ما لك وشك مخطوف كده ليه؟

- مخطوف؟.. لأ ما فيش حاجة - قالتها بارتباك وقلق -

- ما لك يا رقية؟!

- روجت أصحبي محمود ما لاقيتهاوش، ومش معاه

التليفون!

- محمود؟.. لأ ما تقلقيش يمكن نزل يصلي، ما أنت

عارفة مش بياخد التليفون وهو نازل يصلي - قالتها

بلهجة يبدو فيها إخفاء أمر ما -



- طب الحمد لله طمئتيني، أنا كنت قلقانة على الآخر،
يللا بقى نصلي مع بعض جماعة، هجيب لك الكرسي
وآجي، وقبّلت والدتها وانطلقت.

دخلت هايدي الجامعة من جهة كلية دار العلوم، وفي
طريقها لمحتها حسناء، ولكنها لا تصدق ما ترى، كيف
تحولت بهذه السرعة من ارتداء «البناطيل» إلى الحجاب
الطويل والملابس الفضفاضة؟!

- هايدي؟! .. مش معقول، ما شاء الله، اللهم بارك إيه
يا بنتي الحلاوة دي؟

- اترقي بقى يا ست حسناء.

- لأ بجد والله كده أجمل وأحلى كتير من الأول، أنا مش
مصدقة نفسي، سبحان مُغيّر الأحوال!

- لأ يا حبيتي صدقي، والفضل يرجع لرقية هي اللي
اختارت معايا الهدوم دي - قالتها بابتسامة مصطنعة -

- رقية .. آاااه، لأ ذوقها حلو.

- طبعاً مش صاحبك، لازم يبقى ذوقها حلو.

- أنت لسه زعلانة مني من الموقف إياه؟

- لأ خالص، أنا لو زعلانة مش هقف معاك أصلاً.



- ماشي يا ستي ربنا ما يجيب زعل .

- إن شاء الله، عن إذنك عشان في محاضرة مهمة جداً
والدكتور هيحدد المهم في المقرر.. سلّمي لي على رقية
وخليها تستناني نروح سوا.

- عيني حاضر .

- سلام عليكم .

- وعليكم السلام ورحمة الله .

وصلت إلى ساحة آداب، وهناك كان يجلس علاء وخالد
يتناولان مشروباً، وحين أتت لم تصافحهما كالعادة، واكتفت
بالإشارة وإلقاء السلام.

- إيه يا بنتي الخيمة اللي أنت لبساها دي؟ ما أنت
كنت كويسة من يومين؟

- كده أحلى وخيمة خيمة مالكش دعوة، وللا إيه
رأيك يا خالد؟

- ها؟.. آه كده أحسن طبعاً، وابتسم إبداءً لإعجابه
بهذا التغيير.

- طب يللا بقى عشان نلحق الدكتور قبل ما يقفل
الباب وما يدخلش حد بعده، يا علاء بيه.

- لأعلاء بيه مش فاضي ادخلي أنت وخالد بيه.

- ليه حضرتك مشغول؟

- آه.. يلا بقى اتكلوا .. وانطلق خالد وهايدي، ويمتلئ قلبها سعادة؛ لأنها أعجبت خالد، وأعادت سؤالها له وهما في الطريق إلى المدرج:

- بجديا خالد أنا كده أحلى من الأول؟!

- آه يا بنتي والله كده أحلى، وكمان طلع ذوقك حلو.

- ميرسي، بس بصراحة ده ذوق رقية مش ذوقي.

- رقية مين؟

- واحدة صاحبتني في دار علوم.

- تمام.. اجري الدكتور دخل.. ومكث أعلاء يخطط لمساومة ضحيته بعدما انتهى من «فبركة» الصور، وتجهيزها...

عاد محمود إلى البيت، وكانت والدته تنتظره وأحضرت الإفطار، ولكنها لا تستطيع الاتصال به؛ لأن هاتفه في المنزل، وفجأة وجدت الباب يُفتح.

- السلام عليكم يا ماما.

- وعليكم السلام ورحمة الله وبركاته، حمد الله على سلامتك، تأخرت كده ليه يا ابني قلقتني؟

- معلىش يا دوب على ما وصلت واديت للراجل الفلوس، وما رضيش يسبني إلا لِمَا أقعد أفطر، وفضل يدعي لك كثير جداً إن ربنا يبارك لك، ويجعله في ميزان حسناتك.

- اللهم آمين يا ابني، بالله عليك يا محمود اوع بعد ما أموت تنساهم وللا تنشغل عنهم، وده واجب علينا نعطي المحتاج يا ابني زي ما ربنا أمرنا.

- ربنا يطول في عمرِكَ يا أمي، ويبارك لنا فيكَ ويفرحنا برؤية بابا تاني.

- آمين يا رب.. اوع حد غيرنا يعرف الموضوع ده، حتى رقية، خليه بيننا وبين ربنا، وبالمناسبة هي كانت قلقانة عليك، وأنا قلت لها يمكن نزل يصلي.. المهم...

- نعم؟

- أنت يا حبيبي ربنا مَنّ عليك وبقيت محاسب، وما حدش ضامن عمره يا ابني، وأنا عاوزه أفرح بيك قبل ما أموت.

- ربنا يطول في عمرك يا أمي .

- إيه رأيك في ليل بنت عمك علي؟ .. أهني بنت
محترمة وذات دين، وأبوها وأبوك كانوا أكثر من الإخوات،
وواثقين في تربيتها، وللا أنت في حد ثاني في دماغك؟

- والله يا أمي بصراحة من وإحنا صغيرين وأنا معجب
بشخصية ليلي، وكنت دايماً ما أبنش ده، بس أدام جت
منك؛ فعل بركة الله

انتهت امتحانات الفصل الدراسي الأول، كل واحد
يودع الآخر وداعاً مزوجاً بالاشتياق والقلق من نتيجة
الامتحانات، وأمام كلية دار العلوم تودع رقية حسناء،
وتعانقها عناقاً حاراً وكأنها لن تراها من جديد.

- هتوحشيني أوي يا حسناء، بس لازم نتقابل في الأجازه
إن شاء الله.

- وأنتِ كمان يا حبيتي هتوحشيني جداً، وبعدين ما
أنا عملت لك الفيس وعلمتك إزاي تستخدميه، ونتكلم
كل يوم إن شاء الله.. والتفتت رقية فجأة ورأت أحمد:
الحقي.. اسمه إيه ده أهو.

- مش قلنا خلاص بقى نسينا من الكلام ده، ونستغفر ربنا بقى - قالتها بعصبية شديدة -

- آسفة.. عندك حق، وأهو الفترة دي هتريخني من رؤيته، وإن شاء الله ربنا ينسيهوني.. أستغفر الله العظيم.

- ماشي.. يللا بقى عشان مش قادرة عاوزة أنام، وأكلمك على الفيس بقى، سلام عليكم ورحمة الله.

- و عليكم السلام ورحمة الله وبركاته.

فتحت رقية حسابها على «الفيس بوك»، وأثناء تصفحها وجدت حسابًا تنصدره صورة ذاك الشاب الذي تحاول نسيانه، لكنها أينما ذهبت وجدته حتى في هذا العالم الافتراضي لا يفارقها وجوده؛ ترددت في الدخول إلى حسابه وفي النهاية فتحت الحساب؛ وتعجبت من تلك المنشورات التي معظمها وصف لزوجته المستقبلية وكأنه يصفها هي!

- أنت شكلك تقصدي!.. لا يقصدي إيه؟ أستغفر الله، يا ترى في قبول لي وللا إيه بالظبط؟.. أنا ليه أصلاً دخلت عنده بعد ما قررت أنسى؟ أستغفر الله العظيم، أنا تعاهدت على نفسي إني مش هفكر في الموضوع ده تاني، ووعدت حسنًا، من دلوقتي هшил الموضوع ده من دماغي نهائي، ولو شوفته هعمل نفسي مش شايفة حتى



لو في قبول فعلاً، ولو من نصيبي ربنا هييسر لنا الزواج،
ومن وقتها ولم تدع لنفسها فرصة للتفكير فيه مجدداً، وإن
كان ذلك على حساب قلبها.

انتفضت حين اهتز هاتفها وانتشل تفكيرها.. بسم الله
الرحمن الرحيم! هايدي؟ بنت حلال كنتِ على بالي.

- سلام عليكم

- وعليكم السلام ورحمة الله وبركاته، عاملة إيه؟

- الحمد لله يا حبيتي بخير حال، أنت أخبارك إيه؟

- الحمد لله كله تمام، إيه مالِك كده بقالك يومين ولا
بتتصلي، ولا حتى بتباني على الفيس؟

- معلش عقبال عندك «حودا» كان بيخطب؛ فكنا
مشغولين شوية.

- ألف مبروك، عقبالك يا روق روق.

- آمين وإياك يا رب، ربنا يرزقنا أزواج صالحين.

- آمين يارب وأشوفك عروسة جنب عريسك، وأنا
جنبك بعريسي هاهاها

- يارب يا أختي.



- المهم.. جدتي كانت عاوزة تشوفك.. ماتبقي تيجي تزورينا.

- ربنا يبارك لنا فيها، بس كده؟.. تحت أمر تيتا، بكرة كويس وللا إيه؟

- ينفع طبعاً لو حتى دلوقتي.

- خلاص إن شاء الله هستأذن من حودا، وآجي لك بكرة إن شاء الله.

- قشطة.

دخلت رقية بابتسامتها النقية على تلك العجوز التي تجلس على الأريكة وبجانها العصا التي تركز عليها أثناء التحرك.

- السلام عليكم ورحمة الله وبركاته.

- وعليكم السلام ورحمة الله وبركاته يا حبيبتى اتفضللي، إيه الجمال ده، الله اكبر.

- تسلمي يا تيتا، حضرتك أجمل ومنورة الدنيا.

- أهى دي بقى رقية يا ستي.

- أهلاً وسهلاً يا روق روق.
- روق روق كمان؟ دي أحلى روق روق بقى.
- نعمل إيه بقى، الست هايدي مالهش سيرة غير روق روق لما حفظت الاسم.
- ربنا يبارك في حضرتك يا تيتا، وهدهد دي أختي.
- ربنا يخليكو البعض يا بنتي، ويحفظكم من ولاد الحرام.
- آمين.
- اللهم آمين.
- عن إذنك يا ستو بقى هدخل أنا ورقية نقعد في أوضتي.
- اتفضلوا يا ماما، زي بيتك يا حبييتي خدي راحتك خالص.
- تعجبت رقية من هذا الهدوء الذي يحل بالبيت، لا حركة ولا صوت هنا أو هناك، وبدأ الحوار بسؤالها:
- هو فين ماما أو بابا يا هايدي؟!!

أجابتها بصوتٍ حزين: ماما؟!.. لأ ماما متوفية من وأنا
في أولى ابتدائي، وبابا متجوز وعایش في بيت تاني مع مراته
وإخواتي، وأنا عایشة مع جدي هنا؛ عشان مش بحب مرات
أبویا، وانهمرت الدموع من عينيها كالسيل.. احتوتها رقية
كاحتواء الأم لرضيعها واعتذرت لها على تذكيرها بذلك:
- أنا آسفة جدًا، أنا أول مرة أعرف الكلام ده.

- لأ يا حبيتي ولا يهملك، سييك سييك من الكلام
ده تعالي أفرّجك على الفساتين الجديدة الي أنا اشتريتها
والخمارات.

- ربنا يشتك يارب، وشعرت باحتياج هايدي إلى
الاهتمام، والعطف عليها؛ فقررت أن تكون لها صديقة
وفية وأما حنوًّا.

وأمسكت رقية برأسها، وأغمضت عينيها فجأةً!
وتحركت إلى الخلف لتجلس على السرير.. ذلك الدوار
المستمر الذي يتكرر كثيرًا، وخاصة في تلك الأيام التي
تشعر فيها بأن هناك أمرًا يدور في البيت دون علمها، لعلها
مفاجأةٌ تُحضر لها، وزاد اقتراب موعد نتائج الامتحانات
من توترها وقلقها؛ فأضحت لا تأكل إلا قليلًا.



بدأ الفصل الدراسي الثاني لكنَّ حسناء لم تذهب إلى الجامعة في الأسبوع الأول، وكانت كعادتها تتابع الجديد من خلال «فيس بوك» والمجموعات الخاصة بدفعتهم، ولاحظت أن أحمد لم ينشر أي منشورات جديدة منذ أربعة أيام، فبدأت ترى ما الذي يمنعه؟ أم لَمَّا تبدأ الدراسة في كليتهم بعد؟! دخلت على حسابه الخاص، وأرسلت رسالة:

- سلام عليكم.. رأى أحمد الرسالة، وانتظر قليلاً، وهي متعجبة لذلك، ثم كتب:

- وعليكم السلام ورحمة الله.

- لو سمحت هي الدراسة بدأت؟.. أصل حضرتك ما نشرتش حاجة من كام يوم وأنا متعودة أتابع من خلال التسجيلات بتاعتك.

- هي بدأت، بس أنا مش سجلت من أول الترم، وكتبت المحاضرات بس.

- طب ينفع تصورها لي لو سمحت؟

- هرفعها على الجروب و حضرتك نزليها.. أحست بالخرج من رده، وقررت إنهاء المحادثة:

- تمام.. جزاكم الله خيراً.



- وإياكم.. سلام عليكم.

ابتسمت وأغلقت هاتفها، وصارت تحدث نفسها:

ما شاء الله.. ده شكله محترم جداً، بس كده ممكن يفهمني غلط.. لأ هو أكيد هيحسن الظن، عندك حق يا رقية تحبيه من غير ما تتكلمي معاه، أومال لو كلمك هتعملي إيه؟!

وهو كذلك صار يفكر ويتساءل: هو أنا هتجوز إمتى؟.. شقتي موجودة، وأنا الكبير ولو كلمت الحاج هيقولي إني لسه صغير، أعمل إيه؟ أنا لازم أُلَمِّحهم إني كبرت خلاص ولازم يفهموا ده، اللهم زوجة صالحة، وإن شاء الله هتكون من الدار.

أُعلن عن موعد نتائج امتحانات الفصل الأول، وكل الطلاب تترقبها بقلوب تتسارع دقاتها، ولكنَّ خالدًا كله ثقة، وكل ما يقلقه ألا يصل إلى منصة الدكتور التي يحلم بها فقط، ويشق في استجابة دعوات أمه في صلواتها، ودعوات إمام مسجد القرية الشيخ مصطفى والده التي لم تُرد أبدًا؛ لكن دعوات والده وثقته الزائدة لم تكن في صالحه هذه المرة، وظهرت على وجهه صدمة النتيجة أمام

زملائه، واستعجب علاء من ملاحه التي تحولت وامتلأ وجهه غضبًا، وسأله ساخرًا:

- إيه يا بيضة زعلانة ليه؟ نقصتي كم درجة عشان تعملي في نفسك كده.

تركه ولم يرد عليه وخرج متجهًا إلى المدينة الجامعية، ورأسه يغلي: أنا أشيل مادتين؟! وكمان عرب قبل الإسلام وأوربا الوسطى؟ يعني أتفه مادتين، والواد علاء اللي مقضيها وهايدي يعدوا صافي كده؟ أقول لأبويا إيه دلوقتي، وأنا محسسه إني «ابن خلدون» وإني هتعين يعني هتعين؟

وظهرت نتيجة دار العلوم، وحصلت رقية على تقدير جيد، بينما حسناء حصلت على مقبول، والجميع ينتظر معرفة نتيجة أحمد بشغف، لكنه لم يزد في منشوره عن «الحمد لله نجحت»؛ لم تنتظر حسناء وأسرعت في البحث عن اسمه، وعرفت أنه الأول على دفعته، لكنها لم تخبر أحدًا عن ذلك الاهتمام، وكيف وهي دائمًا تنصح بعدم الاختلاط والصدقة بين الجنسين؟!

في المساء.. أرسلت إليه مجددًا تهنئه بذلك:

- سلام عليكم.. ألف مبارك وإن شاء الله من نجاح لنجاح؛ تعجب من ذاك الكلام، ولم يرد، وأكملت هي:
- أنا عارفة إنه ما ينفعش أبعت لك ولا أهتم، لكن ما أعتقدش إني تعديت حدود التعامل بده، وكم إن الفيس ده يعتبر حجاب بيني وبينك.. تعجب مما قرأ، وكتب:

- والله أعتقد إن الفيس ده مافيش حد معانا فيه يعني يعتبر خلوة، وإن الحدود إننا ما نتكلمش إلا في الضرورة القصوى، يعني لا قدر الله لو كل زميلاتك ما قدروش يساعدوك، واحتاجت أوي المحاضرات أو غيرها في الحالة دي تبقى ضرورة قصوى، مش حضرتك تدوري على اسمي من الموقع وتحبيي نتيجتي، وتكلميني خاص وتقولي إنه من وراء حجاب!

صُدمت من رده، وكأن صاعقاً أصابها، وقالت في نفسها:

- يا لهوي ده أنا جبهتي طارت، بس مش هديك فرصة برضو، واستأنفت:

- على أية حال خير، وربنا يوفقك ويرضى عنك، واعتبره اختبار أخلاق، ربنا يحسن أخلاقك، ومتأسفة على التدخل.

- آمين وإياك.. (اختبار أخلاق؟!)



ازدحمت عربية «المetro» بمحطة الدقي، واكتظت بالركاب، وضاق تنفس رقية ودوار في رأسها كاد يُنسيها ملامح الحياة من حولها، وبجوارها هايدي لا تملك سوى تحريك الهواء بدفترها، ومحاولة إزاحة الناس وإفساح الطريق لتقترب من باب العربية وتحصل على بصيص من الهواء لتتنفس صديقتها؛ نزلتا في محطة الجامعة، وتزداد حالتها سوءاً، لا تستطيع الحركة من شدة الدوار (الدوخة) حتى أغمي عليها في المحطة، وحولها بعض الفتيات يحاولن مساعدتها، وعلى الفور نقلوها إلى «مستشفى» الطلبة.

وصل خالد بصحبة علاء إلى ميدان الجيزة حيث إن هناك إحدى صديقات أخت علاء تنتظره كي تسلمه أموالاً لأخته كانت استعارتها منها، وذلك هو المكان الأقرب إلى سكن تلك الفتاة، زعم هو هذا حتى لا يكشف خالد أفعاله الدنيئة، ووافق خالد على الفور، وذهب للتسوق هناك بعد الانتهاء من قضاء حاجة زميله:

- بص يا شيخ إحنا هنستنى صاحبة أختي دي وأول ما تيجي هروح أكلها بعيد عشان ما أسبيلهاش إحراج.
- ده من إمتى الاحترام ده؟.. ده أنت مش عاتق أي عرسة في الجامعة.

- دي حاجة ودي حاجة يا أسطى، وبعدين دي صاحبة أختي يعني كأنها أختي.

على أحد الأسرّة تستلقي رقية كزهرة ذابلة، والطبيب يفحصها ويسأل صديقتها عما حدث لها:

- هي بيحصل لها الدوخة دي كتير وللا دي أول مرة؟

- حصل مرة قدامي وكانت بتقول لي إن ده من صغرها مش جديد، بس أول مرة يُغمى عليها قدامي.

- تمام، وصمت الطبيب، وهايدي تتعجب من صمته هذا، وهو يُجري لها تحليلاً لقياس نسبة «هيموجلبين» الدم (HBC)؛ وجد النسبة «٦» ما يستوجب نقل دم لها على الفور ثم استأنف حديثه:

- طب هي انتقل لها دم قبل كده؟

- هو الموضوع صعب أوي كده يا دكتور؟

- لأ ما تقلقش بسيطة، هحتاج بس إننا ننقل لها دم.

اتصلت هايدي بمحمود؛ لأن فصيلة دمه هي فصيلة دمها كما أخبرتها من قبل، ولكنه لم يرد، حاولت عدة مرات لكن لا جديد، وتركها الطبيب وخرج من الغرفة، فلحقته هايدي مباشرةً.

- لو سمحت يا دكتور أنا ممكن أتبرع لها لو ينفع؛
 عشان أخوها مش بيرد ومش قادرة أشوفها كده.. لم
 تتوافق فصيلة دم هايدي بعد الفحص مع فصيلة دم رقية،
 وازداد القلق، ولا زال هاتف أخيها لا يرد، فلم تجد حلاً
 سوى الاتصال بخالد:

- ألو.. سلام عليكم، بالله عليك يا خالد تيجي لي
 مستشفى الطلبة حالاً دلوقتي، صاحبتني محتاجة نقل دم
 ومش عارفة أتصرف.

- ماشي.. أنا جنب المستشفى.. خمس دقائق وأكون
 عندك إن شاء الله.. عن إذنك يا علاء في ظرف طارق كده
 وهرجع لك تاني.

- ظرف طارق وللا مطب صناعي؟ هاهاها

- يا ض بطل تفاهة بقي.

- يا أسطى برؤش.. فيه إيه طيب؟

- هايدي في المستشفى ومحتاجة نقل دم لواحدة
 صاحبتها.. ما تيجي معايا.

- لأ يا عم روح لوحدك أنا ما عنديش دم أساساً..
 مستشفى برضو يا هايدي؟ وأنا اللي فاكرك محترمة!
 وتسحبني واحدة واحدة وتقولي مستشفى! مسيرك توقعي

يا ديدي - قلها سراً بنبرة تحمل من الحقد والشر جبلاً
فور انصراف خالد - .

ومن حسن الحظ كانت فصيلة دمه ١ التي تقبلها باقي
الفصائل دون مشكلة؛ وبدأت حالتها تتحسن رويداً رويداً،
وأخيراً اتصل بها محمود، فردت عليه هايدي:

- سلام عليكم.. أيوا يا أستاذ محمود، أنا صاحبة رقية.

- أهلاً وسهلاً، وهي فين؟

- هي معايا أهى ما تقلقش، بس كانت تعبانة شوية
وروحنا المستشفى

- مستشفى إيه؟

- مستشفى الطلبة.

- طب هاجي حالاً.

- متشكرة جداً لحضرتك، جزاكم الله خيراً، معلىش
تعبتك معايا.

- ولا يهيمك، ده واجب، المهم إنك الحمد لله بخير،
تأمريني بأي خدمة تاني؟

- جزاكم الله خيراً، وانصرف من المشفى، وبعد قليل وصل محمود بسيارته، وشكر «هايدي» على ما فعلت، ثم أوصلها إلى بيت جدتها في دار السلام، وعاد بأخته إلى المنزل.

ومع اقتراب امتحانات نهاية العام قرر خالد أن يقلل من لقاء علاء والزميلات، وأن ينظم وقته كما كان يفعل في الثانوية كي يعوض ما حدث، ولا تفارقه التساؤلات عن رسوبه في مادتين من أسهل مواد الفصل الأول:

- أنا عاوز أفهم إزاي أنا شلت تاريخ أوروبا الوسطى وما قبل الإسلام وأنا كنت مغشش معظم اللجنة وكلهم عدُّوا وأنا لأ، ده حتى علاء اللي ما يفتحش كتاب نجح فيها، سبحان الله!.. نفتح فيس يمكن نلاقي حاجة تخرجنا من الهم ده، وأثناء تصفحه بلا مبالاة؛ لفت انتباهه منشورًا كان لحساب بإسم «الناصح الأمين»، محتواه:

«وإنَّ العبد ليغفل عن ربه حتى ينساه فيشتاق له ربه؛ فيرسل من حبه بلاءً يُذكره به حتى يعود العبد يحب الله فيحبه الله ويرفع عنه البلاء»، شعر وكأنَّه موجهٌ إليه بشكل خاص، وفجأة وجد هايدي أمامه.

- بسم الله الرحمن الرحيم! طب كُوْحِي أو اعملي أي حاجة، حرام عليك يا شيخة خضيتيني.

- أنتَ اللي شكلك كنت مركز أوي في التلفون، خير؟

- لأ مافيش حاجة قاعد على الفيس عادي.

- طب العصر أذن مش هتروح تصلي؟.. ابتسم ساخرًا ونظر إليها بتعجب قائلاً: أَللاه وده من إيه ده؟ الله يرحم أما كنتِ بتسمعي الأذان ولا كأنك سامعة!، هو إيه صحيح الي حصل لك مرة واحدة كده؟!.. لبس واسع وحجاب طويل، ومابقناش بنلبس بناطيل! إيه الي غيرك فجأة كده؟ نظرت إليه متأملة في ملامح وجهه، وكأن عينها تريد أن تنطق وتبوح له بأنها تحبه، وتخبره أن كل ذلك من أجله هو، وأضافت: مافيش كده أريح، وأنت شايف كده أحسن وللا الأول؟

- يا ستي أنت حرة في لبسك، وشكرًا إنك قلت لي؛ عشان أنا فعلاً ما سمعتش الأذان، عن إذنك.. ولم يخط سوى بضع خطوات ورجع:

- بقولك صحيح يا هايدي، هي صاحبك عاملة إيه دلوقتي؟

- صاحبتني؟!.. الحمد لله كويسة.

- ربنا يطمئنك عليها، سلام عليكم.

- وعليكم السلام.. وأنا اللي فاكراه فهم، يللا كل حاجة هتيجي واحدة واحدة - قالتها في نفسها بخيبة أمل - .

توضاً وصلّى العصر، وبعد الانتهاء من الصلاة هدأ باله وصفا ذهنه، وتذكر المنشور، وصار يفكر بشكل منطقي، ويراجع نفسه: هو البعد عن ربنا فعلاً والصحبة.. من صغري وأنا ملتزم ومش بفوت فرض، وحافظ للقرآن ودايمًا بأطلع من الأوائل! اتغرّيت في نفسي وقضيتها خروجات وبنات، واتلميت على شلّة أتكسف أقول قدامهم إني رايح أصلي، وافتكرت إن الموضوع سهل، وهوصل لي أنا عاوزه بالطريقة دي، وبعدت جامد عن ربنا، وبدل القرآن بقى تفكيري إزاي أبان متحضر وابن ناس قدام البنات، ورفع يده إلى السماء وترجى الله أن يغفر له.

بفستان أبيض مزخرف وحجاب فضفاض متلائم ومتناسق معه تظهر «رقية» بجوار «أحمد» بدلتة السوداء ورابطة العنق وردية اللون فوق قميصه الأبيض، ومن حولهم تتضافر القلوب بالسعادة والفرح، وتبادل الألسنة

الدعاء لهما بالبركة، والأصدقاء يتناوبون السلام والتهنئة،
وقلبا العروسين ينبضان حُبًّا وشكرًا للقادر الذي يسّر لهما
الطريق إلى هذه اللحظة التي طالما انتظراها.

وعاد الأمير بملكته إلى مملكتها الصغيرة، يتبادلان
الضحكات ويرويان حكايات الذكريات، وإذا بهما يتفاجآن
بامرأة تجلس على السرير والغضب يشعل وجهها نارًا،
وبيدها مسدس موجهٌ إليهما.

- لا يا حسناء، لأ حرام عليك.. إنا عملنا لك
إيه؟! ...!

إِنَّ مِنْ حِكْمِ اللَّهِ فِي الْإِبْتِلَاءِ: أَنْ تَتَّقِظَ النَّفْسُ، وَيَرُوقَ
الْقَلْبُ بَعْدَ طَوَّلِ غَفْلَةٍ.

محمد معز السعيد

الفصل الرابع

تسلم علاء المبلغ الذي ساوم تلك الفتاة التي كان ينتظرها بميدان الجيزة عليه بعدما تركه خالد بدقائق وانصرف، وفي طريقه مرت بجواره سيارة وأوقفته لتسأله عن مكان قريب من الميدان، وتظاهر أحد الركابين بأنه لا يفهم جيداً، ونزل كي يصف له الطريق بشكل أوضح، وأثناء انشغال علاء بالإشارة والوصف وجد نفسه تحت ذراعين ضخمين يُدخلانه السيارة، وأحبال تُكتّفه، وضُرب على رأسه ضربة فصلته عن الواقع.

انتصف الليل وساعاته تمر واحدة تلو الأخرى، وأوشك الفجر على البزوغ، والدته ينتفض قلبها قلقاً عليه ولا تعلم ماذا تفعل، وهاتفه مغلق وليس من عاداته أن يتأخر لهذا الوقت من الليل، ولم تتمكن عُلا من التواصل معه عن طريق أي وسيلة كانت، ويزداد الخوف في ذلك البيت الذي عمّ فيه الحزن.

توقفت السيارة في منطقة هادئة جداً بحي المعادي،
ونزلوا بعلاء ولا تزال الأحيال تكبل حركته، وعلى فمه
لاصق يحجب صوته، وأدخلوه في بيت وانهلوا على
جسده ضرباً مبرحاً، ثم فتحوا حقييته وأخرجوا منها
حاسوبه المحمول الذي يحتفظ على ذاكرته بصور ضحايا
«المفركة»، وأجبروه على حذف كل الملفات الخاصة بذلك،
وهددوه بالقتل إن علموا أنه كرر ذاك من جديد، وأن ما
فعلوه هذا مجرد تنبيه فقط، وأخلوا سبيله.

عاد إلى البيت مع شروق الشمس وجسده يتألم من أثر
الضرب، ووجهه شاحب، وحاول أن يتماسك ويخفي هذا
عن الجميع.

- كنت فين كل ده وتليفونك مقفول ليه؟ وإحنا هنا
قلقناين عليك!

- ما فيش يا ماما، يعني هو أنا عيل صغير عشان
تقلقوا عليّ؟

- أنت كمان لك عين تعلي صوتك؟.. كنت فين وإيه
الي مبهدلك كده؟

- ما فيش.. واحد صاحبي اتحجز في المستشفى وكنت
قاعد جنبه عشان ما حدش من أهله هنا.. غلطان أنا
يعني؟! والتليفون فصل شحن.

- طب حمد الله على السلامة، اقعد على ما أجهزلك
القطار، واستشعرت الحرج وصمتت.

- لأ أنا هدخل أنام عشان مش قادر.

نظرت إليه عَلا نظرة سخرية، وكأنها تشك في كلامه
وقالت: - مستشفى؟ ربنا يقدرك على فعل الخير يا أخويا،
أفضل قاعدة أنا كده ومش عارفة أذاكر من قلق ماما
وأنت بايت لي في المستشفى، تركها ولم يحرك ساكنًا على غير
عادته، ودخل غرفته وارتمى على سريره.

أخفى أحمد عروسته وراء ظهره تفاديًا لها، ولا أحد
يفهم ما الذي جاء بحسنا إلى هنا، وكيف دخلت، وماذا
تريد أن تفعل، ولا تزال هي تصوب سلاحها تجاههما
وعيناها تُخرج شرارًا لو تملك من الصلب لانصهر من
شدته، وقالت بصوت مبحوح:

- جميل أوي إن القلبين اللي فضلوا يحبوا في بعض أربع
سنين يتجمعوا مع بعض في قبر واحد! أربع سنين وأنا
بلمّح لك وأصارحك وأنت دايمًا تصدني وتجرحني،
وحاولت ألف مرة أكرّ هك فيه وأنت عايشة في دور إنه
من نصيبك، وإن شاء الله ربنا هيجمعنا ببعض، وبعد ما
خلاص جمعكم أنا لازم أنتقم لجرحي الي بيكبر كل يوم.

ووجدت رقية يدًا تُربت على كتفها برفق قائلةً:

- قومي يا رقية عشان نلحق نجهز؛ انتفضت فزعًا وهمهمت:

- إيه؟.. مين؟ ليه ليه ليه؟!!

احتضنتها أمُّها لتخففَ عنها: أَعُوذُ بِاللَّهِ مِنَ الشَّيْطَانِ
الرجيم، مَا لِكَ يَا حَبِيبَتِي فِي إِيهِ؟

- أَعُوذُ بِاللَّهِ مِنَ الشَّيْطَانِ الرَّجِيمِ.. كابوس - قالتها
وهي تتنهد وتتصبب عرقًا من هول الموقف-

- قومي اغسلي وشك واجهزي عشان أهل خطيبة
أخوكِ زمانهم جاينين والبيت يضرب يقلب.

- أخويا مين؟

- أخوكِ مين إزاي؟.. أَنْتِ الكابوس نَسَاكِ أَخُوكِ..
قومي بلاش دلع.

- حاضر ماشي هقوم.

لم تتوقف حسناء عن الاهتمام بأحمد، بل وزاد الأمر إلى
التفكير في مصارحته دون حرج، وتبدلت تلك المبادئ التي
تَعْتَبِرُ الانجذاب القلبي نفسه عيبًا، ولا يجب أن يسمحَ

شخصٌ لنفسه أن يفكرَ في من ليس حلاله؛ وأمسكت هاتفها وشرعت في الكتابة إليه وأصابعها تتردد نتيجة خوفها من ردِّ فعله، ثم قررت المراسلة مهما كانت النتيجة:

- سلام عليكم.. صراحةً كده أنا معجبة بحضرتك، وأنت شخص محترم وملتزم ما شاء الله ومثال للشباب المجتهد، وحاولت أكثر من مرة إني أمنع نفسي من التفكير وماعرفتش، وقلت أعرفك وخلاص والي يحصل يحصل، وأرجو إنك ما تفهمش الموضوع غلط وتحسن في الظن.. وبس كده أنا خلصت الي عندي.

انتظرت كثيرًا لكنه لم يفتح حسابه طوال اليوم؛ فلم يرَ رسالتها، وفي المساء فتح الحساب وقرأها؛ تعجب مما رأى، وظل يفكر ماذا يكتب، وهي تزداد قلقًا ولا تعرف هل عدم الرد هذا يعني أنه لن يرد أم يحضر لها ردًا جاريًا، أم سينتهي الأمر بحظر حسابها؟!

وبعد قليل وصلها إشعار من «ماسنجر» باستلام رسالة جديدة، فتحتها على الفور لكنها ليست منه بل من رقية: «هو ده وقتك ده يا رقية؟!» وكانت الرسالة: «سلام عليكم.. حُسون حبيبي، يعني أختي الي شبيهي في كل حاجة، فرح أخويا محمود الخميس الي بعد العيد إن شاء الله، يعني هنكون خلصنا الامتحانات ومافيش حجة، ومش محتاجة أعزمك أصلًا ده أنت

الي تعزميلي، وتشرفيني إن شاء الله أنت وماما وجنة».

- مبارك مبارك عقبالك يا حبيتي.

- وعقبالك أنت كمان يا حبيبة قلبي.. عن إذنك
علشان ألحق أعرف باقي البنات.. سلام عليكم.

- وعليكم السلام ورحمة الله وبركاته.

وبعدها مباشرة وصلها رد أحمد: بصي أنا صراحة مالش
في الكلام مع البنات والمواضيع دي، لكن ما ينفعش إني
أسيئ الظن في أي حد أيًا كان، وجزيت خيرًا على حسن
ظنك فيّ.

- على فكرة أنا كمان عمري ما كلمت شاب أصلاً،
وأول مرة أتجرأ وأعمل كده.

- لأ، ولا يهمك.

- طب ممكن تبقى تبعت لي تسجيلات المحاضرات
الأخيرة؟.. معلش لو مافيهاش رزالة!

- بصراحة الباقية هتخلص ومش هيكمل تحميل.

- طب ينفع أخذها في الجامعة؟

- في الجامعة إزاي؟.. وأنا مش عارف شكلك أصلاً!

- مش عارفة برضو، بس ممكن نتقابل بعيد عن الكلية خالص، أو برا الجامعة.

- خلاص ماشي.. الأسبوع الجاي إن شاء الله هبقى أكتب لك هنا ونتقابل.. سلام عليكم.

بعد أسبوع.. كانت تقف حسناء أمام باب الجامعة الرئيس، وقلبها ينبض قلقًا وتلفت يمينًا ويسارًا كأنها لصٌ هاربٌ من العدالة، وتنظر في وجوه السائرين لعلها تجده، وبعد دقائق مرت عليها كساعات طوال أتى؛ وامتلأ وجهه خجلًا ولا يعرف أي واحدة هي ممن يسرن هناك، وإذ به يجد صوتًا خفيصًا بجواره:

- سلام عليكم.. أنا حسناء.

- عليكم السلام ورحمة الله وبركاته.

- ممكن نبعد عن الجامعة خالص؛ عشان أنا صراحةً محرجة جدًا وخايفة حد يشوفني؟!

- ماشي بس بالله عليك سريعًا؛ عشان عندي سكشن.

ذهبت إلى البيت مباشرة بعدما أرسل إليها التسجيلات، وشرعت في الاستماع إليها، وتدوين أهم النقاط التي وردت في المحاضرات، ولكن التسجيل الأخير كان ناقصًا، ويبدو

أن ذاك الجزء المفقود هو الأهم؛ فلم يكن هناك حلّ سوى مراسلته من جديد، لكن هذا في نظرها يعتبر تعدياً لحدود التعامل طبقاً لمبادئها!.. ترددت في اتخاذ قرارها، لكنها لم تجد سواه للإلام بتلك النقاط، فلا بد أن تُعوّض نتيجة الفصل الأول؛ فتحت هاتفها وأرسلت إليه:

- السلام عليكم ورحمة الله.. أنا متأسفة جداً إنني بعث لحضرتك ثاني، لكن محاضرة النصوص تقريباً ثلاث أرباعها مش مُسجّل، وحضرتك عارف إن دي من أصعب المواد ولازم تتفهم كويس، فياريت لو مع حضرتك باقي التسجيل أو كاتب المحاضرة تبعتها، بتأسف ثاني لحضرتك، وجزاكم الله خير الجزاء على تعبك الصبح.. بمجرد رؤيته لاسمها في إشعارات الرسائل شعر بانسراح في صدره لا يعلم لما حدث؛ فأسرع وفتح ليقرأه...

- وعليكم السلام ورحمة الله وبركاته.. لا، ولا يهمك خالص أنا تحت أمرِك، هي فعلاً المحاضرة مش اتسجلت كلها؛ لأن التليفون فصل والتسجيل مش اكتمل، وهصور لك اللي أنا كاتبه حالياً، وجزاني وإياكم، ومش تعبت ولا حاجة وتحت أمرِك في أي وقت.

- طب ممكن طلب كمان معلش؟!

- اتفضلي.

- هو أنا بس ممكن ما أنزلش الأسبوع ده الجامعة؛
عشان ماما تعبانة شوية فممكن تبقى تبعت لي التسجيلات،
أو حتى آخذها من حضرتك في الجامعة؟!

- شفاها الله وعافاها، مش مشكلة خالص هجمع لك
المحاضرات وأبقى أديها لك.. كانت تلك المحادثة مختلفة
اختلافًا كبيرًا عن ذي قبل؛ تطورت الأمور إلى التعارف
السطحي الذي لا يتجاوز حدودهما كزملاء.

أصبح «الناصح الأمين» صديقًا مُقَرَّبًا جدًا لخالد، ولم
يهتم خالد بمعرفة هويته، اكتفى فقط بكونه حسابًا دعويًا
يُحَفِّز على الخير والإصلاح، واعتبره جليس الخير الذي
يستنصحه في أمور دينه ودنياه، بل وكان يستشيريه في كل
صغيرة وكبيرة في حياته، وكانت كلمته له كالأمر ما لم
تخالف شرعًا أو عرفًا؛ وكان أول قراراته أن يتعد تمامًا عن
صحبة السوء التي تبعده عن ربه، وأصبح لا يتعامل مع
البنات جميعهن، بما فيهن «هايدي» التي كان سببًا في تغيير
الكثير في نمط حياتها.

كان ذلك صدمة كبيرة لهايدي، خاصة أنه مر بجوارها
ذات مرة ولم يحدثها ويمزح كعادته، حتى عندما حاولت
الحديث معه لعله لم يرها؛ أدار وجهه واكتفى بإشارة يده

وكأنه يقول لها لا تقترني، جلست مكانها واحترق قلبها، وعقلها يمرر شريط ذكرياتها معه أمام عينيها، ربما فعلت ما يغضبه دون أن تدري، لكنها لم تجد سوى مواقف سعادة ومرح، وظلّت في تلك الحال إلى أن لمحت «علاء» يجلس بجوار بعض الزميلات من أصدقائهم، وتعلو الضحكات والمزاح أمام مبنى الكلية الرئيس؛ أسرع إليه لتفهم ما حدث لخالد، نادته من مسافة ليست بعيدة:

- علاء.. لو سمحت ثانية.

- أهلاً يا شيخة هايدي (قالها بسخرية منها)

- مش وقت هزار.. هو خالد مال له؟ ندهت عليه سابني ومشى ومشي فاهمة إيه السبب!.. نظر إليها بابتسامة مصطنعة وأجاب: ألا هو أنت ما عرفتيش؟!

- ما عرفتش إيه؟!

- أصل خالد من يومين كده قطع علاقته بكل الشلّة، وقال إيه إحنا أصدقاء سوء، ومن ساعة ما عرفنا وهو حاله اتغير وفشل.. وإن كلامه مع البنات حرام، وعایش في دور الشيخ أحمد.. تخيلي! أو مأت برأسها وفهمت السبب، لكن ماذا عنها؟ تحولت كل هذا التحول كي تلفت نظره وتكون تلك التي تصلح له زوجة، ماذا تفعل بعد أن تركها وابتعد؟!

خرجت عُلا مصاحبة لصديقتها مارفيللا بعد أداء
الامتحان الأخير من امتحانات الثانوية العامة، وقد زال
ذاك الهم الذي آلهما عامًا بأكمله، وأرهقهما التنقل بين
المراكز التعليمية والدروس الخاصة من مكان لآخر،
وكادت أجسامهما أن تنحل من ضغط المذاكرة، بسطت
ذراعيها، وتنهدت قائلةً:

- ياااه يا «ماري» أنا مش مصدقة إني خلصت من أم
الثانوية دي يخرب بيت كده، يعني كلها كم شهر وأروح
الجامعة.

- تروحي الجامعة وتشقطي طبعًا!

- أيوا أومال إيه هو أنا هتهدي؟!.. ده إحنا لازم نخربها
في الجامعة.

- بيس يا أسطى ونصاحب شباب الكلية كلهم، وفي
آخر سنة نهمد ونُشقط العريس هاهاهاها

- هاهاهاها.. قشطة يا معلم.. لأنتكلم جد شوية
يا ماري.. جامعة يعني خلاص كبرنا ومستقبلنا بدأ،
نفكنا من المراهقة دي ونركز في المستقبل.

- مستقبل وكبرنا؟!.. هو امتحان الفلسفة والمنطق
أثر عليك وللا إيه؟ والحلاوة دي هتوديها فين؟ تصدقي
اتأثرت!

- لأبتكلم جد مش بهزر!

- معاك حق ننشئ على عريس من أولها.. مش لَمْ نشوف النتيجة الأول؟.. باي العريية جت.

- باي باي.. على «الواتس» بقى.. وأشارت إليها، وانصرفت.

انتهت الامتحانات ومرَّ عيد الفطر.. دقت الساعة التاسعة مساءً، والجميع ينتظر العروسين في القاعة، الطاولات تجمع الأحاب والأقارب وتدور الأحاديث حول أخلاق العروسين، والعلاقة التي كانت بين والديهما، وهناء تجلس تنتظر في صمت يُخفي وراءه الحزن، ويظهر على وجهها السعادة العارمة فرحاً لابنها، وتتخيل لو أن زوجها معهم الآن، ويشاركهم فرحة زواج ابنه الوحيد، السنوات مرت وغيابه طال دون معرفة لسبب منذ خمسة عشر عامًا.. وتجلس رقية بين صديقتها بل من تعتبرهما أختيها «هايدي وحسنا»، وتتصيد حسناً أخطاءهم اللغوية كعادتها، وتجادلها رقية مزاحاً متظاهرة أنها الأفصح. وتحاول هايدي أن تُظهر خلاف ما بداخلها من ألم، ولكن أختها التي تشعر بها دون كلام تفهم أن هناك أمراً ما، حاولت أن تخرجها من حالتها بمزاحها:

- إيه يا «هدهد» هو أنتِ علشان مش درعية وكلامنا
عجيب عليك هتقلبي لنا الفرح مَيتَم وللا إيه؟.. حاولت
أن تُخفي من جديد، لكنّ دموعها كشفت ما تُسرّه:

- بصوا.. أنا عارفة إن ده مش وقته بس أنا لو ما
قولتش هيحصل لي حاجة، بصوا بصراحة كده...، وقبل
أن تبدأ حكايتها وقعت عيناها على باب القاعة ورأت
«خالدًا» يدخل منه وفي يده تشبك امرأة أربعينية وتشبهه
قليلاً!.. همست رقية: مش ده اللي اتبرع لي بالدم يوم ما
كنتِ معايا؟!
- أيوا!...

كانوا قديمًا يُخفون إعجابهم خشيةً أن يُظنَّ فيهم سوءًا،
أما الآن يتحدثون دون حياءٍ ولا حرجٍ تحت مسمى «الكراش»

محمد الباسم

من مقال: الكراش بمفهوم المتزمات

الفصل الخامس

نهضت هناء من مكانها وأسرعت تجاه الباب في حالة من السعادة، لا تصدق ما تراه، أهذه حقاً صديقتها مريم؟ وتذكرت أيام دبلوم المعلمات وعلاقتها التي كان زوجها وسفرها مع زوجها إلى الخليج سبباً في فراقهما، تعانقتا عناقاً يحمل شوق السنين، وترك خالد والدته ودخل القاعة الخاصة بالرجال.

والبنات يتابعن ما يحدث في حالة من العجب، ما العلاقة التي بين أم رقية وهذه المرأة، وما صلة القرابة بينها وبين خالد؟! أخرجتهما حسناء من تركيزهما بسؤالها:

- هو في إيه؟ .. مالكم؟

- مافيش .. ما علينا كملي يا هايدي إيه اللي مضايقتك ولو ما قولتيش هيحصل لك حاجة؟

- مافيش حاجة مش وقته بقي.

انتظرت رقية إلى أن انتهى الزفاف وانصرف الجميع،
وبعد عودتهم إلى المنزل تسللت إلى غرفة والدتها، وجلست
بجوارها على حافة السرير؛ كي تستفهم ما الأمر.

- ماما!

- نعم يا قلب ماما؟

- بقولك

- قولي

- في واحدة من المعازيم أول ما وصلت؛ قمتِ تستقبلها
استقبال زايد شوية عن باقي الناس، وبعدين قعدت
تتكلم معاكِ لحد ما الفرحة خلص، هي مين دي؟!
- ياااه يا رقية دي صاحبتني من أيام المدرسة.

- بس أنا أول مرة أشوفها وعمرك ما كلمتيني عنها!

- أصل مريم دي أول ما اتجوزت على طول جوزها
خدها وسافر السعودية، ويدوب لسه راجعين من أربع
سنين؛ عشان ابنهم يدخل الثانوية العامة في مصر!

- هو خالد يبقى ابنها؟.. تغيرت ملامح هناء، وسألتها
بنبرة عالية تختلف عن نبرتها الهادئة دائماً: وأنتِ تعرفي
خالد مين؟!!

- ده الي اتبرع لي بالدم لما كنت في المستشفى
- كمان اتبرع لك بالدم؟ ما شاء الله ما شاء الله، وإيه
كمان؟!!

- اهدي بس يا ماما.. ما أعرفهوش ولا حاجة والله،
هو بس زميل صاحبتني في آداب، ولما محمود ماردش على
التليفون؛ اضطرت تكلمه علشان فصيلة دمها مانفعتش..
استرجعت هدوءها، وربتت على كتف ابنتها: ربنا يحفظك
يا بنتي، ويرزقك ابن الحلال وأفرح بيك أنت كمان قبل
ما أموت.

- أطل الله عمرك، وتربي عيالي كمان.
- طب روحي نامي يا بتاعة اللغة العربية أنت وريحيني
من زнк، تعبانة أوي وعاوزة أنام.
- حاضر.. تُصبحين على خيرٍ يا أمّاه.
- قلبت وإسلاماه.. يللا يا بت من هنا.

جلست علّا أمام الحاسوب تترقب نتيجة الثانوية،
كتبت رقم جلوسها وطال انتظار تحميل الشبكة بسبب
الضغط على موقع النتيجة، وتمر الثواني عليها كالساعات،
وبعد ما يقرب من ثمان دقائق ظهرت نتيجةها؛ ابتلعت

ريقها وتحجّظت عيناها، ودلّكتها بسبّابتيها ونظرت إلى الشاشة من جديد «٩، ٨٧؟» ثم صاحت فرحاً بنجاحها على عكس المتوقع من الجميع، وبسطت ذراعيها وصارت تتغنى وترقص: يا ماما... أنا نجحت، نجحت، نجحت نجحت نجحت؛ نهضت عفاف من أمام المسلسل الهندي الذي كانت تتابعه، واحتضنت ابتها والزغاريد تعلو أصواتها، ولم تستمر إلا قليلاً، وعَمَّ الصمت، وسألتها متعجبة ساخرة: جبتي كام بقى يعني على الفرحة ده كله؟

٨٨٪- يعني هدخل كلية، يعني هدخل كلية.. رفعت عفاف حاجيها، وأضافت: تيجي مع الهبل دوبل.

- يللا نتصل بابا ونفرحه بقى، وتحوّل البيت إلى فرح شعبي على أنغام المهرجانات والرقص والطبل، وأصوات زجاجات المشروبات الغازية والعصائر.

تقعد رقية على سجادة غرفتها متربعة ومرتدية زي الصلاة أمام زوجة أخيها في جو من الهدوء والسكينة بعد صلاة العشاء ويدها مصحفها الذي أهدتها إياه «هايدي» تتلو منه وترتل، وليلى تتبّه إليها جيّداً، وتعُدّل لها الأخطاء التجويدية، ووعدتها رقية أن تحفظ القرآن وطلبت منها المساعدة باعتبارها حافظة للقرآن ومن خريجات جامعة

الأزهر الشريف، واعتادت أن تجلسا كل يوم بعد العشاء لترتيل الآيات ومدارسة أحكام التجويد.

أصبحت ليلي بمثابة الأخت الكبرى لرقية وليست مجرد زوجة لأخ؛ مما أسعد هناء وطمأن قلبها على ابنتها، خاصة بعد ما علمت أنها معرضة للموت في أي لحظة بسبب مرضها، وكانت تزيد من الألفة بينهما بالمعاملة الحسنة لزوج ابنتها واعتبارها المسؤولة عن البيت وعن رقية بصفة خاصة بعدها، وهي تعلم جيداً صفاء قلب ليلي وتربيتها الحسنة.

صمتت رقية ونظرت في الأرض وكأنها سرحت في أمر ما، ثم صوبت عينها نحو ليلي مبتسمةً وقالت:

- عارفة يا أبله ليلي القعدة دي فكرتني بإيه؟

- فكرتك بإيه يا ستي؟.. قولي قولي، أحب أنا حكاوي السهر دي بيتقال فيها كلام حلو أوي، قولي.. ضحكت من قولها وأردفت: زمان وأنا في تالته إعدادي كان في ولد كل يوم يفضل مستنيني قدام المدرسة ويفضل يبص لي وأنا أبص له.. وضعت ليلي كفها على خدّها، واتسعت ابتسامتها وقاطعتها:

- اعمممم وإيه كمان؟

- استني ما أنا هقول أهو بس اوعي تجيبي سيرة لما.

- لأ ما تخافيش .. كمل.

- المهم كُنَّا نفضل نبص لبعض كده ونضحك من بعيد
لحد ما محمود يهل بطلته وياخدني ويمشي، وفي مرة محمود
اتأخر ومعظم الناس مشيت، والدنيا هديت خالص؛ قام
قرب عندي وأنا مش عارفة يعني كده أبقى مبسوفة،
وللا أجري وللا أعمل إيه؟!

- وعمل إيه؟!

- ضحك لي ورمالي ورقة وجري، ولسه بفتح الورقة
لاقيت محمود وصل؛ رocht رمياها في الشنطة ووشي احمر
من الخجل.

- ومحمود عمل إيه؟!

- ما هو ما عرفش حتى ما خدش باله من الورقة ولا
بص في وشي.

- والورقة كان فيها إيه؟!

- كان مكتوب فيها بالنص: «أنا محمود وده رقمي»

- وبعدين؟

- وبعدين بقى بصرحة اتصلت بيه، وأول ما سمعت
صوته قفلت بسرعة، وفضلت مرعوبة ليكون حد سمعني
وللا شافني، وكنت خايفة يتصل وأنا قاعدة برا.

- أيوا يعني كل الي حكيتيه ده إيه وجه التشابه الي
يخليك تفتكره بالقعدة دي؟

- ما هو لو صبر القاتل على المقتول؛ ما كانش هيموت
قبل ميعاده برضو!

- طب قولي يا أم دم خفيف.

- المهم بصرحة كده بدأنا نتكلم في التليفون، وكل شوية
يبيع رسايل وكده.

- رسايل إيه بالضبط؟

- رسايل وخلاص بقى.. ماتكسفينيش!

- كملي يا مكسوفة بليلتك دي.

- المهم مرة رن وأنا كنت نسيت التليفون في البيت،
ومحمود رد عليه، وأول ما سمع صوته قال له: آسف
النمرة غلط! وأنا اليوم ده رجعت وأنا هموت من الخوف
ليكون اتصل وأنا برا، مسكت التليفون لاقيت رسالة
جديدة مقروءة أول مرة أشوفها.. وببص لاقيت محمود
بينده عليّ! حلووو أنا كده هدّبح! قلت: نعم وأنا بحاول

أمسك نفسي؛ عشان يمكن مثلاً شاف الرسالة بالغلط
مثلاً يعني؛ قال لي ادخلي اعملي مع ماما الغدا! كنت كل
ما أسمع همسة أفكره جيب السكينة وجاي يخلص علي!

- عمل إيه يعني في الآخر؟

- عمل إيه؟! محمود ده طلع ذكي جداً، هو طبعا شاف
الرسايل الي على التليفون وفهم الحكاية بس ما قالش
حاجة، وكم إن حتى ما لمّحليش إنه فهم حاجة، وخدني
وداني عند أبله «نعمه» بحجة إني هاخذ عندها درس
خصوصي؛ علشان العربي عندي ضايع، وهي عملت الباقي.

- عملت إيه؟! -

- كانت بتكروتنني في دروس المدرسة وتفضل تكلمني
عن الدين، وعن أمهات المؤمنين، وإيه الزي الي المفروض
البنات المسلمة تكون فيه وكده، ومن ساعتها ولا فيها
محمود ولا تليفون ولا غيره، والحمد لله لبست الحجاب
الواسع، وكانت بتحبّيني في اللغة العربية، وتكلمني عن
إنها مهمة ومن الدين؛ علشان كده صممت أدرس اللغة
العربية.. الشاهد بقى إنها كانت بتقعدني قصادها زي ما
أنت مقعداني كده.

- ما شاء الله ربنا يبارك فيها ويكتبه في ميزان حسناتها..
وأنت بتسألني عنها بقى وللا لأ؟

- بصراحة من سنة الثانوي سبتها وما شوفتهاش تاني.
- لأ، يا رقية لازم تسألني عليها دي كانت سبب في إنك تبقي ما شاء الله زي ما أنا شايقة كده.
- عندك حق، نبقي نستأذن من «حودا» ونروح نزورها سوا، ماشي؟
- ماشي.. قومي بقى يا رغبة؛ عشان بكرة أول يوم جامعة.
- يا الله!.. ده أنا نسيت خالص، عن إذك بقى ده أنا ما جهزتش حاجة.
- نهضت من مكانها ووضعت مصحفها في الحقيبة، وبدأت ترتب أغراضها استعداداً لليوم الأول في الفرقة الثانية.



التقت هايدي في الصباح في محطة «مترو» السادات، وركبتا القطار في إحدى العربتين المخصصتين للسيدات، ولا تزال هايدي في حالة نفسية سيئة متأثرة بابتعاد خالد عنها، والتغيرات التي حدثت لها، وينشغل تفكيرها في المتقدم لزواجها، وطلبت من رقية أن تظل معها لتحكي لها ما كانت تود حكايته من قبل ولم يسمح الوقت آنذاك، ولم يدخلها الجامعة وفضلتا أن يسيرا بالخارج.

- ها يا ستي أدينا بعدنا عن الجامعة أهو.. قولي ما
لك بقي؛ علشان حالتك كده مش مريحاني.

- بصي يا رقية.. طبعاً أنت لاحظتي إني فجأة كده
اختمرت واتغيرت عن الأول كثير.

- الحمد لله ربنا يثبتك ويكتبه في ميزان حسناتك.

- عارفة إيه اللي غيرني كده؟!

- يهدي من يشاء، ربنا أراد لك الهداية والله الحمد.

- الحمد لله وكل حاجة بس بصراحة ده كان سببه إني
كنت بحاول أكون البنات الملتزمة اللي على خلق زي ما
خالد عاوز مراته تكون!

- خالد مين؟!

- خالد اللي اتبرع لك بالدم.

- صحيح نسيت أقولك.. والدته طلعت صاحبة ماما
من أيام المدرسة؛ علشان كده جه فرح محمود، المهم كملي.

- من ساعة ما قابلته في الكلية السنة اللي فاتت
وأنا اتعلقت بيه، ولما كُنَّا في الرحلة وبنلعب سألوه عن
مواصفات فتاة أحلامه؛ قال أهم حاجة تكون ملتزمة.

- اممم

- عشان كده اتحولت كده وما بقتش بتعامل مع شباب ولا حتى أسلم، وفي آخر الترم الي فات مرة واحدة لاقيته بعد عني وما بقاش حتى يبص لي لو عدى جنبي في الكلية، وعرفت بعدين إنه قطع علاقته بالشلة كلها وما بقاش يتكلم مع بنات هو كمان حتى أنا!.. ده أثر عليّ أوي، ومخلي نفسي زفت لحد دلوقتي من ساعتها، مش عارفة أعمل إيه، وفوق ده كله متقدم لي عريس ومش بطيقه.

- مين؟!

- ابن عمي.. بس أنا بحب خالد، وبابا عاوز يجوزني بالعافية!.. كانت رقية تستمع لها بأذان مصغية، وتنقبه لكل حرفٍ تنطقه، وأجابتها بعد إنصات:

- والله صراحةً مش عارفة أقولك إيه، بس المفروض الالتزام ده يكون خالص لربنا مش عشان حد، وما دام هو الي بعد لوحده فربنا أكيد له حكمة في كده، كل الي أقدر أقوله إنك تستعيني بربنا وتستخيريه، وإن شاء الله هيقدم لك الخير.. ولو خالد ده من نصيبك؛ ربنا هيسر لك وهتجوزيه لو مهما حصل.. ولو ابن عمك الأفضل ليك تبقي ترضي بما كتبه الله لك وخلاص.

- تمام.. وأنت ادعي لي يكون من نصيبي، مش متخيلة نفسي أكون لحد غيره.

- ربنا يرزقك الخير حيث كان ويفرح قلبك ويجوزك الأصلاح فيهم.. وفي حاجة بقى يا هايدي؛ علشان نكون فاهمين، ما ينفعش يبقى في علاقة بين بنت وولد أصلاً، ولو الظروف حتمت التعامل أوي يعني؛ فيكون بحدود زي: إننا نكون مجبرين على مشروع في الكلية أو حاجة، وبعدها خلاص الموضوع ينتهي، ولا نتعرف بقى وناخد أرقام بعض ولا الحاجات دي، ونريح نفسنا ونغض البصر

من البداية، ربنا قال: ﴿قُلْ لِلْمُؤْمِنِينَ يَغُضُّوا مِنْ أَبْصَارِهِمْ وَيَحْفَظُوا فُرُوجَهُمْ ۚ ذَٰلِكَ أَزْكَىٰ لَهُمْ أِنَّ اللَّهَ خَيْرٌ بِمَا يَصْنَعُونَ﴾.. «وَقُلْ لِلْمُؤْمِنَاتِ يَغْضُضْنَ مِنْ أَبْصَارِهِنَّ وَيَحْفَظْنَ فُرُوجَهُنَّ وَلَا يُبْدِينَ زِينَتَهُنَّ إِلَّا مَا ظَهَرَ مِنْهَا ۚ وَلْيَضْرِبْنَ بِخُمُرِهِنَّ عَلَىٰ خُيُوفِهِنَّ ۚ وَلَا يُبْدِينَ زِينَتَهُنَّ إِلَّا لِبُعُولَتِهِنَّ» (٢)

وغض البصر ده هيقطع طرق كثير لمصايب.

- ماشي يا بنتي بس أنا بحبه ومش ببص - سوري
يعني - بشهوة أو أي تفكير مش محترم!

- يا حبيتي الشيطان مش هيسيبكم من غير ما يطور الموضوع، «لا تتبعوا خطوات الشيطان»؛ يعني الشيطان بيخطط لنا مراحل من أول البصة لحد أعوذ بالله الوقوع

في الزنا، ويمكن ربنا يعاقبك وما يجعلوش من نصيبك؛
فهيفضل قلبك متعلق بيه حتى بعد الزواج من غيره،
ومن أول مشكلة صغيرة هترجعي تفتكري في المشاعر
القديمة... فاهمة؟!!

- آه فهمت.

- بس صحيح ده خالد أصغر منك بسنة!

- مين قال كده؟.. أنا آه عايذة السنة بس أنا قدكم؛
لأني مش متأخرة وكان كنت خاص، وحتى لو أصغر
عادي، سيدنا محمد عليه الصلاة والسلام اتجوز السيدة
خديجة وهي أكبر منه.

- عليه الصلاة والسلام.. أنتِ بس توكلي على الله.. ما
تيجي تحضري معايا محاضرة.

- ماشي، أنا برضو مش عاوزة أروح الكلية خالص،
وأوعدك إني هصلي استخارة، وإن شاء الله خالد يبقى من نصيبي.

- إن شاء الله يكون من نصيبك إذا كان الأصلح ليك
ماتعلقش قلبك وخلص.

- طب بالراحة طيب ماتزوقيش يا حاجة.

- أيوا كده اطمَنت إنك بقيتي بعقلك ورجعتي
طبيعية.. يللا يا ماما خلىنا نلحق نحضر.

كل الهزائم قابلة للترميم، وكل الفراغات قابلة للملء، إلا ما
يفعله الغدرُ بالقلوب؛ فلا تستهينوا بطعناتٍ تقودها يدٌ
كانت حبيبة - ذات يوم - إلى سويداء القلب.

عبد الرحمن عبد المُرْضي

جلست مارفيللا وُعلا في أحد مدرجات كلية التجارة بجامعة حلوان قبل دخول الدكتور، أخرجت مارفيللا هاتفها، والتقطت بعض الصور مع صديقتها في يومهما الأول بالجامعة، وأعربت لها عن سعادتها؛ لأنهما التحقتا بالكلية نفسها كما تعاهدتا من قبل أن تظلا صديقتين إلى الأبد، وجددتا عهدهما.

وبجوار عُلا قعد شابٌ مفتول العضلات ذو بشرة بيضاء وشعر بني، ويميل لون عينيه إلى الأخضر، مدَّ يده إلى جانب هاتف عُلا الذي وضعته أمامها على المقعد، وأناره وهو ينظر إلى وجهها الذي احمرَّ غضبًا مما يحدث، وتحدث بنبرة تدل على برود أعصابه ولا مبالاته لشعورها:

- مش حلوة خالص على فكرة الصورة دي، وقال وهو يتظاهر بالدهشة: إيه ده؟! دي صورتك.. بس تصدقي الحقيقة أجمل كثير!

رفعت حاجبيها وجذبت منه هاتفها بعنف وهي تثور: أنت عيب يالا؟.. أنت إزاي أصلًا تتجرأ وتمسك تليفوني وتفتحه كده؟

- شكلك حلو على فكرة وأنت متعصبه.. محتاجة صورة.

- سيك منه يا عُلا ده شكله متخلف عقليًا.. - قالتها مارفيللا وهي تمسك بها وتحاول أن تهدئ من عصبيتها.

- متخلف على نفسه مش علينا.. ابتسم لهما وكأنهما يحدثان أنفسهما، ومرَّر أصابعه بين خصلات شعره للخلف، ولم يُعَقِّبْ على كلامهما إلا بجملة واحدة: أمين رأفت من المعادي، ونهض من مكانه على الفور بابتسامة بلهاء.

اعتذر الدكتور عن المحاضرة، وكانت فرصة لهما أن تتجولا في الجامعة وتتعرفا على معالمها، خرجتا من المدرج ولم تتوقفا عن الضحك مما حدث، وفي طريقهما وجدتا مجموعة من الشباب والبنات يتحلقون حول شاب ذي صوتٍ رائعٍ بالقرب من مدرج «١٨»، ويُطِرُّون آذانهم بغناؤه، أعجبهما الصوت فاقتربتا لرؤيته؛ فكان هو نفسه أمين صاحب الموقف!

جذبت مارفيللا صديقتها لتصرفا وتستكملا جولتهما، فلم تستجب لها عُلا، وأشارت بيدها لتتظر، وظلَّت تنظر إليه مستمتعةً بما يغني، وهو يتجاهلها متعمداً، ثم انتقل إلى أغنية أخرى، كانت للراحل «عبدالحليم حافظ» وكأنه يعلم أنها من عاشقيه رغم هوسها بالمهرجانات كجيلها، ووجَّه نظره إليها وغنَّى:

كان يوم حبك أجمل صدفة.. لِمَا قابلتك يومها صدفة..
قال لي جمالك أجمل صدفة

صدفة قابلتك ولا على بالي.. شوفت ساعتها كل الدنيا..
صدفة لاقيت اتغير حالي.. واتبدلت لو حدي في ثانية...
نظرت إلى الأرض وانتابها الخجل وانصرفت مسرعةً مع
مارفيللا.

- ما لك يا بت اتحولت كده ليه؟

- مافيش.. مالي؟! ما أنا زي ما أنا أهو - قالتها ويبدو
على وجهها الخجل -

- هو مش إحنا اتفقنا إننا هنعقل ونكبر في الجامعة
ونبطل شقط؟ وللا هو كان كلام عيال؟

- أنت شايفاني روحت قعدت معاه؟!.. ما أنا سبته
ومشيت معاك أهو، يللا خيلنا نشوف هنعمل إيه وفكك
من اللي في دماغك ده.

- لما نشوف آخرتها مع العاشقة الوهانة.. يللا.

اتفقت حسناء وأحمد أن يلتقيا بعيداً عن الجامعة حتى
لا يراهما أحدهُ حفاظاً على صورتها، وكان هذا اللقاء مختلفاً
عن أي لقاء سابق؛ فهذا اللقاء الأول بعد فترة طويلة
من الحديث المتواصل هاتفيًا، وكتائياً عن طريق تطبيقات
التواصل، فلم يمر يومٌ منذ التقيا في العام الماضي إلى بداية

هذا العام إلا واطمأن عليها، وقد حكت له عن نفسها أشياء كثيرة، وتعمّقت في حديثها وباحت له بأسرار خطيرة، ومواقف ألتها من بعض شباب الدفعة أنفسهم؛ وأحمد ينصت لها وكان يستمع بأذان مصغية، ويغمره شعورٌ يختلط فيه التعاطف مع الإعجاب، واستشعر أنها في حاجة إلى من يقف بجانبها في تلك الأزمة!

دقت الساعة الواحدة ظهرًا وهو ينتظر فوق «كوبري الجامعة» كما اتفقا، ولكنها لم تأتِ حتى بعد نصف ساعة من انتظاره، ولا ترد على الهاتف وتكتفي بإلغاء اتصاله؛ انتابه شعور القلق والشك في الوقت نفسه، وقرر أن يُلقنها درسًا عقَبَ وصولها.. حاول أن يتصل بها للمرة الأخيرة، وبعدها سينصرف على الفور، في هذه المرة ردّت عليه وأبلغته بأن أمامها فقط دقيقتين وتصل، ولم تعطِ له فرصة كي يتحدث: «أنا عارفة إنك متعصب وهتقتلني أول ما تشوفني.. اهدّ بس ولما آجي هفهمك»، ونزلت أمامه من شاحنة نقل عامة فور إغلاقها المكاملة، ونظرت إليه بلطف وهي تعتذر بنبرة هادئة متقطعة:

- صلّ على النبي وخليك مبتسم كده لحد ما آخذ نفسي.. استمرّ على ابتسامته وبادلها النبرة نفسها:

- خير؟.. إيه أخرك كده؟ قلقيتني عليك!

- وأنا جاية قابلت رقية وهايدي داخلين الجامعة،
فيدوب سلمت وخلعت منهم بهدوء من غير ما أكذب
والحمد لله وجيت، عشان كده كنت بكنسل.

- من غير ما تكذبي إزاي؟!.. قولت لهم إيه يعني؟

- لأ ماتخافش ماقلتلهمش إني جاية أقابلك يعني، أنا بس
قُلت لهم إني رايحة مشوار وبعدين هروّح، وهما أصلاً كان
شكلهم عاوزين يطرقوني؛ فحتى ماسألوش رايحة فين.

- آاااه.. بس مين رقية وهايدي دول؟

- ها؟ مين؟!.. صاحباتي، المهم ما علينا.. وحشتني.

- أنتِ أكثر.. ثم التفتت إليه بعدما كانا يتحدثان
ووجهاهما متجهان نحو مياه النيل (لأنهما يعتقدان أن
تبادل النظرات لا يجوز!)، وأعطته علبة صغيرة.

- إيه دي؟!..

- دي هدية صغيرة كده عجبتي فاشتريتها لك.. نظر
إليها نظرة عابرة؛ وسرّ قلبه وهو يفتح العلبة، ووجد
بداخلها ساعة يد زرقاء اللون ومسبحة خشبية مزركشة
باللون نفسه، ثم تنهد وهو يردد:

- الله.. الله.. جامدة جداً، عرفتِ منين إني بحب اللون

ده؟



- عرفت وخلص

- جزاك الله خيرًا

- جزائي وإياك.

أسرعت رقية إلى محاضرة «العروض»^(٣) التي شوقتها «حسناء» إلى حضورها مصاحبةً هايدي، وصلتا إلى المدرج بعد دخول الدكتور بقليل ولكن لم تستوعبا تلك الأصوات العجيبة داخل المدرج؛ أتحوّل المدرج إلى غرفة موسيقى؟! ..
سمح لهما أستاذ المادة بالدخول، واستأنف حديثه عن كيفية تقطيع الأبيات الشعرية بشكل عروضي:

- نعود لحديثنا عن التقطيع العروضي، ينقسم البيت الشعري إلى شطرين، أو جزئين، كل منهما ينقسم إلى عدة مقاطع تسمى تفعيلات؛ فهيّا نطبق عمليًا بتقطيع الأبيات التالية:

يا أيها الشّادي المَعْرَدُ في الضّحى

أهُواكَ إنّ تُشَدَّ وإنّ لم تُشَدِّ

ويكون على الشكل التالي بعد تقطيعه:

مُتَفَاعِلُنْ مُتَفَاعِلُنْ مُتَفَاعِلُنْ

مُتَفَاعِلُنْ مُتَفَاعِلُنْ مُتَفَاعِلُنْ ...

٣ - علم العروض، يدرس الشعر العربي من حيث الوزن والموسيقى



وكان يُنشد أثناء تقطيعه ويَطْرُق بيده على المنصة التي أمامه، وهُم يُعيدون وراءه ذاك الطَّرْق والتغني بالشعر؛ غيرَ هذا الجو الرائع من حالة هايدي الحزينة، وزاد حبَّ اللغة العربية لدى الدرعية الصغيرة الأخرى، وأعربت هايدي عن إعجابها بعدما غادر الدكتور المدرج.

- إيه ده يا بنتي أنا كنت فاكرة إن دار علوم دي الدكاترة كلهم مكشرين ويتكلموا بجعلصة وحاجة عك كده، المادة دي جامدة جدًّا، والدكتور ده روش طحن، ده أنا هاجي أحضر معاك على طول.

- أولاً- اسمها دار العلوم مش دار علوم يا بتاعة آداب وتاريخ الفراعنة أنتِ (قالتها وهي تُشير إليها بسبابتها وترفع أحد حاجبيها مازحة).. ثانيًا- صراحةً أنا كمان أول مرة في حياتي أحب الشعر كده، مش زي الشعر بتاع أولى اللي كنت بحفظه ومش فاهمة أنا بقول إيه، العروض ده لذيذ ورايق.. تيجي نحضر المحاضرة اللي بعدها وللا نخرج؟

- لآ، استني نحضر بقى أدام دار علوم.. قصدي «دار العلوم» طلعت حلوة كده، ده أنا أفكر أحول بقى.

- لآ يا ماما خليك في آداب إحنا عددنا كبير والدنيا حر مش ناقصة، بس بس الدكتور دخلت.

كانت المحاضرة التالية في مادة (أحكام الأسرة)، وكان موضوعها عن الخطبة والزواج؛ انتبهت الفتاتان جيداً للحديث، نظرت الدكتورة إلى ملابس معظم الطالبات، وبدأت تتحدث عن نفسها وقتما كانت في هذه السن، وقصّت لهم قصة التزامها، بعدما كانت لا ترتدي الحجاب من الأساس، وكيف كان لأساتذة كليتها هذه الأثر في ذلك.

- الأهم من الشكل الخارجي هو الباطن، ما ينفعش أكون مسلمة ولبسي واسع وما شاء الله شيخة ماشية، لكن مش محافظة على عباداتي، وفي جيلكم ده فاكرين الالتزام مظهر، والعلم بالدين للأسف قليل جداً، وتلاقي البنت تكلم الولد عادي جداً، وتقول إحنا مش بتتعدى حدود التعامل!.. لأيا بنتي الحكاية مش كده خالص، من الأساس مافيش حاجة اسمها تعامل ولا حدود تعامل، القرآن يقول: «ولا متخذي أخدان.. ولا متخذات أخدان»^(٤) وخدن يعني صاحب! لكن لو الظروف حتمت التعامل هنا يختلف الأمر، وتيجي تقول لي طب يا دكتورة هو أنا إزاي هتجوزه من غير ما نعرف بعض ونتكلم؟.. يا ستي اعرفيه لما يخطبك، وهي دي الحكمة من الخطبة إن كل واحد يعرف الثاني، لكن بحدود هنفصلها بعدين.

٤ - ذكرت الآيتان في سورتي (النساء: آية ٢٥، والمائدة: آية ٥)



ومن الآخر هو مش هيرضى يتجوزك وأنت بتتكلمي
مع كل الزملاء كأنهم إخوانك، نخوته مش هتسمح له
بكد.. سيبكم بقى من إنه يقولك إنه متفتح وواثق فيك
والكلام ده، هو برضو راجل.. وما فيش راجل يسمح
لنفسه إن جوهرته يشوفها غيره، إحنا نصدق مع الله، وهو
يسر لنا كل الأمور، وعسى أن تكرهوا شيئاً وهو خير
لكم...

أحست هايدي أن الكلام خرج من فم الدكتورة إلى
قلبها، وكأنها رسالة من الله لها؛ وقررت أن تتعلم ما يجب
أن تكون عليه الفتاة المسلمة، ودعت الله سرّاً أن يصرف
عنها كل ما يشغلها عن عبادته حتى ولو كان «خالد»
الذي تعلق قلبها به.

- مش واخدة بالك من حاجة يا رقية؟

- إيه؟!.. مش واخدة بالي لأ.

- من ساعتين كانت حالتني النفسية زي الزفت، وجيت
المحاضرة الي قبل دي نسّنتني حالي من الجوّ والتطيل الي
كان فيها، وبعدها كلام الدكتورة الي كأنه رسالة من ربنا،
وبياكد كلامك.

- سبحان الله!

- بحبك جدّاً يا بت يا رقية.



- أَحَبَّكَ اللهُ يَا حَبِيبَتِي وَاللهُ أَنَا أَكْثَرُ، رَبَّنَا يَدِيمُكَ لِي.

- بُصِّي بَقَى.. أَنَا هَشِيلُ مَوْضُوعِ «خَالِد» دَه مِنْ دِمَاغِي
نَهَائِي، وَهَصَلِي النِّهَارْدَه صَلَاةُ اسْتِخَارَةٍ، وَلَوْ رَبَّنَا شَاءَ إِنِّي
أَتَجَوُزُ «عَادِل» ابْنِ عَمِّي هَرَضِي بَدَه وَمَشْ هَتَرْدَد.

اِحْتَضَنْتَهَا رَقِيَّةً وَهِيَ تُعْرَبُ عَنْ سَعَادَتِهَا قَائِلَةً: رَبَّنَا
يَحْفَظُكَ وَيُثَبِّتُكَ يَا قَلْبِي، وَإِنْ شَاءَ اللهُ رَبَّنَا هَيْرِزْقُكَ الْخَيْرِ..
يَلَا نَمَشِي بَقَى؛ عَلْشَانْ كَدَه هِيْفَهْمُونَا غَلَطَ بِالْأَحْضَانِ
دِي.

- مَا يَفْهَمُوا إِلَيَّ يَفْهَمُوهُ بَقَى.. هَتَرَوَّحِي وَلَلَا هَتَعْمَلِي
إِيَّه؟

- آه هَرَوَّح.. صِرَاحَةً مَشْ قَادِرَةٌ، وَالْمَحَاضِرَةُ إِلَيَّ جَائِيَّةٌ
أَدَبُ وَأَنَا مَشْ عَاوِزَةٌ أَهْدِلُ حَالَةَ الْهَبْلِ الشَّعُورِي إِلَيَّ أَنَا
فِيهَا دِي.

- طَبْ رَوَّحِي لَوْحِدِكَ بَقَى.. أَنَا هَرَوَّحُ السَّيْدَةِ عِنْدَ
بَابَا أَجِيبْ مِنْهُ مَصْرُوفَ الشَّهْرِ، وَبَعْدِينَ أَرْجِعْ الْبَيْتَ عِنْدَ
سَتِي.

- طَبْ مَا أَنْتِ كَدَه فِي طَرِيقِ «الْمَتْرُو» يَعْنِي هَنَمَشِي
سَوَا.

- لآ، أنا بصراحة مش عاوزة أركب «مترو» أنا هروح
من النيل وبعدين أركب «مترو» السيدة وأروح.. ما تيجي
معيا أنتِ وبعدين ابقى اركبي اتجاه المرج.

- مش عارفة!

- بطلي رخامة وتعالى، وأهو هنعدي من كوبري الجامعة
ونشوف النيل ونشم هوا.

- اممم.. طيب.. ماشي.. نعمل إيه بقى بتتنا برضو.

خرجتا من باب الجامعة الرئيس، وركبتا سيارة من أمام
باب الجامعة وانطلقتا.. وعاد أحمد وحسناء إلى «كوبري
الجامعة» بعدما خرجا من «الأوتوبيس النهري» الذي تقع
مرساه تحت الكوبري مباشرة...



يوسوس الشيطان في صدورنا، وتصل وسوسته إلى قلوبنا
مباشرةً؛ فنتبع خطواته واحدة تلو الأخرى دون تمريرها
على العقل.

محمد الباسم



الفصل السادس

طرقت رقية باب شقتهم وهي تدندن بيت شعرٍ
بالتقطيع العروضي الذي تعلمته وتقول:

بُحور الشُّعْرِ وإِفْرِهَا جَمِيلٌ ... مُفَاعَلَتُنْ مُفَاعَلَتُنْ فَعُولُ

سَلُو قُلُوبِي / عَدَاةَ سَلَا / وَتَابَا ... لَعَلَّ عَدْلُ / جَمَالٍ لَهُوَ / عِتَابًا^(٥).

مُفَاعَلَتُنْ مُفَاعَلَتُنْ فَعُولُ ...

- بس بس إيه اللي أنتِ فيه ده عندنا ضيوف - قاطعتها
ليلى وهي تفتح الباب -

- ضيوف؟! .. مين؟

- طنط مريم صاحبة ماما

- أم خالد؟



- خالد مين يا بت؟!.. مالِك مش على بعضك كده
ليه؟!

- ده عقبال عندك تأثير العُرُوض.

- آآآآآ.. طب خُشِّي ما تكسفيناش.

دخلت غرفة الجلوس مصاحبة ليلي، وصافحت مريم
وجلست بجوارها:

- أهلاً وسهلاً يا خالتو.. أنا برضو بقول هو البيت
منور زيادة النهارده، أتاري حضرَتِك منورانا.

- يا سلام! بتِّك أونطجية يا هناء.. مش طالعالك
خالص.

- لأ.. دي رقية الي في قلبها على لسانها.. بس من ساعة
ما دخلت الكلية وهي بقى لسانها بينقط...

- بينقط إيه يا ماما؟!

- بينقط غسل يا حبيتي.

- كنت بحسب.

- ربنا يحفظها لك يا هناء.. ما شاء الله.. وأنتِ بتدرسي
في إيه بقى يا رقية.

- في كلية دار العلوم - القاهرة



- ربنا يوفِّقْكَ يا حبييتي .. خالد ابني برضو في جامعة القاهرة.

تذكرت كلام «هايدي» بمجرد سماع اسم «خالد»، وصمتت حتى لا يَزِلَّ لسانُها بأيِّ شيء، ثم استأنفت:

- المهم حضرتك عاملة إيه يا خالتو؟.. ماما قالت لي إنكم كنتوا أصحاب أوي من أيام الدبلوم.

- آه يا حبييتي وجيران كمان.

- ربنا يبارك في حضرتك.. ودقّ جرس الباب أثناء الحديث، نهضت ليل، وقبل أن تتحرك لتفتح؛ قامت مريم لتودعهن:

- ده شكله خالد.. عن إذنكم بقى يدوب ألحق أروّح.

- تروحي فين؟.. الأكل جهز ماينفعش تمشي، لازم تتغدوا معانا.

- ربنا يعزك يا حبييتي.. مش هينفع والله، مرة تانية معلش.

خرجت هناء معها لتودعها، وفتحت الباب فوجدت «خالدًا» واقفًا أمامه وعيناه في الأرض، ربت على صدره وأومأ برأسه مشيرًا إلى هناء: «سلام عليكم.. إزي حضرتك يا خالة؟».. وأصرّت على الذهاب مع ابنها مودعة صديقتها،



ووعدها أن تُكرر الزيارة مع زوجها في وجود محمود قريباً، وظلّت رقية بغرفة الاستقبال التي يطل بابها على باب الشقة، وتجلس بأحد أركان الغرفة حتى لا يراها.

الجميع نيام وأحمد وحده في غرفته يستلقي على سريريه ويشعر بالفتور والأرق ويده تمسك بهاتفه، والشياطين تُحيطه من كل جهة، وهو في حرب معها، كلما تغلب على أحدهم وقف أمامه من هو أقوى وأغلظ؛ حتى هُزم ووقع في ذنب، وعقبه غمره الندم واستحقار النفس، وكاد يبكي من شدة ألمه النفسي، ومن محاولاته الفاشلة المستمرة في الإقلاع عن هذا.

لم ينتظر كثيراً بعد هذا الندم، وهروا إلى دورة المياه واغتسل وتوضأ، وشرع في الصلاة توبةً إلى ربه وطلباً لمغفرته، وظلّ يستغفر ويطلب العون من ربه إلى أن سمع المؤذن يُنادي: «الصلاة خيرٌ من النوم»؛ ابتسم وشرح صدره، وهمّ مُسرّعاً إلى المسجد كي يغتنم ركعتين بالدنيا وما فيها.

أقيمت الصلاة، وكبر الإمام تكبيرة الإحرام، وكان أحمد يقف بالصف الأول خلف الإمام تماماً، وتلا الإمام في الركعة الأولى قول الله تعالى:



﴿وَالَّذِينَ إِذَا فَعَلُوا فَاحِشَةً أَوْ ظَلَمُوا أَنْفُسَهُمْ ذَكَرُوا اللَّهَ فَاسْتَغْفَرُوا
لذُنُوبِهِمْ وَمَنْ يَغْفِرِ الذُّنُوبَ إِلَّا اللَّهُ وَلَمْ يُصِرُّوا عَلَى مَا فَعَلُوا وَهُمْ يَعْلَمُونَ أُولَٰئِكَ
جَزَاءُ وَهُمْ مَغْفِرَةٌ مِنْ رَبِّهِمْ وَجَنَّاتُ تَجْرِي مِنْ تَحْتِهَا الْأَنْهَارُ خَالِدِينَ فِيهَا وَنِعْمَ أَجْرُ
الْعَامِلِينَ﴾ (٦٦)

اقشعرَّ جسده وذرفت عيناه دمعًا، وخشع قلبه لهذا،
وجلس يستغفر الله بعد الانتهاء من الصلاة، ثم قام
وأمسك بمصحف وظلَّ يقرأ حتى أشرقت الشمس؛ قام
وصلى ركعتين، وعاد إلى بيته مُسرَّعًا، ونام وقلبه يشعر
بالاطمئنان.

يجلس والد هايدي السيد «عبدالله» مع ابن أخيه
«عادل»، ودخان السجائر يملؤ الغرفة، ليتفقا على زواجه
من هايدي، سواء أَرْضِيَتْ بذلك أو رفضت.

- بص يا ابني أنتَ مش غريب وفاهم الظروف ماشية
إزاي، ومش محتاج أقولك إن «هدى» عنيدة ودماغها
أنشف من الحديد، ولازم تمشي الي في دماغها، لكن في
الأول والآخر صغيرة ومش عارفة مصلحتها فين، وأنا



مش هلاقي أحسن منك يصون بتتي...، قاطعه عادل بصوت يملؤه الشغف:

- أنت عارف يا عمي إني بحبها وهي مش مدياني وش، وبتعتبرني أقل منها في المستوى؛ عشان ماكملتش تعليم، وبصراحة مش متخيل إني أتجوز غيرها، ومستعد أعمل أي حاجة؛ عشان ترضي بي، لكن برضو محتاجك تساعدني أفنعها، وماعنديش أي مشكلة إنها تكمل دراستها بعد الجواز.

- ماتقلقش هي إن شاء الله ربنا يهديها وتسمع الكلام، بس أنت دورك تحببها فيك: يعني حسسها بالاهتمام، ومش محتاج أشرح لك تعمل ده إزاي، وأهي فاضلها ستين وتخلص جامعة، أهو تكون جهّزت حالك، وبعدين نفاتحها في الموضوع تاني.

- ستين إيه بس؟!.. أنا جاهز أتجوز من الصبح وأنت عارف كده، ومش ممانع إنها تيجي تكمل تعليمها بعد الجواز.

- هو أنت كمان عاوزها تتجوز في البلد؟! ده أنت كده كأنك بتقولها ارفضيني من قبل ما تعرض عليها الجواز، وهي كده كده مش عاوزة، وما تصدّق تلاقي حجة.

- أو مال أتجوز فين؟!.. شقتي وجاهزة ومش ناقص غير العروسة.

- على كل حال نبقى نتكلم في الموضوع ده بعدين مش وقته.

رن هاتف عبدالله وكانت هايدي مَن تتصل، أمسك هاتفه وردّ:

- ألو.. إزيك يا حبيتي؟.. وجدتك عاملة إيه؟

- الحمد لله يا بابا كويسين.. أنت أخبارك إيه؟

- الحمد لله زي الفل أهو.

- كنت عاوزه أقول لك حاجة.

- خير؟!.. محتاجة حاجة؟

- لأ، أنا بس كنت بكلمك عشان أقولك إني صليت استخارة عشان موضوع جوازي من عادل!

- اعمممم.. يا رب خير.

- خير إن شاء الله.. أنا موافقة! وهعدّي عليكم بكرة إن شاء الله.

استعجب وصاح وهو ينظر إلى ابن أخيه: «كفارة يا عم.. رضيت عنك ووافقت تتجوزك!».. تجحّظت عيناه، وانتفض من مكانه يقبل رأس عمه، وهو لا يصدق أذانه.



بعد أسبوع دخلت هايدي كلية دار العلوم مع صديقتها رقية لتحضر محاضرة العروض معها كما وعدتها، وفي طريقهما إلى القاعة التقتا حسناءً بالقرب منهما، عانقتها رقية بحفاوة وكأنها لم ترها منذ عام كما تفعلان كل يوم؛ دلالةً على قوة المحبة بينهما، لكن هايدي تظاهرت بالحب ونظرت إليها نظرة توشي بأن هناك أمرًا ما، لم يكن هذا أثر الانطباع الأول الذي كاد أن يتغير مع الوقت، بل أمر آخر لما تُعرب عنه بعد!

ارتبكت حسناء وأدارت وجهها نحو القاعة ووضعت يدها على كتف رقية، وجذبتها مازحةً وتقدمتا عن «هايدي» نحو القاعة، ثم توقفت فجأةً واستأذنت منهما، وأخبرتهما أنها ستحضر في مدرج آخر حيث تنتظرها صديقة أخرى؛ تعجبت رقية من هذا الموقف غير المألوف، والتفتت إلى هايدي متسائلة:

- هو في إيه؟! .. ما لك أنتِ وهي كده مش طبيعيين
ليه النهارده؟ أنتِ سلمتي من تحت ضرسك، وهي واضح
إنها مش عاوزة تحضر معاكِ وجريت!

- مافيش حاجة يا رقية، عادي هو إحنا من إمتى
وإحنا بنقبل بعض أصلًا؟!!

- هو أنتِ لسه شايلة منها من أول مقابلة؟

- ممكن!

- ممكن إيه بس؟!

- يا ستي أنتِ تابعة نفسك ليه؟ يللا نحضر المحاضرة
و خلاص .

- لآ، أنا لازم أفهم، مش موضوع الانطباع الأول ده، في
حاجة تاني، إيه؟!

أدارت هايدي وجهها وهي تتأفف مُجِيبَةً: بُصي يا رقية
تعالِي نحضر دلوقتي وبعدين نبقى نشوف المواضيع دي،
وأقول لك عَمَلْتِ إيه في موضوع الجواز كمان.
- طيّب.. لما أشوف.

خرجت عُلا من كليتها متجهةً إلى أحد المحال لتشتري
مشروباً يُرطّب جوفها، ولتغيرَ من حالتِي الأرق والوحدة
اللتين تُسيطران عليها في غياب صديقتها «مارفيللا» في هذا
اليوم، فتحت إحدى الثلاث وأخرجت عبوة عصير
مثلجة، وانتقلت إلى المحاسب (الكاشير) وأخرجت النقود
لتدفع ثمنها؛ وجدت يدًا تُزيح يدها.. «عليّ أنا دي»..
التفت فوجدته أمين!

- متشكرة أنا هدفع.



- إحنّا لِسّه هتتناقش؟.. خلاص دفعت.
- ميرسي .. - قالتها ورأسها منحنيًا حياءَ-
- أنتِ لِسّه زعلانة من الموقف إياه؟.. قالت وهي ترفع رأسها وتتسع شفتها سعادةً، وتوجّه عينيها نحوه:
لأ خلاص.. اللي فات مات.
- يعني خلاص؟.. مش زعلانة؟
- لأ خلاص عادي.
- أنتِ اسمك إيه؟
- عُلا.. أنتِ قُلت لي اسمك إيه؟
- أمين .. أأااا ميين.
- تشرفنا يا أأاا ميين.
- بس على فكرة برضو شكلك حلو أوي وأنتِ متفرقة.
- رفعت حاجبيها تعجبًا مُحْدَقَةً فيه وهي تهز رأسها دون أن تنطق، ثم استأنفت حديثها: بس على فكرة إيدي ثقيلة كمان، ومايغُرْكَش عضلاتك دي!
- ده أنا أخاف بقى!

- أيوا.. بس على فكرة صوتك حلو.

- عجبك؟

- يعني هو مش حلو أوي يعني.. بس عجبني، وسارا
يتعرفان:

- كلميني بقى عن نفسك: بتحبي إيه، بتكرهي إيه،
يعني كل حاجة عنك

- إممم، ده أنت هتصاحبني بقى!

- ده لو مش هيضايقك يعني.. (يضايقني مين؟.. ده أنا
ما صدقت) قالتها في نفسها، ثم أردفت:

- لأ عادي مافيش مشكلة.. أنا اسمي علا عماد، ١٧
سنة وشوية، بابا مهندس اتصالات وشغال برا مصر،
وبحب عبد الحليم، وأغاني عبد الحليم...

لم تنتظر حسناء واتصلت بأحمد كي يقابلها على الفور؛
لتخبره بأمرٍ مهمٍ جدًّا، ربما يغير علاقتها تمامًا، أسرع
إلى باب الجامعة الرئيس لتنتظره هناك، هرول هو إليها،
وهو لا يعلم ماذا تريد، ويتمنى أن يكون خيرًا، ركبا سيارة
متجهة إلى مدينة الهرم حيث تسكن بالقرب من هناك.

- في إيه؟ جايباني على ملا وشي كده ليه؟
 - عاوزة أقول لك على حاجة مهمة.
 - خير؟ في إيه؟!
 - ممكن تكون دي آخر مرة أقابلك أصلاً؟
 - ليه؟!
 - بُص.. أنا كان في واحد من جيراننا خاطبني، وفسخنا
 من كم شهر يعني تقريبا أول ما بدأت أكلّمك كده.
 - يعني سبته ليه؟
 - هو إيه اللي سبته ليه؟ مش بحبه!
 - وبعدين؟
 - صراحة أنا اتلككت؛ عشان كان في مشكلة على
 الشبكة، وما صدّقت وفسخت معاه، وكمّان بابا ماكانش
 عاجبه اللي هما عاوزينه.
 - آه.. إيه المشكلة دلوقت؟
 - المشكلة إنه وافق على اللي إحنا كُنّا عاوزينه، وبابا
 موافق عليه جدّاً، ومش عارفة أخلع منه إزاي؟!
 - طب والعمل؟!! أنا أبويا مش موافق خالص إني
 أخطب من دلوقت.. هنعمل إيه؟!

- مش عارفة!.. أنا غصب عني لازم أوافق دلوقتي،
غصب عني مش عارفة أعمل إيه!
- طب وأنا؟!

- مش عارفة بقي.. وبصراحة إننا نتقابل كده حرام
أصلاً.

- حرام أصلاً؟!.. ده أنت تقريباً كنت بتقابل كل الدفعة،
وقلت ده بعضمة لسانك.

- أعمل إيه يعني أنا دلوقتي يا أحمد يعني؟.. مافيش
قدامي حل غير كده.

برزت عروق جبهته وتَحَطَّطَ عيناه مُحَدِّقًا فيها، وهو
يطلب من السائق أن يتوقف كي ينزل، وتركها وهو
يقول: براحتك.. أنت حُرَّة.. وربنا يوفقك في حياتك.

بعدما انتهت المحاضرة، أَصَرَّتْ رقية ألا تحضر بعدها،
وتخرج كي تستفهم ما الأمر من هايدي، خرجتا من
المدرج، وكادت أن تصطدم رقية بأحمد الذي كان يُسرع غضباً
إلى قاعة المحاضرة التي كانتا فيها، التفت إليهما واعتذر،
ثم أكمل سيره إلى القاعة، لم تشغل رقية بالها بهذا الموقف
وأدارت وجهها نحو «هايدي»، وشرعتا في السير مستفهمَةً:

- خرجنا أهو ومش هسيبك غير لَمَّا أفهم.

- ده أنتِ دماغك ناشفة، شبر ونص بس جبل في العند.

- شكرًا يا نخلة.. فهميني بقى.

- بصي يا ستي في الأول كده أنا استخرت، ولاقيت في
ارتياح ناحية عادل، وبلغت بابا إني موافقة، واتفقنا على
كل حاجة كمان.

أومأت رقية برأسها متجاهلةً هذا، وترغب في الانتقال
سريعًا إلى الموضوع الآخر؛ اعترضت هايدي على ذلك،
وربعت يديها، وهي ترفع أحد حاجبيها أعلى الآخر،
واستأنفت متعصبةً:

- طب مش هقول حاجة غير لَمَّا تديني اهتمام،
وتركزي في كلامي.

- خلاص يا ستي حقك عليّ، قولي وأنا كلي لك آذان
مصغية على رأي حسناء.

- ماشي.. ونبقى نشوف موضوع ست ابتلاء دي بعدين.

- طب خُشِّي في الموضوع وبلاش تغتابيها.

- المهم.. اتفقنا إننا هنتجوز بعد ما أخلص السنة دي،
وهنسكن في شقة في القاهرة هنا الستين دول، وبعد كده
نسافر البلد بعد ما أخلص بإذن الله.



- الله.. مبارك يا حبيتي، وتيجي لنا الجامعة وأنتِ شائلة رقية الصغيرة ونلعب بيها.. وإياك بقي ما تسميهاش رقية.

- لأ يا قلبي ما ينفعش أسمى حاجة تانية أساسًا، بس هي تبقى عسل زيك كده.

- ماشي يا طحينة.. وأنا عندي كتاب رائع عن الحياة الزوجية اسمه «في أحكام الأسرة» لدكتورة «ناهد الملا» هبقى أديهولك؛ علشان تمشوا على السنة من أول يوم.

- ماشي يا ستي، وعقبالك لما نفرح بيك.

- أنا فرحانة لك جدًّا والله يا هدهد، وإن شاء الله يكون خير لك ما دام ده اختيار ربنا.

- إن شاء الله يا حبيتي، أنا بصراحة لسه في قلبي انجذاب لخالد، لكن إن شاء الله هيروح مع الوقت، وأنا رضيت باللي ربنا كتبھولي والحمد لله.

- الحمد لله.. خُشِّي بقي على موضوع حسناء.

- يا خراشي عليك لما تكوني عايضة حاجة؛ بتفضلي تزني زي النحلة.

- معلش، معلش قولي بقي بطلي رخامة.

- بُصِّي بقي.. هو كل واحد حر في تصرفاته، وكل واحد ربنا هيحاسبه لوحده، لكن ماجيش أقول لك ده حرام وأنا أعمله عادي.

- حرام؟ وتعمليه؟!.. مش فاهمة، هو حصل إيه؟

- فاكدة لما روّحنا سوا وعدينا على كوبري الجامعة؟

- آه!

- لما كنتِ أنتِ مشغولة وبتتكلمي مع محمود في التلفون وإحنا في العريية؛ بصيت بالصدفة على الكوبري لاقيت ابتلاء بتاعتك دي واقفة مع الواد اللي كان هيخبطك جوا ده، واللي مخلصني متأكدة إن مش حد غيرها إنها شافتنني ساعتها!.. وارتباكها من شوية ده أكبر دليل على إنها هي.

- يا الله! أنتِ متأكدة؟!

- أيوا يا بنتي أنا شوفتها بعيني، وهي أول ما شافتنني تنجحت وسابته وجريت!

- بس إحنا ليه نُسيء الظن؟!

- ظن إيه بس دلوقتي؟.. واحدة واقفة مع واحد بعيد، وواجعة دماغنا بإنه حرام حرام، وعاملة فيها شيخة، وتقوليلي بنُسيء الظن؟

- سيبك سيبك ما لناش دعوة، وبرضو نُحسن الظن..
يللا أنا هرّوح مش هحضر تاني.

تركت هايدي في الجامعة وركبت «مترو الأنفاق»،
ورأسها تستحضر مواقف حسناء، وكلامها عن «أحمد»
بالأخص، وكيف كانت تحاول بكل الوسائل أن تحجب
تفكيرها عنه، وتشوّه صورته أمامها!

ووصلت البيت بوجهٍ شاحب ودخلت مباشرة إلى
غرفها، ولم تمزح كعادتها مع ليلي، لاحظت ليلي تلك
التغيرات في حالة رقية منذ عودتها، لكنها لم تسألها عن
أسبابها، وانتظرت حتى تجلسا كعادتهما كل مساء في جلسة
التجويد.

أنت رقية ولم تُحضر مصحفها هذه المرة، وجلست بلا
مبالاة بفكر شارد؛ فagتنمت ليلي الفرصة كي تستفسر
عن تلك الحال المتغيرة.

- رقية!.. انتفضت وانتبهت إليها «نعم»

- مالِك؟! من ساعة ما رجعتي من الجامعة وأنت
متغيرة.. في حاجة حصلت؟

أجابتها وهي تنظر إلى الأرض وتهز رأسها في خجل
وبصوت خفيض:

- صراحةً آه.. بس أنا مش عارفة ليه متضايقه رغم إن الموضوع ما يخصنيش أصلاً!

- طب احكي يمكن يكون عندي حل .

- السنة اللي فاتت، أول ما دخلت الجامعة وحوّلت لدار العلوم كان في إنجذاب قلبي كده لواحد معانا في الدفعة اسمه «أحمد زغلول»، بس أنا ماعلقتش نفسي بيه ودعيت ربنا يبعده عن تفكيري، والحمد لله حصل، بالذات كمان لِمَا «حسناء» ذكرتني بأنه ماينفعش أتعلق بيه.

- تمام.. فين المشكلة هنا؟

- المشكلة في «حسناء» نفسها.. هايدي قالت لي إنها شافتها معاه علي كوبري الجامعة الأسبوع اللي فات؛ أنا قدمت حُسْنُ الظَّن، وما كترتش في الكلام، لكن صراحةً في كذا حاجة بتأكد سوء الظن ده.

- زي إيه؟!

- مرة سابت معايا شنطتها عشان تتوضأ، وتليفونها رنّ؛ لاقيت اسم المتصل «زغلول»، ولمّا سألتها قالت لي: ده رقم زوج عمته، وبعدين استأذنت مني وراحت تتكلم بعيد رغم إنها بتتكلم قدامي عادي دايمًا، ورجعت قالت لي: معلش أنا هعدي على عمّتي؛ فلازم أمشي دلوقتي، ولا حظت «أحمد» كذا مرة يبص علينا وهي معايا! كنت

بقول يمكن مش قصده، أتاريه كان بيص لها، وهي الفترة الأخيرة دايماً تتحجج بأي حاجة وتمشي!.. أعمل إيه يا أبله ليلي؟.. أنا خيفة أكون فاهمة غلط وظالماها!

- بُصِّي يا رقية، كلنا بنغلط، وهي مش ملاك؛ يعني ممكن يكون فعلاً في حاجة بينهم، وبما إنك شايله من دماغك، فخلاص، وكأنك ماعرفتيش حاجة؛ عشان ماتسبيلهاش أذى ولا تجرحي مشاعرها، وبرضو أحسنني الظن، وادعي لها.

- حاضر.. إن شاء الله يعمل كده.

ثم خرجت من صمتها الذي عمَّ المكان بعد نصيحة ليلي، وسألتها فجأة بنبرة هادئة: «هو الحب حرام؟!».. ضحكت ليلي من نبرتها وسؤالها، ثم أجبتها في جدية:

- هو الحب نفسه مش حرام، بس اللي الناس بتعمله هو اللي حرام!

- مش فاهمة!

- أقولك يا ستي.. الإمام ابن القيم - رحمه الله - قال: «إذا حصل العشق بسبب غير محظور، لم يُكَمْ عليه صاحبه، كمن كان يعشق امرأته أو جاريته ثم فارقها وبقي عشقها غير مفارقٍ له، فهذا لا يُلام على ذلك، وكذلك إذا نظر نظرة فجأة ثم صرف بصره، وقد تمكن العشق من قلبه

بغير اختياره، على أن عليه مدافعتة وصرفه...^(٧) « سبحان الله كنت بقرأها النهارده!

- يعني إني أحب كده مش حرام، لكن التفكير والانشغال ده من الشيطان، صح؟!

- بالظبط كده...

- بس أنا غصب عني بأشغل وأفكر حتى لو عاوزه أنسى!

- لأ يا حبيتي كده الشيطان هو اللي يشغلك، وأنت بإيدك تشغلي نفسك بحاجة تاني.. وليكن مثلاً اشغلي نفسك بالمذاكرة والاستغفار والذكر، أي حاجة تبعدني بيها الشيطان عنك وخلاص، أمّا بالنسبة للشباب فالأمر مختلف شوية.

- مختلف إزاي؟!

- البنت شغلت نفسها أو ما شغلتش ماينفعش تروح تطلب إيدته، لكن هو اللي هيختار؛ فالمفروض لَمَّا ينجذب يشوف هو إمكانياته الأول تسمح له يتقدم ويتجوز وللا لأ.. إذا كانت تسمح وكل شيء تمام؛ يبقى يتوكل على الله ويستخيره ويستشير أهله، ويروح يطلبها من أبوها.. لكن شُغل أنا معجب، وشوّة شويّة تكبر المشاعر ويتعلقوا

ببعض ده ما ينفعش، وهبقى أديك كتاب «روضة المحبين»
تقرأه بعد ما أخلصه إن شاء الله.

- جميل جدًّا.

- قومي هاتي المصحف بقى وكفاية رغي.

- حاضر.

استلقى أحمد على سريريه وعقله مشغول ويفكر بما
حدث، ولا يستطيع إدراكه

- أوووف.. أنا اللي غلطان من الأول، كم مرة عديت
لها.. كل يوم تيجي تقول لي ده فلان بص لي بطريقة مش
كويسة، فلان وقفني في الكلية وسمعتني كلام وحش! وأنا
أخذ لها حقها، بوظت علاقتي مع معظم زمائلي وكترت
الناس فيّ، ومستوايا الدراسي قل بسببها، وجزائي في الآخر
إنها تبغني في أول محطة كده؟.. يا الله! ده أنا ما كُنتش
بَقَوْتُ يوم إلا وكنت أطمئن عليها مرتين تلاتة.. طب يا
تري كل الحكايات الي هي حكته دي حقيقة وللا كان
كله لعب بي وبس؟!

وفتح هاتفه وتنقل بين الصفحات والتطبيقات، ورويدًا
رويدًا سحبه شيطانه إلى مكان آخر، ظلَّ يُصارع كعادته،

لكنه لم يلبث برهةً إلا وغاب عقله عن التفكير، وغفل قلبه عن إيمانه ووقع في ذنبه الذي حاول مراراً أن يُعالج منه ولم يستطع.

استحقر نفسه وانتابه الندم ولم يشعر بنفسه إلا وهو يستيقظ قبل الفجر بنصف ساعة، نهض من على سريره، وهرول إلى دورة المياه ليغتسل، وهو يتألم ويعاني مما هو فيه، ويتعجب من رحمة الله الذي يوفقه ويسر له دائماً رغم عصيانه! سمع المؤذن ينادي «حي على الصلاة» عقب انتهائه؛ انطلق إلى المسجد ولسانه يستغفر وقلبه فاتر، يشعر بأن لا قيمة له وكأنه خرج من رحمة ربه.

قرّر هذه المرة أن يتجراً ويخرج من خجله ويطلب النصيحة من الشيخ «مصطفى» إمام المسجد؛ توجه إليه بعد انتهائه من أذكار ما بعد الصلاة، وقلبه يتنفض من الخجل، وجلس بجواره وشرع يحكي ما يؤلمه، وأضاف قصته مع حسناء.. ربت الشيخ على كتفه، ونظر إليه بوجه بشوش وهو يردد:

- ما شاء الله، ما شاء الله.. كُوناك عرفت المشكلة فده أول طريق لحلها.. الي أنت فيه ده طبيعي جداً في مرحلتك دي، لكن ربنا أمرنا بحفظ الفرج، وأنت ما شاء الله سمتك يقول إنك رجل محترم وملتزم، وكوناك وقعت في معصية فكل ابن آدم خطاء، وخير الخطائين... إلإيه؟

- التوابون.

- الله يفتح عليك.. التوابون، كُن من التوابين، اُصْدُقْ مع ربك وتُب توبةً نصوحًا.. ابتلع ريقه وهز رأسه استحياءً، وقال وهو يرثي حاله: بُتُّوب وأعود للذنب تاني كأني ما بُتِّتَش، وكأني مش في وعيي في وقت الذنب!

- اشغل نفسك بأي حاجة تانية، واجهد جسمك في الرياضة، وما تديش لنفسك فرصة تفتكر ذنبك ده، انساه تمامًا كأنه ما حصلش.. وحتى لو وقعت تاني تُب واستغفر

ولو أذنبت ألف مرة في اليوم.. ﴿قُلْ يَا عِبَادِيَ الَّذِينَ أَسْرَفُوا عَلَى أَنْفُسِهِمْ لَا تَقْنَطُوا مِنْ رَحْمَةِ اللَّهِ إِنَّ اللَّهَ يَغْفِرُ الذُّنُوبَ جَمِيعًا إِنَّهُ هُوَ الْغَفُورُ الرَّحِيمُ﴾^(٨)؛ فمهما كان ذنبك ما لم تُشرك بالله أو ع تياس.

- تمام.. وسحب الشيخ كُتَيِّبًا صغيرًا بعنوان «العادة السيئة» وأعطاه إياه:

- خد الكتيب ده اقرأه كويس، وإن شاء الله يساعدك .. أما بالنسبة للبنات اللي سابتك؛ فاحمد ربنا إنه جعل ده سبب؛ عشان ترجع له.



- بس إحنا كُنَّا محافظين على الحدود اللي بينا.. يعني مش
كُنَّا بنسلم بإيدنا وحتى لما كُنَّا نقعد مع بعض كُنَّا بنغض
البصر تمامًا؛ يعني ما وصلناش لدرجة فيها تحريك للمشاعر.

تبسم الشيخ قائلاً: يا حبيبي كونك تُخرج معاهها أو
تكلمها في التلفون ده حرام، ودي كده خلوة.. انتفض
وحدّق بعينه، وقال وهو يعتدل بجلسته بعدما كان ظهره
منحنياً: يا ربي!.. يعني ده كله كان حرام؟!

- أيوا يا حبيبي ده كله كان بيغضب ربنا، حتى وإن
كانت نيتك خير.

- بس أنا بحبها فعلاً!

- الحب يا ابني مش مجرد حبة مشاعر ونظرات وكلام،
الي بيحب حاجة بيحافظ عليها لآخر لحظة.

- بس أنا حافظت عليها، وما سببتلهاش أي أذى
وكلامنا كان خالي تمامًا من أي حاجة حرام.

- كونك خرجت واتكلمت واتعلقوا ببعض ده أذى؛
لأنك دلوقتي مش ضامن إنكم لبعض، وده هياثر عليكم،
لكن الحب الصبح إنك تحافظ على قلبك وقلبها من
التعلق لحد ما ربنا يجمعكم وبعدين تفرغوا المشاعر دي،
ثم قال مازحاً: حتى تلاقوا حاجة تتقال وتعيشوا اللذة
بالحلال، بدل ما خلصتوا كل الكلام...

كان كلام الشيخ بمثابة مفتاح الطريق لتغيير أحمد، وتركه لتلك العادة التي تُغص عليه حياته، وقرر من وقتها أن يخطط للابتعاد عن ذلك بعزيمة قوية بعد الاستعانة بالله - عز وجل - ؛ بحث عن طريقة لحجب تلك المواقع التي قد تُعيده من جديد، وعزم على أن يمنع نفسه من التفكير من الأساس، وكلما خطر بباله ذلك شغل نفسه بأمر آخر.. طوى الورقة التي كتب فيها خطته، ووضعها في درج مكتبته، وصاح بصوت قوي: إن شاء الله هقدر.

وأمسك بمصحفه ليقرأ ورده اليومي من القرآن كما اعتاد، شرع في قراءة سورة النور، وظل يرتل ويجود بصوته العذب إلى أن وصل إلى قول الله - عز وجل - ﴿وَلْيُسْتَعْفِفِ الذَّيْبُ لَا يَجْدُورَ نِكَاحًا حَتَّى يُغْنِيَهُمُ اللَّهُ مِنْ فَضْلِهِ...﴾^(٩) استوقفته الآية، وشعر أنها رسالة خاصة ليتم ما بدأه دون توقف.

انتقل إلى والده، ولمح له بضرورة الزواج، وأنه قد اقترب من التخرج، ومعظم الشباب في سنه قد تزوجوا، وحذثه عن ضرورة الزواج؛ في هذه المرحلة وسط الفتن التي تُحيط به من كل جهة، وتعجب من رد والده، الذي تفهم مقصده ووافقه الرأي، وطلب منه أن يختار من يراها مناسبة، وفور تخرجه سيخطبها له!

كرّرت مريم زيارتها لصديقتها هناء بعد حوالي عام منذ زيارتها الأولى، لكن هذه المرة لم تكن مجرد زيارة وُدّ بين صديقتين، فهي لم تأت وحدها وأتى معها زوجها وابنها «خالد» وابنتها «خديجة» التي تصغره بقرابة عام ونصف، جاءت محمّلةً بواجب زيارة فخم من خيرات الريف زرعًا وطيورًا.

رحّب أصحاب البيت بزائريهم خير ترحيب، ودخل خالد ووالده مع محمود إلى غرفة الاستقبال الرئيسة، واتجهت مريم إلى غرفة صديقتها، أمّا الصغيرتان فدخلا غرفة رقية، وتكفلت ليلي وحدها بتحضير واجب الضيافة.

ولمّحت مريم أن ابنها قد كبر، وأن النسب من أهل الثقة والخلق خير حسب؛ فهَمّتْ هناء مرادها، وصارحتها بالرد دون إبهام:

- والله يا مريم إحنا مش هنلاقي أحسن منكم نناسبه ونستأمنه على بنتنا، لكن البنت لسه فاضلها سنة وتخلص جامعة يعني لسه بدري.

- بدري من عمرك.. ما أنت متجوزة وأنت لسه في الدبلوم، وبعدين هو مين اللي قال إننا هنجوز دلوقتي؟.. إحنا بس قُلنا نشوف رأيكم وبعد كده اللي فيه الخير يقدمه ربنا، وأهو كله بالحناق إلا الجواز بالاتفاق، ومش

هناخذها غصب عنها.. وأنا بصراحة مش هلاقي أحسن من بنتك في أخلاقها.

- الله يكرمك.. على العموم نبقى نكلم محمود ونشوف رأيها، وربنا يقدم الي في الخير.

- على البركة.. وتغيرت ملامح وجه مريم بعدما كان يملؤها السرور بكلام صديقتها، وسألت: صحيح يا هناء.. هو مافيش أخبار عن أبو محمود؟!

أجابتها بنبرة رثاء، وقد تغرغرت عيناها بالدموع:

- لأ والله يا مريم من يومها وماحدث عارف عنه حاجة ونحتسبه في تعداد الأموات لحد ما ربنا يطمئناً.

- ربنا يرده سالم غانم ويجمع شملكم.

- آمين.

وبدورها خديجة كانت تُكرّس تركيزها في كل حركة ولفظ يصدر عن رقية، تلك مهمتها التي كُلفت بها من قبل أخيها، دون أن يُخبر أحداً غيرها بذلك، حتى والدته لم تكن تعلم أنه يفكر في ذلك، وكانت تجس نبضهم فقط قبل أن تحدّث ابنها في ذلك الموضوع؛ حتى لا تعلقه بالفتاة!

بعدما انتهت الزيارة أخبرت هناء ابنتها عمّا دار بينهما بخصوص خطبتها؛ لم تُعرب رقية عن رأيها في هذا، لم

يكن هذا بسبب قبول أو رفض لشخص خالد، إنما كان كل ما يشغلها هو صديقتها التي تزوجت وكانت تُحبّه، بل لا يزال هناك ميل إليه تخفيه؛ لأنها لا يجب أن تفكر في ذلك وهي في عصمة رجل آخر، صمتت قليلاً ثم أخبرته والدتها أنها ستفكر في الأمر، ثم سترد عليها في وقت قريب، وأسرعت إلى هاتفها واتصلت بهايدي؟

- سلام عليكم ورحمة الله

- عليكم السلام ورحمة الله وبركاته.. روق روق إزيك؟

- الحمد لله يا حبيبتى بخير حال.. أنتِ عاملة إيه وإزي زوجك؟

- الحمد لله كله تمام، وجوزي زي الفل، ومش مخليني محتاجة أي حاجة، كأن ربنا عوضني بيه سنين الحرمان من حنان الأم.. أنتِ مال صوتك كده؟ في حاجة؟!

- صراحةً هو في حاجة، وأنا بكلمك علشانها.

- خير يا حبيبتى قلقتي، في إيه؟

- جايلي عريس!

- ماشاء الله، الله أكبر، ودي حاجة تزعل كده؟.. ده مين اللي أمه داعية عليه؟!.. أقصد داعية له؟!

- ماهي المشكلة في هو مين.
- ما لك يا بنتي هو حد سمعته وحشة وللا إيه؟..
- اوع يكون الواد بتاع الكلية.
- لأ مش هو.
- أو مال مين طيب؟!
- خالد!
- خالد؟!.. خالد مين؟
- بتاع آداب!.. حضرت الذكريات أمام عينيها، لكنها سرعان ما تذكرت عهدا مع الله بأن تصون زوجها في السر والعلن حتى في مشاعرها، وقالت وهي تُصارع قلبها:
- ماله طيب يا روق روق؟.. هو هيلقي أحسن منك؟
- المشكلة مش في كده.
- أو مال؟!
- المشكلة فيك أنتِ، مش عايزة أكون سبب في إنك تزعلي؛ علشان حاجة زي دي.. ردّت هايدي وهي تمسح دمعتهما التي سالت دون أن تشعر:
- إخص عليك يا رقية.. أنا الحمد لله رضيت باللي ربنا كتهولي، والحمد لله أنا أهو مبسوفة على الآخر.. اتوكلي

على الله يا حبيتي وربنا يسعدك، ويديم محبتنا فيه، وأنا هبقى مبسوطة جداً وأختي أحلى عروسة في أحلى زفة.

- ماشي يا حبيتي، وربنا يسر لك ونشوفك نونو قريب.. وأنا برضو هستخير ربنا، وإن شاء الله خير.

أغلقت هايدي الهاتف ووضعت بجوارها على الأريكة التي تجلس عليها، وفاضت عيناها دمعاً، وتذكرت أول لقاء التقته فيه في الجامعة، وحديثها معه في المحاضرات.. دخل عليها عادل واستعجب مما يراه، وظن أنه فعل أمراً أغضبها، جلس بجوارها وضمَّها متسائلاً:

- مالك يا حبيتي؟.. في حاجة مزعلاك؟

- لأ ما فيش حاجة.. صداع بس كده صعب شوية، وهاخد «إسبرين» وهيروح ماتقلقش.

- لأ إحنا لازم نروح للدكتور

- لأ مش لازم أنا هبقى كويسة إن شاء الله.

- لأ قومي إحنا كده كده هنعدي على الدكتور؛ عشان نشوف سبب تأخر الحمل إيه!.. انتفضت قلقاً ووجدت نفسها دون سبب توافقه الرأي، وأسرعت إلى غرفتها لتبدل ملابسها...

- هنتحتاج نعمل شوية فحوصات على الرحم، لكن احتمال الحمل مش أكيد (قالها الطبيب وهو يصطحب عادل بعيداً، بعدما قالت له إنها تشعر بألم شديد أسفل البطن ومنطقة الحوض، وإفرازات وردية مقرونة بآلام بعد المعاشرة)

- يعني مافيش أمل إنها تحمل!؟

- الله أعلم.. الفحوصات هي اللي هتبين ده، وربنا قادر على كل شيء.

- طيب الفحوصات دي هتاخد وقت قد إيه؟

- مش كثير إن شاء الله.

- خلاص ربنا يسهل، ونعمل الفحوصات.

تقف أمام المرأة تتزين استعداداً للخروج لأداء آخر امتحانات الفصل الثاني من عامها الثاني، وتدندن مقطّعا من أغنية إنجليزية «perhaps .. perhaps .. perhaps»، وأخرجت خُصلة شعر من تحت حجابها، وعلى وجهها مساحيق (بودرة) من «المكياج» الخفيف.. تعطرت بعطر فاح في البيت كله، ووصل إلى خياشيم أخيها؛ دخل مستنشقا لذاك العطر، قبل أن يشتعل غضبا لما رأت عيناه؛ وصاح في وجهها:

- إيه الي أنت عامله ده؟! أنت إزاي هتخرجي كده؟!..
لم تعطه اهتماماً، واستمرت في تجهيز هندامها؛ فاقترب منها
وقد احمرّت عيناه من الغضب، وجذبها من رأسها:
- هو أنا بكلم نفسي؟ شيلي القرف الي على وشك
ده.. نزعت يده وهي تشور في وجهه:
- أنت مالك.. أنا حرة.
- لأ مش حرة، ومش هتخرجي بشكلك ده.
- هخرج ومالكش فيه.. أنت مالك؟.. حد يقولك
تلبس إيه وماتلبسش إيه؟
- أنا راجل وأعمل الي أنا عايزه.
- راجل على نفسك مش عليّ، وهنزل كده غصب
عنك.. وصاحت لتستنجد بأمرها: يا ماما!!!
- خَطَّتْ عفاف إليهما بخطوات هادئة؛ لأنها اعتادت على
مثل تلك الصراعات اليومية بينهما
- في إيه.. مش هتبطلوا القرف بتاع كل يوم ده؟
- شوفي بنتك عاملة في نفسها إيه؟
- مالها؟ ما هي زي القمر أهي!
- يعني أنت موافقة إنها تخرج كده؟!

- أنتَ مالك.. سبها تعيش حياتها وتتمتع بشبابها، وماهو كل البنات بتلبس كده يعني هي دي حاجة غريبة، وبعدين ما أنت بتعمل اللي أنت عايزه وماحدث بيعترض.

- بس أنا راجل ومش هتعاكس، ومش بمشي في الشارع وأنا لابس ضيق، وأفرج الناس على جسمي.

- وهُمَّا يبصوا ليه؟ كل واحد حر في نفسه ويعمل اللي هو عايزه، وإيه رأيك بقى إني هروح معاها الجامعة كمان!..
أخرجت علًا لسانها استفزازًا له، وهي تقول بصوت عالٍ:
قشطة عليك يا فُوفًا.. مجتمع ذكوري مُتَعَفِّن صحيح.
- أنتوا حُرِّين أنا هريح دماغي وأغور من وشكم.

تركهما وانصرف ولا يعلم إلى أين سيذهب، وبداخله صراع بين نخوته التي تُحطمها أمُّه بدعوى أنه مهما كبر فهو صغير في نظرها، ولها الحق أن تتدخل في شؤونه وواجب عليه إطاعتها، ومستقبله الذي لا يعلم ملامحه، هل له دور في الحياة أم سيظل تافهًا كما يرون ويسعى فقط وراء أهوائه؟!..

ربما كان هذا سببًا في تمرده على جنس الإناث، ورغبته المستمرة في الانتقام دون تفكير في عواقبه، لكنه سرعان ما أعمل عقله واستيقظ ضميره:

- يمكن أنا اللي بتصرف غلط؟!.. أو مش عارف إزاي
أعامل مع أختي ومُتَقَمِّص دور الراجل الي لازم يسيطر
وكلمته ما حدش يكسر ها!.. لأ أنا غلطان في الحقة دي،
أختي ما بقتش صغيرة، وأنا المفروض أكون الأخ والأب
في غياب أبويا، لازم أعاملها كويس يمكن هي محتاجة لي
في الوقت ده، محتاجة تشوف الظهر الي تسند عليه وهي
مطمنة، ويمكن ما أقدرتش أظهر لأمي إني أقدر أتحمّل
المسؤولية وأوريها الراجل الي تعتمد عليه!.. لازم أحاول
حتى لو اضطريت إني أتنازل عن حاجات كتير، لكن أمي
وأختي أهم من نفسي ومن كرامتي.

تتحرك شفتاها بآيات من القرآن، وقلبها ينبض نبضاتٍ
تقطر حُزناً، وتسيل دموعها على وجنتيها، وعيناها تتنقل بين
مصحفها وشاشة عرض نبضات القلب، وأمها التي ترقد
في غيبوبة تامة منذ ثلاثة أيام بعد نوبة قلبية تحت جهاز
التنفس الصناعي (CMV)، بعدما سمح لها الطبيب بالجلوس
جوارها بعد إلحاح شديد منها.. تتألم في صمت، لا صوت
سوى صوت دقات القلب التي يترجمها الجهاز فقط.

وبخارج غرفة الإنعاش يجلس محمود وزوجته يدعوان الله
بتعجيل شفاء تلك المريضة، وتكتم ليلي آلام بطنها وظهرها
المتقطعة من حين لآخر حتى لا تسبب في إزعاجهم.

اشتدَّ الألم، ولم يعد متقطعاً كما كان، بل أصبح مستمرّاً؛ لم تستطع الكتمان هذه المرة، وصرخت وهي تنظر إلى زوجها وقد تصبب جسدها عرقاً وتشحب وجهها، وأنفاسها تخرج بصعوبة، وعَضَّت على أصابعها بأشد قوة لديها:

- هولِد!.. الحقني.

أسرع ليُحضر لها من ينقلها إلى غرفة العمليات.. استلقت على السرير وكأنها تلفظ أنفاسها الأخيرة، لا تتحمل ألم الولادة هذا، تتلوى وتعَضُّ في كل شيء أمامها، لم تسلم حتى أيدي الطبيب من أسنانها، وهو في حيرة يتنقّل بين غرفة العمليات وغرفة الإنعاش لعل حالة أمّه تحسّنت.. الأمر كما هو لا شيء تغيّر!

وصل الألم ذروته، وجهها شاحب ورؤوسها تنسحب منها، ورأس مولودها تُسحب برفق من رحمها؛ تنهدت تنهيدةً تُوحى بأن آلامها قد هدأت، ولسانها يحمد متقطعاً: الحمد لله.. الحمد لله.

- ألف مبروك، بنوتة زي العسل.. قالتها إحدى الممرضات لمحمود بعد عودته إلى غرفة العمليات.

غمرته السعادة عقب قول الممرضة، وهروا إلى الداخل كي يرى مولودته، حملها وأذن في أذن اليمنى، ثم أدارها

لُتَقِيم في اليسرى، وينظر إلى زوجته بعينٍ حاملةٍ للحزن والفرح في آن واحد.. حمد الله على سلامتك.

- الله يسلمك.. ماما عاملة إيه؟!.. أجاها وتغرغرت عيناها:

- مافيش جديد.. دعواتك.

- طب خليك جنبها.. وما تقلقش عليّ أنا كويسة، هي أهم دلوقتي.. ماتسبش رقية لو حدها.

- حاضر.

تنهدت رقية وهي تبسط يديها من الأرق، ورأسها كادت تقع من ثقل التعب، أغلقت مصحفها ووضعتة على منضدة صغيرة بجوار السرير، واستلقت على الكرسي الذي كانت تجلس عليه، وأغمضت عينيها التي لم تنم برهةً منذ يومين، قبل أن تنهض على صوت آهات هباء.. «آه.. يارب.. رقية.. محمود.. رقية.. رقية..»

- الله أكبر، ماما!.. حمد الله على سلامتك.. ألف سلامة.

- فين محمود؟

- مع ليلي.. ليلي بتولديا ماما.. يللا شدي حيلك؛ علشان تشيلي البيبي.

- آاه.. الحمد لله.. جابت إيه؟.. مش عارفة ولدت وللا
لسه، هروح أنادي محمود وأشوف.

- استني.. عادت بعدما خطت خطوة وتحملها السعادة
لتحسن حالة والدتها.

- نعم.

- رقية.. مريم زي أختي، وهتحطك في عنيا، ما
تزعليهاش وبريها.

- مش لِمَا أتجوز ابنها الأول؟.. ماتلقيش، بس أنتِ
تقومي بالسلامة وبعدين نشوف المواضيع دي بعدين..
هروح بقى أفرِّح محمود وأشوف ليلي عملت إيه..
ماتتحركيش كتير ولا تتكلمي زي ما الدكتور قال لحد ما
آجي.. اللهم لك الحمد...

ما أبعدَ اللهُ عَنْكَ ما تُحِبُّ إلا ليقَرَّبَكَ إلى ما يُحِبُّ.

محمد معزز السعيد

الفصل السابع

- فيروس حليمي!

فُوجئ الطبيب عندما وصلته نتيجة تحاليل التنظير الخاصة بحالة «هايدي» بعد بضعة أيام، وكانت تؤكد وجود ذلك الفيروس المصاب به رحمها!.. سحب كرسيه إلى الخلف وهو يُفكّر في كيفية توصيل هذا لهما بطريقة تُطمئن.

وبالخارج ينتظر عادل وزوجته في استراحة طبيب أمراض النساء والتوليد إلى أن يأتي دورهما كما هو في ترتيب الكشف، والقلق يشغل عقليهما.. تُرى ما هي النتيجة؟ خيرٌ أم ماذا؟! ويحاول إخفاء هذا القلق بالحديث معها وتفقد حال دراستها...

«مدام هايدي».. صوت مساعدة الطبيب قطع حديثهما.. دخلا غرفة الطبيب وقد هدأ القلق نسبياً؛ فابتسامة الطبيب خفت عنهما - اتفضلوا استريحوا

- خير يا دكتور.. طمناً - اجتمع صوتها وهما يجلسان -

- خير إن شاء الله.. لسه واصلني حالاً نتيجة
الفحوصات؛ أصابتهما نبرته بالقلق من جديد!.. إيه؟!
هزَّ رأسه وملاحه يرتسم عليها الحزن: «فيروس
حليمي» منتشر في الرحم بشكل كبير، ولازم نشيله في أسرع
وقت!

- يعني إيه؟! -

- بصراحة هو مش فيروس بسيط، لكن لكل داء دواء،
وعشان نتخلص منه هنعمل جلسات إشعاعية أولية؛
لتحديد حجم انتشاره، وبعدين نستأصله وإن شاء الله
نبقى أحسن.. وأعطاه ورقة بها جدول الجلسات المطلوبة،
وأخرى تحويل إلى مستشفى الخاص لإجراء الإشعاعات..
وعادا إلى المنزل ولا يزال القلق مستمراً...

- أنا خيفة.. حاسة إن الموضوع مش سهل، وكلام
الدكتور قلقني!

- يا حبيتي ما تقلقيش.. هنعمل الإشعاعات الي قال
عليها دي، ويشيل الفيروس ده بإذن الله، وتخليفلنا شياطين
صغيرة.

- يا رب يا عادل، يا رب

واضَّجَعَ على السرير وهو يحَدِّقُ عينيه في السقف،
ويضع ساقاً فوق الأخرى، وشرع يمازحها قائلاً:

- إحنا إن شاء الله نخلف دسطة عيال.. لأ كفاية نص
دسطة بس، نرأف بحالك برضو.. نظرت إليه وقد ابتسم
ثغرها:

- ليه؟! أنت متجوز أرنبه؟! هُمَّا كفاية اتنين، وإن شاء
الله يبقوا بنت وولد.. لأ لأ حرام، إحنا نسيبها على الله وهو
يرزقنا بالذرية الصالحة إياك حتى يبقوا عشرة، ثم صمتت
لبرهة، وقالت: بس أنا برضو قلقانة!

- يييي.. ده أنتِ تخصص نكد.. اتخمدى يا شيخة
واسكتي.. وتركها في قلقها ونام.

تفاجأت رقية بخطيبها ووالدته أمام باب العناية المركزية
فور خروجها، أشار إليها دون مصافحة، وعانقتها الحماة، ثم
استأذنت الطبيب أن تدخل لرؤية صديقتها، وتركها رقية
لتذهب إلى أخيها.. فرحت هناء عندما أقبلت صديقتها،
وقالت وهي تصارع الأنفاس:

- كويس إنك جيت، عشان عايزة أوصيكِ على رقية
قبل ما أموت!

- بعد الشر عليك، إن شاء الله تقومي بالسلامة.. قومي
يا أختي بلاش دلع.

- خلي بالك منها يا مريم، اعتبريها بنتك.

- ما تقوليش كده.. ربنا يقومك بالسلامة وبيارك في
عمرك، ويخليك لها.

وضع محمود صغيرته بجوار زوجته، وقبل رأسها،
قبل أن تدخل رقية، وتخبرهما بتحسن حالة أمها، وصارت
سعادتها سعادتين برؤية الصغيرة:

- ما شاء الله.. حمداً لله على سلامتك يا لولو، ولد وللا
بنوتة؟

- بنوتة غسل زي عمتها.

- الله أكبر.. ربنا يُنبئها نبأاً حسناً

- ماما عاملة إيه؟

- الحمد لله فاقت

- الحمد لله

- هرجع لها تاني بس نشوف ماما ونيجي.. وأخذت
بيد أخيها متجهةً إلى غرفة الإنعاش

تيت تيت تيت ...

اللسان ودّع الكلام، ضربات القلب تهدأ تدريجيًا،
شحب في الوجه، والجسد يخرج أنفاسًا متناثرة.. توقف
النبض وإشارة الجهاز صفر! ذهبت روح «هنا» إلى خالقها،
وآخر ما قالت «...».. أغمضت مريم عين هنا،
وصرخت دون صوت وسيل دموعها يقطر على جسد
صديقتها الذي وضعت رأسها عليه، وصوت الصمت
يصاحبه نحيبها، قبل أن يأتي الطبيب ويُخرجها من الغرفة.

يهول محمود وأخته خلفه كي يرى والدته التي لم يسمع
همسها منذ ثلاثة أيام، وصلا إلى الطابق العلوي، نبضات
قلبها تسارعت بمجرد رؤيتهما لمريم التي تجلس، وتضع
يديها فوق رأسها المنحني نحو الأرض، وابنها الذي
شحب وجهه يقف صامتًا بجوارها وجهشت عيناه!..
يحدقان بنظراتهما نحوهما، ولسان حالهما يتساءل ما الأمر؟!
تحرك خالد حذوهما واحتضن محمودًا.. البقاء لله!

لم يشعر محمود بنفسه إلا وقد سقط على الأرض وعقله
شارد لا يصدق، وهرولت هي محاولة الدخول إلى الغرفة
لكنها مُنعت من الدخول، جسدها يرتعش، ولسانها لا
ينطق، وأغمي عليها.

نُقلت على نقالة إلى إحدى الغرف ليتفحصها الطبيب، وأصبح محمود في حيرة بين زوجته النفساء، وأمّه المتوفاة، وأخته؛ طلبت منه مريم أن يذهب إلى أخته ومعه خالد، وتظل هي حتى يُؤذن بنقل الجثة فالحى أولى بالرعاية الآن.. أخبر محمود الطبيب أن أخته لم تأكل جيداً منذ يومين، وكانت في حالة إرهاق شديدة؛ واتّضح أنها تحتاج إلى نقل دم؛ حُضر ذراعُه ليسحب الطبيب منه دمًا، فهو تعود على ذلك، قبل أن يمسك خالد بيده.

- خليك أنت يا أستاذ محمود.. أنا هتبرع، وحضرتك روح خلس الإجراءات.

- أنا نفس الفصيلة، مش لسه هنفحص فصيلتك!

- لأ ما تقلقش أنا اترعت لها قبل كده!!.. لم يعطِ لكلامه بالاً، فالعقل ليس في حالته، وانطلق لإنهاء الإجراءات...

نُقلت جثة «هناء» إلى مسقط رأسها في محافظة الشرقية، وكان يجب على محمود ورقية ألا يغادرا البلدة قبل انتهاء العزاء، وأصرَّ الشيخ مصطفى أن يبيتا في بيته.. وهناك استقبلتُ خديجةُ رقيةَ لتمكث في غرفتها إلى أن يحين الرحيل، وكانت تلك الصغيرة التي تصغر رقية بنحو عام ونصف

تخفف عنها آلام الفرقة التي سيطرت على شعورها وجعلت الحياة سوداء في وجهها، وتذكرها بأن الجميع راحل، ولا أحد خير من النبي - صلى الله عليه وسلم -

وبعد يومين.. كان يجب الرحيل بعد انتهاء طقوس الدفن والعزاء، وكان أحمد على مشارف البلدة ينتظر سيارة ليسافر إلى القاهرة حيث اقترب العام الدراسي الأخير، ولا بد من بعض الإجراءات ليلتحق بالسكن الجامعي أثناء خروج رقية بصحبة أخيها وخطيبها متجهين إلى الوجهة نفسها؛ وقعت عينه عليها لكنه لا يعلم من هي، وأين رآها من قبل؟!

وقفت السيارة وركب المنتظرون، واستقلَّ أحمد الكرسي الأمامي بجوار السائق، بينما جلس محمود وأخته خلف السائق مباشرة.. أخرجت مصحفها وشرعت في القراءة طوال الطريق، وهو انشغل بالتسبيح على مسبحته الزرقاء التي لا تفارق سبَّابته، وخطر على باله كلام الشيخ بسرعة الزواج وأن يختار «ذات الدين» استنادًا للحديث النبوي «تُنكحُ المرأةُ لأربع: لمالها، ولحسبها، ولجمالها، ولدينها؛ فاظفر بذات الدين تربت يداك» ابتسم، وأسند رأسه على الكرسي؛ فلمحت عينه رقية في المرأة بهيئتها وهي مُنكبة على المصحف وترتل شفتها آياته.. اتسعت ابتسامته وقال دون صوت: لعلها إشارة إلهية.. اللهم عجل بذات الدين يارب!

عادت رقية وأخوها إلى البيت وضاق صدرها منذ الدخول، دخلت على زوجة أخيها لرؤية الرضيعة الصغيرة، كادت حالتها تتحسن عندما رأت الصغيرة قبل أن تخبرها ليلي بأنها أسمتها «هناء»؛ تغرغرت عيناها بالدموع، وانسحبت بسرعة إلى غرفة أمها، واستلقت على سريرها، ومرّت الذكريات على بالها، وظلّت تبكي إلى أن غلبها النوم.

رأت والدتها في منامها وهي ترتدي رداءً أبيض، وتنظر إليها قائلةً:

- اضحكي يا رُقيّة.. عايزة أشوف ابتسامتك اللي بتفرحني، دموعك دي بتعذبني، شيلي الغمامة السوداء دي، ونوري الدنيا بروحك الجميلة، قومي وافرحي وما تزعلنيش بدموعك دي، وقبّلت جبهتها وانصرفت؛ استيقظت من نومها وتبدلت حالها ١٨٠ درجة، من الحزن الكالح إلى السعادة العارمة، وقررت ألا ترتدي سوى الأبيض، وأن تكون سبباً لتخفيف آلام من حولها.

كانت الساعة تقترب من الثانية بعد منتصف الليل، والصمت يملأ البيت فور استيقاظها من ذاك الحلم الذي أيقظ سعادتها الخامدة، وهرولت إلى دورة المياه وهي تتنهد فرحاً لتتوضأ وتصلي القيام كما كانت تفعل هناء كل ليلة في مثل هذا الوقت.. قد اقترب الفجر عقب انتهائها

من الصلاة؛ ذهبت إلى غرفة أخيها وطرقت الباب برفق لإيقاظه للصلاة.

حاولت أن تتقمص شخصية والدتها في البيت منذ هذه اللحظة، وأن تُعوّض نفسها عن فقدانها، كما كان لزوجته أخيها الدور الأكبر في سد هذا الجانب؛ فهي بالنسبة لها أمًا ثانية منذ أول يوم أتت فيه إلى هنا.

بدأ العام الجامعي الأخير لأحمد، وتلك الفتاة التي رآها في السيارة لا تفارق باله، يودُّ لو يعرف من هي وكيف يتقدم إليها، ويتمنى أن يراها من جديد... خرج من باب كليته وعينه تبحث عنها في كل مكان، لا يعلم لماذا يفعل ذلك، لكنه يفعله بشكل تلقائي دون تفكير؛ وإذ به فجأة يرى «رقية» وحولها بعض الزميلات!

وجّه النظر إليهنّ وهو يتساءل: «هي دي فعلاً، وللا أنا بيتهيأ لي؟! مش معقول تكون هيّ، أنا مش في فيلم هندي أتخيل البطلة ألاقوها قدامي!.. لأ هيّ، والله هيّ، طيب أعمل إيه؟! لازم آخذ رقم والدها وأتقدم، لازم المرة دي آخذ الخطوات الصح وأتقي الله».

انتظر بعيداً حتى ابتعدن عنها، لا يعلم لماذا كُنَّ يتحلّقن حولها، ولم ينشغل إلا بكيفية الحديث إليها.. كانت قد

خَطَّتْ بَضْعَ خُطُواتٍ فِي بَهْوِ الكَلِيةِ؛ اقْتَرَبَ مِنْهَا وَأَوْقَفَهَا
مُعْتَذِرًا عَلَى تِلْكَ الطَّرِيقَةِ:

- سَلامَ عَلَيْكُمْ.. أَنَا مُتَأَسِّفٌ جَدًّا عَلَى طَرِيقَتِي دِي،
لَكِنْ هُمَّا خَمْسَ ثَوَانٍ بِالظَّبِيطِ!

- حَضْرَتُكَ عَاوَزَ إِيَّاهُ؟!

- صَرَّاحَةٌ مِنْ غَيْرِ مَقْدَمَاتٍ أَنَا مُعْجَبٌ بِشَخْصِيَّةِ
حَضْرَتِكَ، وَعَاوَزَ رَقْمَ الْوَالِدِ..

أَشْعَرَتْهَا هَذِهِ الْكَلِمَاتُ بِالْحَرْجِ، لَكِنْ لَمْ تَدْعُ لَهُ فَرَصَةً إِلَى
أَنْ يَزِيدَ، وَرَدَّتْ عَلَيْهِ مَبَاشَرَةً قَبْلَ أَنْ يُضِيفَ جُمْلَةً جَدِيدَةً
«حَضْرَتُكَ أَنَا مَخْطُوبَةٌ.. سَلامَ عَلَيْكُمْ».. انصَرَفَتْ مِنْ
أَمَامِهِ وَكَلَهَا خَجَلٌ، وَتَقُولُ فِي نَفْسِهَا: «لَوْ فِي نَصِيبِ رَبِّنا
هَيْسَلُ الطَّرِيقِ مَهْمَا حَصَلَ، وَأَنَا بِرَبِّي وَاثِقَةٌ»

- رَبِّنا يَيْسِرُ لَكَ وَيَحْفَظُكَ.. مَا فِيشْ نَصِيبٌ!.. قَالَهَا
أَحْمَدُ فُورَ انصَرَفَها وَقَلْبُهُ يَدُقُّ أَسْفًا، لَكِنَّهُ رَضِيَ بِمَا كُتِبَ
لَهُ، وَدَعَا اللَّهَ أَنْ يَرْزُقَهُ ذَاتَ الدِّينِ تِلْكَ الَّتِي سَتَشَارِكُهُ
حَيَاتِهِ الْقَادِمَةَ، وَلَعَلَّ هَذَا كَانَ اخْتِبَارًا مِنَ اللَّهِ لَهُ لِقِيَّاسُ
قُوَّةِ عَزِيمَتِهِ عَلَى التَّوْبَةِ النَّصُوحِ، وَحَمْدِ رَبِّهِ أَنْ هَذَا جَاءَ
مُبَكَّرًا؛ حَتَّى لَا يَنْشَغَلَ بِهَا وَيُعْلَقَ بِهَا قَلْبُهُ، وَتَرْكُ أَمْرِهِ
لِلْقَدِيرِ الْمُدَبِّرِ.

شعرت بيدٍ تربت على كتفها؛ التفتت فوجدتها «حسناً»
تنظر إليها بابتسامة تُخفي وراءها الكثير من الندم بعدما
ابتعدت عنها دون سابق إنذار رغم حسن معاملتها،
حدّقت عينيها في وجه حسناء، ثم أشاحت بوجهها عنها
وخطت بعيداً؛ أسرعت لتُلحق بها، وضميرها تشتعل ناره:

- استني يا رقية.. أنا عارفة إني غلطت، وغلط كبير
كمان، لكن خلاص الحمد لله عرفت غلطتي، وربنا يغفر
لي بقى، وبعدين فين رقية المتسامحة البشوشة؟!

- معلش، شويّة ظروف يا حسناء.. ربنا يغفر لك.

- اللهم آمين.. طب مش هتقولي لي مبارك طيب؟!

- مبارك على إيه؟!

- كتب كتابي على ابن عمي بعد أسبوع وإن شاء الله
بعد ما أخلص السنة دي هنسافر الكويت.

- بارك الله لكما.. بس مش أنت كنتِ مخطوبة لجاركم
زمان؟!

- لأ، مافيش نصيب.. الحمد لله.

- ربنا يكتب لك الخير حيث كان.. عن إذنك.

التقت رقية بهايدي في مسجد البنات بالجامعة، وبعد
انتهاء الصلاة، مكثتا في المسجد، وقصّت لهما ما حدث،

وكيف كان ردّها، وتعتقد أن هذه طريقٌ يسرّها الله كما
دعته من قبل، ولكن كيف وقد اقترب موعد زواجها كما
هو مقرر عقب انتهاء العام الدراسي؟!!

اعتدلت في جلستها بعدما كانت تجلس جلسة التشهد،
واستدارت نحو هايدي متسائلةً:

- تفتكري ربنا استجاب لدعوتي، ووضع محبتي في قلبه
زي ما دعيته زمان، وإن دي سبيل من سبل التيسير؟!!

- مش عارفة!!.. بس يا بنتي أنت مخطوبة، وخلاص
كلها كم شهر وهتكتبوا الكتاب.. يعني هيجي منين
السبيل للزواج بأحمد كده؟

- مش يمكن يحصل حاجة وما نكملش مع بعض؟!!

- الله أعلم بقى.. بس أنت ما تشغلش نفسك بالموضوع
ده، وشيلي فكرة إن يحصل حاجة وتفرکشوا دي؛ عشان
كده هتلاقي نفسك بتلكّكي وخلاص وفاكراها رسالة
من ربنا، وبعدين «خالد» ما شاء الله ما فيش أحسن منه.

- عندك حق يا دودو.. هو ممكن فعلاً يكون شيطان،
تسلميلي يا حبيتي على النصيحة، ثم سألتها: بمناسبة
الجواز صحيح.. مش هنشيل لك «نونو» قريب بقى وللا
إيه؟!!

- والله مش عارفة يا رقية! أدلنا كثير بنعمل تحاليل ورايحين جايين على الدكتور، وما فيش حاجة جديدة! وأهو الدكتور قال كلها كم أسبوع إن شاء الله وهعمل عملية.. بس أنا خايفة أوي وحاسة إن الموضوع كبير أوي.
- معلىش يا حبيبتى ربنا يراضيك، ويرزقك بذرية صالحة.
- اللهم آمين يا رب!

حان الوقت لإجراء العملية، وهايدي وزوجها ينبضان قلقاً، يحاول أن يتماسك أمامها حتى يُطمئن قلبها، وتلك الصائفة منذ الصباح استعداداً للعملية التي لا تعلم ما هي منكبّة على المصحف، تتلو الآيات وتتوقف من حين إلى آخر لتستغفر ثم تستأنف التلاوة، وتشعر وكأنها لن تخرج للحياة بعدها!

اصطحبتها الممرضة لترتدي الملابس المخصصة للعمليات؛ استسلمت لأمر الله وتوكلت عليه، أما عادل فينتظر بالخارج ولسانه يهمهم بالدعاء لزوجته من شدة قلقه حتى أتاه الطبيب قبيل دخول غرفة العمليات ليخبره بتفاصيلها:

- أستاذ عادل! دقيقة من فضلك.

- تحت أمرك يا دكتور.

- طبعاً حياة المدام عندك أهم من أي شيء...

- قلقنتني يا دكتور.. هو في خطر عليها؟!

- إن شاء الله ما فيش خطر عليها ولا حاجة، لكن لو ما عملناش العملية دلوقتي أو في أسرع وقت هيبقى في خطر..
للأسف الشديد اتّضح لنا من الفحوصات والتحليل إن
رَحِم المدام مصاب بفيروس اسمه «الفيروس الحليمي»
اللي هو للأسف سرطان في خلايا الرحم!

- إيه؟! ..! يعني إيه؟

- يعني للأسف لو ما استأصلناش الرحم؛ هيبقى في
خطورة على حياة المدام! وما قُدامناش حل تاني غير كده!
- يعني ما فيش خلفة؟! .. أو ما الطبيب تأكيداً لكلامه.

- عن إذنك.. سقط مكانه وهو يرثي حاله:

- يا لهوي!.. يعني مش مكتوب لي إني أكون أب؟!
عملت إيه بس أنا في حياتي؛ عشان ربنا بيتليني بالبلوى
دي؟! ..! أستغفر الله العظيم أنا هكفر وللا إيه؟! الحمد لله
على كل اللي يجيبه ربنا، المهم هي تقوم لي بالسلامة، وكفاية
عليّ إني أشوفها مبسوطة.

بعد إجراء عملية الاستئصال بوضع ساعات استعادت وعيها بعد انتهاء مفعول المُنخدر (البنج)، دخل عليها بوجهٍ بشوش حتى لا يجرح مشاعرهما، وهي من الأساس لا تعلم ماذا حدث، مسح على رأسها وحمد الله على خروجها سالمةً، ولم يَزِدْ على ذلك حتى انتهت الإجراءات وعادا إلى البيت.

دخلت عُلا البيت قبيل غروب الشمس وقلبها يدق خوفاً وقلقاً، لا تؤذُّ أن يراها أحد، تلفتت في أرجاء غرفة الاستقبال ولم تجد أحداً، يبدو أن والدتها نائمة، فهي تسهر إلى الصباح وتنام طوال النهار، وأخوها لا يعود قبل الثانية عشرة ليلاً.

تنهدت أنفاساً متسارعة وأسرعت إلى غرفتها، وأغلقت الباب والنافذة بإحكام، ارتدت ملابس البيت، وأخفت ما كانت ترتدي تحت سريرها حتى لا يراها أحد، وقررت إلقاءها في صندوق المهملات العام في أقرب فرصة تُتاح لها.

استلقت على السرير والدموع سيول على وجنتيها، لا تنقطع مع تكرار تجفيفها، ترى نفسها بلا قيمة بعد ما حدث، كيف سلمت جسدها بتلك السهولة؟ بل كيف وصلت لهذه الدرجة العالية من الثقة فيه، أهذا لأن كلامه المعسول لامس مشاعرهما في وقت تحتاج فيه إلى كلمة طيبة؟!

نعم كان يحبها وقدّم أقوى الدلائل على ذلك، حاول مراراً أن يتقدم لخطبتها ورُفض بحجة أنها لا تزال صغيرة، ولكن كيف يرضى لنفسه أن يفعل ذلك بمن أحبها؟! ألقت اللوم على أبيها الذي لم يُعطِ لها فرصة من الأساس كي تحدثه عنه، ولم يُكلّف نفسه بالعودة ولو لأيام كي يقابله، وترك الأمر لأمها وأخيها، لكن كل هذا ليس مُبرراً لاستجابتها لطلبه بهذه السرعة!

اسودّت الحياة في وجهها، لا تعلم كيف ستواجه المحيطين بعد تلك الورطة، لكنّها لا تزال تثق في حُبّه لها؛ رأت ذلك في عينيه واستشعرت خوفه عليها، وكيف ندم عقب فعلته، ووعدّه لها بالألا يتركها.. ولكن لماذا كل هذا القلق والخوف؟! أليس زوجها؟ نعم زوجها وسلّمها ورقتي الزواج العُرفي دليلاً على أنه لن يتركها وتصدقاً لحبه.

قامت واعتدلت في جلستها وأخذت نفساً عميقاً، لن تحزن ثانية؛ فذلك سيلزمهم الموافقة عليه وسرعة زواجها به كما اتفقا، كان لابد من وضعهم أمام الأمر الواقع ليعلموا أنها ليست صغيرة كما يظنون، كان لابد من حدوثه كي يصل حبهما إلى هدفه.

وأخرجت هاتفها من حقيبتها لتتصل بـ «مارفيللا»، تريد أن تفضفض لها وتخبرها بما داخلها، فهي تعلم ما بينهما جيداً، وكانت سبباً في تقوية علاقتهما، وساعدتهما في

الزواج.. كررت الاتصال أكثر من مرة ولا ردّ، ثم بعدها
أُغلق الهاتف!.. ارتبكت حينما سمعت صوت أقدام تتسلل
إلى غرفتها ببطء، وفجأة طُرق الباب.. «افتحي يا لولو»

- لولو؟!.. مين برا؟

- عم أمين، افتحي يا بنتي.. اقشعرّ جسدها بمجرد
سماعها الاسم، وتعجبت لأسلوب علاء الذي تغيّر، منذ
متى وهو يدلّ لها؟

- عاوز إيه يا علاء أنا هنام.

- مافيش، كنت هقعد أرغي معاك شوية، وجايب
شوكلاتة كان!

- وده من إيه ده؟

- لوحده كده.. تخيلي!

مشت على أطراف أصابعها لتفتح باب غرفتها وقد
جفت قطرات دمعها، وبدت في حالة طبيعية، انشلت من
يده الحلوى، ثم أسرع في غلق الباب في وجهه ولا تفهم
ما يحدث، وهو بالخارج قد فار غضبه، لكنه تذكر عهده
الذي اتخذه منذ عام، واستطاع أخيراً أن يُنفذ؛ فترى
وداعها قائلاً:

- ماشي ماشي بتضحكي عليّ؟!.. طب أبقى أشوف
وشك برا الأوضة.

نسّات الخريف تعم الغرفة بُعيد الفجر، وهدوء البيت
يُشعِرُ بالراحة النفسية، إلى جانب ترتيبها لآيات القرآن
التي تُغذي الرُّوح.. أغلقت المصحف وانكبّت على الأرض
ساجدةً لله سجدة شكر؛ فقد أتمّت رقية حفظ القرآن كاملاً
في تلك اللحظة، ثم قامت وخلعت حجابها وسحبت
كرسي مكتبها الصغير، وأخرجت دفترًا صغيرًا من
المكتب، قلبت صُفِيحاته إلى أن وصلت لصفحة الأهداف..
علّمت على هدف حفظ القرآن، ونظرت إلى الهدف التالي
«تعليم القرآن واللغة العربية».

تذكّرت والدتها في تلك اللحظة حينما كانت تُحدثها عن
حُبّها للغة القرآن، وأن هدفها الأسمى في الحياة أن تكون
سببًا في إحيائها، وإعلاء شأنها، تذكّرت ابتسامتها وهي
تربت على كتفها وتدعو لها الله بتحقيق ما تتمنى، وعادت
بالذاكرة إلى أن كانت في الخامسة من عمرها، وكانت هناء
تُمسك بيدها لتعلمها الكتابة؛ ذرفت دموعها وتمنت لو
أنها معها الآن وتشاركها فرحتها.. رفعت يديها إلى السماء
مناجيةً ربّها:

- يا رب اغفر لها وارحمها، وأسكنها فسيح جناتك، يا رب فقهنى في دينك، وعلمنى علماً نافعاً، واجعل يا رب كل حرف أتعلمه وأعلمه في ميزان حسناتها.

جَفَّفَتْ عِبْرَاتِهَا وتعاهدت أن تُعَلِّم اللغة العربية لأبناء الفقراء واليتامى في مدينتهم دون مقابل كصدقة جارية على روحها.. نهضت من مكانها وانطلقت إلى المطبخ كي تُجَهِّزَ الفطور لأخيها قبل أن تذهب إلى الجامعة؛ لأن زوجته مشغولة بصغيرتها التي لا تُهْنِئُها بنوم.

عَقِبَ انتهائها من تقديم الفطور ذهبت إلى غرفتها لتتَهَيَّأَ قبل الخروج، لكنها توقفت فجأة: «هايدي!.. يا الله! ده أنا نسيتها خالص»، أخرجت هاتفها لتتصل فوجدت الساعة لا تزال السادسة والربع صباحاً والوقت لا يسمح؛ ففضلت أن تحدثها فيما بعد، وتطلب زيارتها بعد أخذ الإذن من أخيها أولاً.

انتصف الفصل الدراسي الأخير.. وتَهَيَّأت المضيئة الخاصة بعائلة الشيخ مصطفى وتزينت بالأنوار الملونة، ورُصِّصَت الطاولات والكراسي بشكل منظم، ووُضِعَت عليها المفارشُ المزخرفةُ استعداداً لحفل شبكة ابنته خديجة وعقد القران في آن واحد، وبالدخل تزين العروس

وبرفقتها رقية التي أتت باكراً لتكون بجوار خديجة التي ربطتها علاقة قوية بها قبيل وفاة أمها.

احمرَّ وجه العروس الأبيض من شدة السعادة، وقلبها يرفرف كعصفور صغير، وتتايل يميناً ويساراً وتدور كالفراشة أمام رقية، أخرجت عُلبة «الشَّبكة» لثريها إياها، ورقية تنظر في سعادة.

- ما شاء الله ما شاء الله جميلة أوي الشبكة يا خديجة،
مُبارك عليكِ يا حبيتي

- عقبالكِ أنتِ وخالد يا رُقِيَّة

- رُقِيَّة؟ هاهاها، حلوة دي! هانت كلها كم شهر إن شاء الله، بس هو أنتوا ليه مستعجلين كده؟ خالتو بتقول إن العريس لسه بيدرس هو كمان!

- هو لسه بيدرس بس عاوز ياخذ راحته في الكلام معايا، وده كمان اقترح بابا، بيقول هنا آخر ليه؟ الرجل دخل البيت من بابيه، وعاوز الحلال يبقى خير البر عاجله.

- ربنا يتمم لكم بخير يا رب.

- يا رب آمين.. وبصراحة هو محترم جداً، والشيخ مصطفى بص لي كده وقال لي: -بصي بقى يا بنتي النبي

- صلى الله عليه وسلم - قال: «إذا جاءكم من ترضون دينه وخلقه فزوّجوه» وأهو الواد على دين وخلق، وخلينا نخلص منك بدري بدري بقى.

تعالّت ضحكاتهما على أسلوب خديجة وهي تُقلد والدها، واخترق صوت الزغاريد جدران الغرفة، يبدو أن العريس قد وصل؛ هرول الفتاتان نحو النافذة؛ ليستكشفا سبب الزغاريد المفاجئ هذا.

قد وصل العريس بالفعل، ووجه العروس زاد بهجة، وصارت تدندن «ما تزوقيني يا ماما أوام يا ماما، ده عريسي هياخدني بالسلامة يا ماما» لكن رقية وقفت مكانها وتغيرت ملامحها فجأة فور رؤيته، وحدقت جيداً في تعجب لما ترى...



النَّيَّةُ الطَّيِّبَةُ مِفْتَاحُ لِلْأَشْيَاءِ الْجَمِيلَةِ؛ فكم من شَخْصٍ رُزِقَ
بَنِيَّتِهِ الصَّافِيَةِ أَكْثَرَ مِمَّا يَتَوَقَّعُ وَيَتَصَوَّرُ.

حمدي غنيم



الفصل الثامن

الأمر يزداد سوءاً كل يوم ولا تدري ماذا تفعل! لا تعلم لماذا لا تستجيب مارفيللا، وأمين قد نقض عهده وتحلّى عنها، ألهذه الدرجة أصبحت رخيصةً في نظره؟ أم ذهبَت تلك المشاعر هباءً، أم أنها كانت مُحْطَّةً عندما اطمأنت له وأتبعَتْ قلبها دون أن تفكر في عواقب الأمور؟!

منذ تلك الحادثة وهي لا تذهب إلى الجامعة، وفي أغلب الوقت تفكر فيما حدث، وعقلها مشّت لا تعلم كيف تتصرف، ولم تعد تهتم ببشرتها وهندامها المعتاد في البيت؛ تجعّد شعرها، وتجحّظت عيناها من النوم شبه المنعدم، وظهرت على وجهها ملامح الكبر وهي لَمَّا تُتِم العشرين بعد، وكاد جسدها أن ينحل من قلة الطعام وعدم انتظامه، بل زاد الجُرح ألماً وقد تأخرت «الدورة الشهرية» عن موعدها المعتاد هذا الشهر! تأخرت أسبوعاً بأكمله!

دخلت المطبخ لتحضير كأس ليمون؛ عسى أن تسترد صفوها الذي عكّره الدنيا، أمسكت بالكوب لتنظفه جيداً قبل أن تعصر الليمون؛ فهي موسوسة بالنظافة، ازدوجت رؤيتها ورأسها دارت؛ سقط الكوب من يدها، ولم تلبث ثانية حتى سقطت على الأرض بعده!

انتفضت عفاف من مكانها عندما سمعت صوت الزجاج الذي كُسر، هرولت إلى الداخل؛ فرأت ابتها مُلقاة على الأرض وتغيب عن الوعي؛ انقبض قلبها وظلت تُربت على وجهها حتى أفاقها:

- ما لك يا حبيتي؟.. إيه اللي حصل؟

- مش عارفة يا ماما دوخت فجأة كده ووقعت.

- من قلة الأكل.. أنتِ ما لك الأيام دي لا بتنزلي ولا بتاكلي كويس! في حاجة حصلت في الجامعة؟ حد مزعلك؟

- لأ، ما فيش خالص، ما فيش لأ ما فيش، ما فيش حاجة مهمة، الامتحانات قربت بقى وما فيش محاضرات الأيام دي - كانت تتمم بالكلام وجسدها يرتجف -

- طب قومي طيب وأنا أعمل لك حاجة تاكليها.

ساعدتها لتجلس على كرسي بجانب الحوض وناولتها كأس ماء، وشرعت في تحضير الفطور.. لا تستطيع أن تأكل

لكنها استجابت لطلب والدتها وأكلت رغماً عنها، حدّقت في وجه أمّها وضغطت على أسنانها، ووضعت يدها على فمها ويدها الأخرى تعصر معدتها محاولةً تخفيف الألم، ثم انكبّت على الحوض وتقيّأت كل ما أكلته.

- اسم الله عليك يا بنتي، لأ إحنا كده لازم نروح نكشف ونشوف في إيه.

- لأ يا ماما ما فيش حاجة أنا كويسة.. بلاش دكتور.

- كويسة إيه؟ أنا لسه هستنى لما تموقي قدامي؟! يلا خلينا نشوف مالك.

- برد بس في المعدة وهيروح.

- لأ، أنا مش مطمّنة.. هو الدكتور اللي هيطننا.

قطعت خديجة انتباهها وذهولها فجأةً وهي تعانقها من شدة فرحها وعبراتها تجمّعت في مقلتيها، ثم تسلّلت على وجنتيها وهي تعانق رقيقة.. وترسم على وجه رقيقة ابتسامة دالة على فرحها، لكن عقلها سارح في دعوتها القديمة، ها هي تظهر معالمها، قد استجاب الله لها وأراحها من انشغال عقلها به، وكانت خطبتها مرحلة جديدة في عهدا أمام ربها، حتى وإن راودتها

الأفكار من جديد؛ فقد كُتب لها أن تنتهي الآن.

هنا وهي ترى إشارة قطعية أنها ليست له، نعم هو ذاك الذي انشغلت به، جاء ليتزوج من أخت خطيبها، الآن يجب أن ينسدل الستار ويُعلنَ نهاية تلك التخيلات التي شغلتها.. أخذت نفسًا عميقًا تحمل ذراته الارتفاع:

- الحمد لله، ما فيش نصيب.. انتبهت إليها خديجة؛ فبادرت بالسؤال عن حالها التي تغيرت فجأة:

- ما لك يا رقية؟.. وإيه اللي ما فيش نصيب؟!

رفعت رأسها بعدما كانت وجهته نحو الأرض عقب العناق، ووجهت نظرها نحو خديجة في انتشالٍ لتركيزها، واتسعت ابتسامتها أكثر

- ما فيش يا حبيبتى.. بارك الله لكما وبارك عليكما وجمع بينكما في خير.

- اللهم آمين، وعقبالك أنتِ وخلود.. مستتية اليوم ده بفارغ الصبر، وأنا شايفة خالد لابس البدلة كده وقاعد جنبك على الكوشة.

ثم ضمّت خديجةُ علبة الذهب التي كانت تمسك بها إلى صدرها، وشرد ذهنها وهي تقعد ببطءٍ على حافة سريرها، ونظرت إلى رقية وقد ظهر على وجهها القلق

فجأةً بعد السعادة التي كانت تغمرها، وقالت بصوت لا يكاد يسمع:

- أنا خيفة!.. خيفة أكون اتسرعت لِمَا وافقت على أحمد، ولِسَّه مش اتعرفت عليه أوي، مش عرفت طِباعه ولا أسلوب حياته ماشي إزاي.. وثِقْتِي في بابا وفي اختياره كانت هي السبب إني أوافق بسرعة، ومش طلبت حتى وقت أفكر، والي مخوفني أكثر إن الحاج هو الي رشحني له مش هو الي اتقدم لوحده.. قاطعتها رقية وهي تُخرج ضحكة ساخرة:

- يعني عمو مشي على مثل «اخطب لبنتك وما تخطبش لابنك» بس هي إيه الصلة الي بين خطيبك وبابا الي تخليه يثق فيه كده؟!

- والله يا أختي مش عارفة، لكن بابا بيقول إنه شاب محترم وعلى خلق، وإنه اتعرف عليه في المسجد وكان بيعجي له البيت كتير.. وبصراحة هو محترم فعلاً ومش عمل أي حاجة وحشة لحد دلوقت، وبعدين الشيخ مصطفى ده مُحْضَرَم مش بيَطْمَن لأي حد كده وخلاص، ولا بياَمَن لحد غير لِمَا يتأكد إنه صادق.

- أقول لك سر كمان عن الحاج؟! بس ما تعرفيش خالد عشان هيزعل!

- خير؟.. قولي

- بابا خلّاني عملت له حساب على «الفيس بوك» أول ما خالد دخل الجامعة باسم «الناصح الأمين» وخالد كان فاكهه حد غريب، وقعد يحكيه على الي بيحصل معاه في الجامعة، وأسرار وكده.

- يا الله!.. وخالد عرف وللا لأ؟

- بابا عرّفه بعدين بقى لَمَّا خطبك...

- المهم سيك من الأفكار دي ويللا تنفرج عليهم وهُمّا بيكتبوا الكتاب، وإن شاء الله يكون زوج صالح وعند حسن ظن عمو مصطفى.

ارتجفت غُلا واقشعرّ جسدها حينما لامست سماعه الطيب الباردة جلدها، حدّقت عيناها في وجه الطيب المشغول عنها فيما تُرشده إليه سماعته، وتتسارع دقات قلبها، وتُهمهم بالدعاء راجيةً من الله أن يسترها، تخشى أن يكون قد حدث ما تخافه وينكشف أمرها، بل ستكون كارثة وصدمة لو الدتها.. اتّسعت ابتسامة الطيب وتلاّأت عيناها؛ فانشرح صدر عفاف لتعبيرات وجهه، وسألته متلهفة:

- خير يا دكتور.. طمّني عندها إيه؟!

- ماتقلّيش يا فندم خير إن شاء الله، ما فيش أي حاجة ده طبيعي جدًّا في الأول، وواضح إنها أول مرة.. لم تفهم ما يقصد، وطرق الشك باب قلبها، وتنقّلت نظراتها بين الطبيب، وابتتها شاحبة الوجه.

- مش فاهمة قصدك يا دكتور! هو إيه الي أول مرة؟!

- المدام حامل في الشهر الثاني، وطبيعي تدوخ وما يبقاش عندها قابلية للأكل!

تسمّرت مكانها وهي تحاول أن تستوعب ما تسمعه أذناها، ووجهت نظرتها الغاضبة نحو علا.

- ألف مبروك يا فندم! انتشل قوله تركيزها؛ ووجدت نفسها تحوّل وجهتها إليه، وقد ارتسمت على وجهها ابتسامة مصطنعة، وابتعلت ريقها، وأردفت دون إرادة:

- الله يبارك فيك يا دكتور.. فرّحتني! واصطحبت ابتتها وخرجت دون أن تلفظ حرفًا.

لم تنطق عفاف بحرفٍ طوال الطريق، وتسيطر عليها حالة من الذهول واللا تصديق، لا تُصدّق ما سمعت، لا تعرف ماذا ستفعل، ابتتها الوحيدة غرست رأس أسرتها في الطين، وكسرت أعينهم أمام من يتظاهرون أمامهم بعلوّ

المكانة الاجتماعية، وعُلا بجانبها في السيارة يرتجف قلبها، ويرسم عقلها أمامها ما تتوقع أن يحدث بعد علمهم.

فتحت الباب بعنف، وقد اشتعلت أعصابها هَبًّا، وجذبتها إلى الداخل وانهاالت عليها بالضرب، لا تعلم أين وكيف تقع يدها؛ فالغضب تمالك منها وشوش بصرها، والمسكينة لا تحرك ساكنًا، تبكي وتحسر فقط... توقفت عفاف عن الضرب، وجلست على كرسيٍّ ودموع الخذلان تسيل على وجهها، وصارت ترثي الحال التي وقعوا فيها:

- ليه؟! عملنا لك إيه عشان نُحطِّي راسنا في الطين كده؟.. أحسن أكل وأحسن لبس، وما فيش طلب بيترفض، ليه تعملي فينا كده؟ منك لله.

لم تنطق عُلًا وظَلَّت تبكي وهي متفوقةة في نفسها، وتضع رأسها على ذراعيها الموضوعين على ركبتيها.

نظرت عفاف لتلك الحال التي وصلت إليها ابنتها، وتتصارع الأفكار في عقلها، أقصرت حقًا في تربية ابنتها ولم تكن على قدر المسؤولية؟ ولكن كيف وهي مثال للأُم «الديمقراطية» التي لا تُضَيِّق على أبنائها، وتركت لهم الحرية في الاختيارات؟! ولكن يبدو أن المبالغة في إطلاق الحرية أتت بنتائج سلبية ويجب عليها المحاولة - وإن كانت بعد فوات الأوان - لترميم ما مَحَطَّم.

نهضت من مكانها وجلست بجوار ابنتها، وضمتها
بين ذراعيها، المرة الأولى التي تشعر فيها بحضن الأم هذا!
زادت سيول الدموع المتدفقة من عينيها، دموع كدموع
فرحة المتلهّف لرؤية حبيب طال انتظاره.. طالما افتقدت
هذا الاحتواء، بل لم تَذُقْ طعمه من قبل، وكأنها وجدت
أمرًا بحثت عنه كثيرًا ولكن لم تكن تعرف ماهيته.

جفّفت دموع ابنتها، ومسحت على شعرها وكأنها
طفلة صغيرة، وحدثتها بنبرة يملؤها الحنان محاولةً تفهّم
الأمر من أجل الوصول إلى حل.

- فهميني يا بنتي إيه اللي حصل بالضبط، ومين اللي
عمل فيك كده، وإيه اللي سَكَّنَكَ لحد دلوقتي؟

- مش عارفة أقول لك إيه! بس لو كنت أنا غلطت؛
فأنتم السبب في ده، وبالذات أنت!

- أنا؟!.. ليه بس يا بنتي ده أنا عمري ما رفضت
لك طلب، ومش مخلياك محتاجة أي حاجة!

- هي دي المشكلة! كل حاجة عاوزاها بتجيلي، وما
فيش حاجة يتقال عليها لأ، فاتعودت على إن كل المطلوب
متحقق وموجود، ولما قُلتوا لأ كانت اتأخرت أوي؛ فكان
لازم أعاند وأعمل أي حاجة عشان يتعمل لي اللي عاوزاه..
الشاب اللي حسّسني بوجودي وأنوثتي وقلبي اتعلق بيه،

ورسمنا مستقبلنا مع بعض، لَمَّا حاول يتقدم زي أي حد
مُتمسك باللي بيحبها؛ قُلْتُ له لَسَّه بتتنا صغيرة وما فيش
جواز قبل اللسانس؛ فعشان بيحبني ومش عاوز يتخلى
عني، قال لي نتجوز عر في لحد ما نخلص دراسة!

- عُر في؟!

- أيوا عُر في.. عُر في عشان عمري ما حسيت بوجود
الأم، والأب مش بَشُوفه غير مرتين تلاتة في السنة، وكل
همكم إزاي توفروا الفلوس.

- يعني إحنا غلطانين إننا عاوزين نأْمَن مستقبلكم،
ومانخليكو مش محتاجين حاجة، وماشين رافعين راسكم
قدام الناس في زمن الفلوس فيه هي كل شي؟

- راسنا مرفوعة؟! ما خلاص راسنا بقت في الطين،
والفلوس عمرها ما هترجع ولا هتصلح اللي اتكسر!
غلطانين لما ما سَدِّتُوش احتاجي للعطف؛ فأول كلمة
حلوة علقنتني ووصلتني لمرحلة إني أفقد نفسي.

- طب فين ورقة الجواز العر في؟.. ده أنا همرطه في
المحاكم وأخليه يبجي مذلول يطلب السماح.

- قصدك الورقتين، اللي خلاهم معايا؛ عشان يثبت لي
إنه صادق، لكن بعد اللي حصل خلاص حتى تليفونه
غيره!

- أيوا يعني فين الورقتين دول؟!.. أشاحت بوجهها بعيداً، وارتجف جسدها دون إجابة عن سؤال أمها، حتى أعادت سؤالها بنبرة أعلى من سابقتها؛ فقالت بكل حسرة وندم، وقد تسارعت عبراتها وسالت من جديد:

- للأسف ضاعوا!

- ضاعوا؟!.. ضاعوا إزاي؟!

- اتغسلوا في الهدوم!.. وضعت عفاف يديها على رأسها وصارت تتحسر، وتندم على ابتتها التي ضاعت بسبب سوء الرعاية والتوجيه.

استيقظت في الثامنة صباحاً وتملؤها الحيوية والنشاط، كاد الشهر السابع من حملها أن يكتمل، نزلت ببطءٍ من على السرير وهي تحمل بطنها المنتفخ أمامها، دخلت مطبخها وأسرعت في تجهيز الفطور لزوجها قبل أن يذهب إلى الجامعة (فقد عُيِّنَ «خالد» مُعيداً بكلية الآداب فور انتهاء دراسته، وقد قُبِلَ تظلمه في مادتي الفرقة الأولى ونجح فيها!) وحملته إلى غرفتهما، وربت على وجهه بلطف لتوقظه.

فتح عينيه فوجدها أمامه ويدها إناء من الألومنيوم تضع عليه الفطور؛ ابتسم وهو ينظر إلى وجهها البشوش

المبتسم، الذي سبقه بنظرة طيبة تحمل الحب والأمل،
وصوتها الحنون يُحييه:

- صباح الخير يا سيادة المؤرخ الأديب.

- صباحك سكريا «روكا».. يا ربي! أفتح عيني كل يوم
وأنا مبسوط كده؟ ربنا ما يحرمني من ابتسامتك المبهجة دي.

- ولا منك يا حبيبي.. يللا قوم بسرعة بقى بلاش
كسل؛ علشان ما تتأخرش.. ما يرضيش إن زوجي يتأخر
عن أول محاضرة كده.

- حاضر يا نور عيني.. بس أنتِ ما تحرميش من
ابتسامتك اللي بتفاعل بيها دي.

- عيني.

- تسلم لي عُييتاك.. اتسعت ابتسامتها متعجبة:

- عُييتاك؟! ما شاء الله بتعلم بسرعة أهو.

- كفاية إن في قلبي أنسى درعية، ده يكفي إنني أكون
الخليل بن أحمد في اللغة العربية.

- ماشي يا عم سيبويه.

استندت عليه مُشبكةً في ذراعه بيدٍ، واليد الأخرى
تمسك بها ظهرها كي تتزن مشيتها حتى وصلا إلى باب

الشقة، ودّعته داعيةً له بالتوفيق، ثم التفتت ووقعت
عينها على الحائط المقابل للباب، خَطَّتْ خُطوات هادئة
بقلب مُنشرح إليه، وفتحت الستار الذي يُخفي تلك
اللوحة المعلقة، وعادت بها ذاكرتها إلى يوم زفافها...

حملها على ذراعيه إلى باب مملكتها الصغيرة، ثم أنزلها
من على ذراعيه وطلب منها أن تغمض عينيها، وأخرج
مفتاح الشقة من جيبه، وفتح الباب برفق ووضع كفه على
عينها حتى يتأكد أنها لا ترى، وتسلك أمامها إلى الداخل،
وأنا الأضواء، وهو يسحب يده من فوق عينيها:

٣ - ٢ - ١ .. افتحي عينك.

- روكا؟! .. فتحت عينيها فوجدت أمامها لوحة كبيرة
على الحائط مكتوب عليها باللغتين العربية والإنجليزية:
«أميرتي روكا .. مرحبًا بك في مملكتك الصغيرة»

«ROKA my queen .. Welcome to your small kingdom»

أدخلت تلك المفاجأة السرور على قلبها، وصارت
تضحك فرحًا كطفل كافأه والده لتفوقه، جففت عبرات
الفرح التي تسالت على وجنتيها، ويدها تغطي ثغرها
المتبسم، وهي تتناقل النظر بلهفة بين اللوحة وعريسها

الذي احمرَّ وجهه من شدة سعادته؛ فقد حانت أخيراً اللحظة التي انتظرها كثيراً؛ تزوج فتاة الأحلام التي ستُعطِّرُ بيته بأريج الذكر، وتُنيره بطاعة الله ومرعاة أوامره، الزوجة التي تعرف واجباتها وحقوقها.

تطايرت الحروف من على ألسنتهم، والقلوب ترفرف من السرور، لا تعرف كيف تعبر عن ذلك، وأي كلام يصفه؟! أطالت نظرتها نحو اللوحة ذات الأضواء الملونة، والقلوب التي تتبادل الألوان حول اسم روكا، وسألته متعجبةً:

- روكا؟! جميل أوي روكا ده!

- ده بس عشان اسمك.. نظرت إلى الأرض حياءً، وقالت بصوتٍ خجول، وهو يرفع وجهها نحوه:

- عارف!.. أنا بحب اسم «رُقَيَّة» جداً، بحس بفخر اللغة العربية كده وأنا بسَمَعه، وأي حد يقول رقية بالهمزة، بقول له لا، قُلْ رُقَيَّة بالقاف، بس «روكا» ده عجبني جداً.

- وكلامك ده أسعدني جداً. عارفة يا روكا... (قاطعه)

- عارف أنت ليه عجبني؟!

- ليه؟!

- عِلْشان من خُوَيْلد!

- خُوَيْلد؟! .. يعني إيه؟! .. تقهقت وأردفت:

- في حاجة في اللغة العربية اسمها التصغير، وخُوَيْلد ده
تصغير خالد، والتصغير ده للتقريب من القلب مش حاجة
تاني.

- خُوَيْلد.. خُوَيْلد.. خُوَيْلد.. يا الله، حلو أوي الاسم
ده، بس إيه الرومانسية اللي نزلت فجأة على الدراعمة
دي؟! .. ده أنا كنت حاسس إني خاطب واحد صاحبي،
وكان كلامك بحساب.

- ما خلاص بقى بقيت حلالك، وربنا محلي أدلّعك،
قبل كده كنت لسه أجنبي، وللا إيه رأيك؟!!

تسمّر في مكانه فجأة، وهو ينظر إليها، ثم جذبها من
يدها متجهاً إلى غرفة النوم: تعالي هورّك حاجة...

جيلُ رُعاةٍ لا يعلمون عن التربية إِلَّا قليلاً، يظنون أَنَّهُم
يُنْجِبُونَ الأبناء ليخدموهم وَيُطِيعُوهم دون إبداءٍ لآرائهم
أو إثباتٍ لذواتهم وشخصياتهم، وأنَّ دورهم منحصِرٌ في
توفير مطالبهم فقط دون تكوين لِكِياناتهم الخاصة؛ فيبحث
هؤلاء المساكينُ عن مَنْ يهتم بكلمة أو سلوك، ويسقطون
في الهاوية دون دراية!

محمد الباسم

الفصل التاسع

يتجدد حبسه على ذمة القضية في كل جلسة محاكمة، وهو ينتظر الحكم؛ حتى يهدأ ويعرف مصيره الذي طال انتظاره.. يستلقي علاء على الأرض ويضع ساقه اليسرى فوق اليمنى، وينظر إلى سقف الغرفة، يستعيد ذكرياته الأليمة...

لم تنجح محاولات «عماد» في استرداد حق ابنته رغم تشابك علاقاته، بعدما ترك العمل بالخارج وعاد ليُصلح ما فسد، ومع مرور الشهور يزداد الأمر تعقيداً، ولم يجدوا اسم «أمين» مسجلاً في كشوف الكلية، واكتشفوا أنه كان اسماً مزيفاً، وكانت الشقة التي يسكن فيها مستأجرة ليست ملكه كما أوهمها، ولم يستطيعوا الوصول إليه بأي وسيلة كانت كأن الأرض ابتلعه عقب فعلته.

وتمسكتُ علًا بحملها ولم تستجب لطلبهم بالإجهاض
على أمل أن تجد من وثقت به حتى ولو انتظرتَه ألف عام،
وإن ظلَّ ابنها بلا أب، وكانت ترتدي ملابس فضفاضة؛
كي تُخفيَ بطنها الذي يزداد حجمه مع مرور الوقت.

تعجب علاء من إجازة والده التي طالت كثيرًا عن
كل مرة، وازداد عجبه حينما علم أنها إجازة بلا عودة، كان
سعيداً لأن والده الذي سافر وهو طفل صغير عاد ليعيش
معهم، لكنه لم يشعر بأن هناك تغيير في مشاعره تجاهه؛
فما هو إلا مصدر للأموال وسد الاحتياجات، وكان كثرة
خروج والديه مع «علاء» يُثير انتباهه، أيّ مرض هذا الذي
يجعل أباه يترك عمله بالخارج، ويأتي ليكون بجوار ابنته؟!
لم يهدأ حتى علم ما يُخفونه عليه دون أن يُظهر لهم ذلك.

لاحظت علا نظرات أخيها التي تُعبّر عن رغبته في
قول شيء ما، أثارت نظراته الرعب داخلها، تخشى أن
يكون قد عرف ما حدث، بل تعلم جيداً أنه إذا أراد
الوصول إلى أمر ما لا يهدأ حتى يصل؛ وضعت الملعقة
بجانب الصحن الذي كانت تتناول منه الطعام، ومسحت
فمهما واستأذنتهم في الدخول إلى غرفتها كي تنام، وعلامات
التوتر تظهر على وجهها.

وقبل أن تدخل غرفتها مرّت على دورة المياه وتوضأت،
ثم دخلت إلى الغرفة وظلت تقرأ في تطبيق المصحف بعدما

صَلَّتْ ركعتين كما اعتادت أن تفعل منذ أيام، فهي تشعر بارتياح نفسي شديد في ذلك، وكانت تبكي في الصلاة ندمًا على ما فعلت، وتدعو الله أن يُعيدَ لها «أمين» كما تأمل أنه لا زال يحبها ولكن ربما يمنعه أمر خارج عن إرادته، ثم غلب عليها النوم وسقط هاتفها الذي كانت تقرأ منه بجانبها.

تَيَقَّنَ علاء أن الجميع ناموا، وتسلسل إلى غرفة أخته وهو يتلَفَّت حوله، وقف لبرهة أمام الباب ووضع أذنه لِيَتَنَصَّصَتْ إن كان هناك صوت، وفتح الباب بهدوء ودخل يتسلسل حتى وصل إلى سريرها.. وقف ينظر إلى وجهها الذي يبدو كالطفل وبطنها الذي انتفخ قليلاً، وتذكر حديثها مع «مارفيللا» منذ أيام وهي تقص عليها ما حدث، بعدما استطاع اختراق هاتفها وتسجيل المكالمات فهو محترف في ذلك.

نظر إليها نظرةً أخيرة وقد اشتعلت نار الغضب بداخله، تخيل حاله بعدما تلد مولودها وينكشف الأمر، كيف له أن يتحمل نظرات الناس إليه وألستهم تردد ما حدث، التخيل وحده فقط يمزق قلبه...

تري أنها تسير في مكانٍ مظلم لا تعلم أين هي وما أتى بها إلى هنا، السواد يغطي المكان، تتلفت كالمختال هنا وهناك بحثًا عن مخرج، لمحت بصيص ضوء بعيدًا، هرولت إلى هنالك لتخرج؛ خرجت فوجدت نفسها بين

فريقين: فريق يرتدي ملابس بيضاء ويشع نورًا، والآخر لا تكاد ترى ملامحه أو تفاصيل جسده من شدة سواده، كلُّ من هؤلاء وأولئك يجذبها إليه، وتُصارع محاولة الهرب لكن لا مفرَّ منهما، ظلت على هذه الحال إلى أن سقطت أرضًا.

سحب الوسادة التي كانت بجوارها ووضعها على وجهها ليكتُم أنفاسها، بعدما تمكن من تكييل يديها في اللحظة نفسها حتى لا تستطيع أن تدافع عن نفسها، وهي تتلوى تحت يده كالذبيحة حتى استهلكت نفسها الأخير، وأضحت جسدًا بلا روح.

ارتجف جسمه وسقط مكانه، أُصيب بحالة من الذهول، أخته جثة هامدة ماثلة أمامه قد قتلها بيده، أين كان عقله منذ ثوانٍ؟! أذهب مع ذرات دخان سيجارته التي صارت رمادًا قبل أن يدخل؟! احتضنها ودموعه تحجرت في عينيه، حتى الدموع أبت إلا أن تمتنع عن غسل جريمته.. ظلَّ على هذه الحال إلى أن سرقه النوم.

أشرقت الشمس ولا يزال علاء على هيئته التي بات عليها في غرفة أخته، وعلى غير العادة استيقظت عفاف في الصباح الباكر من كابوسٍ مرعب: كان هناك وحش مماثل لبطل الفيلم الذي شاهده قبل نومها يلاحقها، وابنها يكبل يدها ويقدمها وجبة شهية لذلك الوحش.

لم تجد قارورة المياه بجوارها؛ فقامت من على سريرها متجهةً إلى المطبخ لتشرب، وفي طريقها مرت على غرفة عُلا، كان الباب مفتوحاً خلاف المعتاد، ابنتها تغلق الباب بإحكام خاصة بعد تلك الحادثة تحيط بها هالة من الرعب والقلق، ربما استيقظت وذهبت إلى دورة المياه!

لم تُعْطِ اهتماماً وأكملت طريقها إلى المطبخ، انتبهت إلى أن أضواء دورة المياه مُطفأة! انتهت من المهمة التي ذهبت من أجلها، وعادت لتطمئن على ابنتها، فتحت الباب بهدوء حتى لا تزعجها؛ اتسعت عيناها وربت على صدرها ودقات قلبها تسارعت بمجرد رؤيتها لهيئة ابنتها! أجنَّ الولد وراوده الشيطان إلى أخته؟! اقتربت منها وصاحت: علااا! عملت إيه؟!

فزع من نومه وحلّق في وجه والدته، وشرّد تفكيره كأنه سكران، وحجّر لسانه داخل فمه المفتوح ووجهه الشاحب، لم يستطع أن يلفظ بحرف، وأشار بيديه دلالة على اللا فهُم وعيناه تسيلان بالدموع، وبلا تفكير هرول وهرب من البيت.

اقتربت من ابنتها وحاولت إيقاظها، ثربت على وجهها وجسدها لكن لا استجابة منها! جسدها تحشّب وتغيّر لون جلدها إلى لون زهرة البنفسج ولا تتحرك، وضعت أذنها على صدرها لتُنصت إلى دقات قلبها؛ لا صوت ولا

نبض ولا أنفاس ولا حركة! ازدادت سرعة دقات فؤادها، وصارت تضرب على وجهها لطمًا وتصرخ وتصرخ باسم ابنتها.

خرج وصار يجري بلا وجهة محددة، الذهول يغمر عقله وتتسارع نبضات قلبه أسرع من خُطوات قدميه المتسابقين، كادت أنفاسه أن تتوقف، وطاقته أوشكت على النفاد، ومسام جلده أخرجت ما بها من قطرات عرق في ذاك الجسد الملهب.

جلس بجوار أول حائط قابله في تلك الشوارع الخاوية من المارة بُعيد شروق الشمس؛ استعاد وعيه وهدأت أنفاسه وذهب ذهوله، وجفت قطرات العرق، لكنّ عبرات العين حلّت محلها وأضحت أنهارًا متدفقة، لا يُصدّق أنه قتلها، أين كان عقله ورُشده وهو يسجن أنفاسها تحت تلك الوسادة؟ بل أين ذهب قلب الأخ الحامي والساند لأخته؟!

لابد من تكفير ذاك الذنب، وتطهير تلك الخطيئة، لكن أي وسيلة تُطفى نار الندم، وأي طريق تُعيد أخته للحياة؟ أماتت حقًا أم أنه يحلم؟!

نهض من مكانه وسار في الشارع الذي سحبه قدماه إليه، وقد توقف التفكير، يسير بلا فهم إلى أن رأى أمامه

قسم الشرطة! وجد السبيل إذن، العقاب قد يخفف شعوره بالذنب.

منعه حراس القسم من الدخول في هذه الساعة المبكرة، ولمّا يبدأ وقت العمل الرسمي بعد، و«عيون العساكر» تترمقه وتراقب حركاته، ويظنون أنه مجنون فقد عقله، لكن إصراره على الدخول لا تستطيع قوة أن تمنعه ولا بد منه مهما يكن.

تراجع خطوتين إلى الخلف متظاهراً بفقدان الأمل، إلى أن اطمأن الواقفون أنه سيذهب، وفي لمح البصر هرول إلى الأمام مجدداً، وركل ذاك الذي دفعه للخلف ركلة أسقطت سلاحه المحمول على كتفه؛ فتجمع الحراس المحيطون بالمكان وانهالوا عليه بالضرب حتى سقط، وأدخلوه الحجز...

أنزل ساقه من فوق الأخرى، واستقام في رقوده محاولاً الهرب من تلك الذكريات بالنوم، أغمض عينيه وسرح عقله في الأحلام؛ لم يلبث دقائق حتى نكزه أحد المحجوزين في الغرفة نفسها ليخبره أن «الشرطي» يُنادي اسمه، فقد حان موعد جلسة النطق بالحكم.

دخل خالد بزوجه إلى غرفة النوم، وأجلسها على السرير، ثم تقدم نحو مكتب صغير بجواره وأخرج منه مفكرته التي يُدَوِّن فيها خواطره الخاصة، عاد وقَعَدَ بجوارها وفتح المفكرة على إحدى الصُفِيحات، وناولها إياها لتقرأها...

«فتاتي الجميلة لا أعلم متى ألقاك، بل لا أعلم ماهي ملامح وجهك ولا أي تفصيلة عنك، ولكنني أراك تلك الفتاة ذات الدين والعفاف، المُتَوَجِّة بالأخلاق الحسنة الحميدة، والمُحَصَّنَة بالطهر والحياء، أنخيل رُوحَك التي تلاحقني في كل مكان، رُوح الزوجة والصديقة والحبيبة.

قد بحثتُ عنك كثيرًا في وجه كل فتاة عرفتها، لكنني سُرعان ما انتبهتُ إلى أن الجواهر لا تظهر بتلك السهولة، فلمَّا اعتزلتُ كل الإناث تَعَفُّفًا؛ رأيتُك هناك بل قُدِّر لي أن آتي إليك وتختلط كرات دمي بدمك...»

اقشعرَّ جسدها حياءً، ونظرت إليه دون أن تنطق، ثم أعادت النظر إلى المفكرة، فوجدت أن تاريخها قديمًا بعض الشيء، تاريخ ذلك اليوم الذي تبرع لها فيه بالدم تقريبًا!

- دي أنا المقصودة؟!

- أيوا أنتِ.. التفتت إلى الجانب الآخر وصمتت لثوانٍ، وهي تتذكر ذاك اليوم، ثم أدارت وجهها نحوه من جديد قائلة:



- أقول لك سر؟!

- قولي.

- في اليوم ده ومن بعد ما أنت مشيت حسيت إن في ميل قلبي تجاهك! لكن طبعًا منعت نفسي عن التفكير في الأمر ده؛ علشان حسيت إنه حرام، وإن ده مش وقته وفي حاجة أهم من الأمور دي لحد ما ربنا يأذن.

- واضح إن دمي مفعوله سريع.. ابتسمت وأردفت:

- وكان ظهورك في فرح «محمود» وكلام ماما - رحمها الله - عن والدتك، ويوم ما جيت تاخد مامتك يوم ما زارتنا أسباب لاسترجاع الميل ده، بس وقتها خلاص ما كانش ينفع إنه يكون في ميل أصلاً!.. تعجب من جملتها الأخيرة، وسألها مستفهماً:

- ليه ما كانش ينفع؟!.. تذكّرت حكاية «هايدي» عنه، وخوفها السابق على مشاعر صديقتها؛ فتظاهرت أمامه بالحياء من الموقف: ما كانش ينفع وخلاص، وبعدين أهو ربنا كتب لنا إننا نبقى لبعض، وأدينا أهو متجوزين...

رنّ هاتفها وقطع شريط الذكريات في خيالها، قامت من جلستها ببطء وهي تسند بطنها، ودخلت إلى الغرفة لتُحضره؛ ابتسم ثغرها وفرح قلبها عندما رأت اسم «هايدي» على الهاتف: «دايمًا تيجي على السيرة يا هدهد»

جلست على كرسيّ بجانب السرير، وأعادت الاتصال بها بعدما انتهى قبيل دخولها غرفة النوم، تبادلنا السؤال والاطمئنان وظلتا تحكيان إلى أن تحولت كلمات رقية إلى آهات وآلام؛ تشعر وكأن ظهرها وبطنها سيُفصلان عن جسدها من شدة الألم المفاجئ!

- ما لك رقية؟!

- آآآآآآ.. الحقني يا هايدي.

- ما لك بس في إيه؟

- شكلي.. شكلي هولـد.

- طب أنا هجيلك حالاً ما تتحركيش.

وصلت هايدي مع رقية إلى المشفى، لكن الألم يهدأ من حين إلى آخر ثم يعود من جديد، انتظرتا قليلاً في بهو المشفى حتى سمحت لهم إحدى الممرضات بدخول غرفة لتستريح قبل دخول غرفة العمليات.

ساعدت هايدي صديقتها لتستلقي على السرير، وهي تتألم لآلامها، وتنظر إليها بقلب عطوف حزين، ولم تلبث أن جلست على الكرسي بجانب السرير ورفعت نقابها حتى دق الباب، كان خالد قد وصل؛ أسرع وأسدلت نقابها على وجهها من جديد بمجرد سماع صوته، واستأذنت

منهما لتخرج وتتركهما وحدهما فور دخوله وإلقاء التحية.

خرجت وتركتهما، وسرحت وهي تجلس على أحد المقاعد بجوار الغرفة، قد تغيرت حالها وباتت تُرثي نصيبها، زوجها طلقها رغماً عنه بعد رفضها زواجه ممن رشحت له والدته، فهو الابن الأكبر وتودُّ أمه أن ترى أحفادها، أضحت وحيدة بعد وفاة جدتها ولا يخفف عنها ذلك سوى تخصيص وقتها للعبادة ودراسة العلوم الشرعية ووجود رقية في حياتها، تُرى ستظل رقية هكذا أم سيشغلها مولودها عنها، تشعر وكأنها أمها حقاً، وتخاف أن تقل مكانتها في قلب صديقتها بعد ولادتها.. على أية حال فهي ترضى بما قُدِّرَ لها، لعلَّ الله يرزقها بخير لصبرها.

- اتفضلي ادخلي لها هي عاوزاك.

أخرجها صوت «خالد» من تفكيرها، لكنه لم يكن سعيداً بعد لقاء رقية، وذهب ليدفع مصروفات الولادة.. قد هدأت رقية قليلاً حين دخلت هايدي، لكن آثار الدموع على وجهها تُخبر عن أمر ما.

- ما لك يا رقية؟ استحملي يا حبيتي.

- بصي يا هُدى.

- هُدى كمان؟!.. ده كده في حاجة تاني غير وجع الولادة، ما لك بس؟ قلقيني!

- بصي يا حبيتي أنتِ عارفة إنك أكثر من أختي؛
 علشان كده أنا حاسّة ببيك جدًّا، وعارفة شعورك دلوقتي،
 لكن مهما كان ده تقدير ربنا وإن شاء الله ربنا يعوضك عن
 صبرك ده خيرًا، وهتعرفي ده قريب جدًّا وهتقولي رقية
 قالت.. بلّكت دمعتها نقابها، وأردفت بصوتٍ تُظهر نبراته
 تماسكًا مصطنعًا:

- الحمد لله على كل شيء يا حبيتي، وكفاية إن ربنا
 رزقني بأخت زيك، بس اوعي الواد ابنك اللي جاي ده
 يشغلك عني أنتِ فاهمة؟

- لا ما تخافيش يا قلبي هيبقى عنده أمّين.. ماما هايدي
 وماما رقية، أدخل ذلك السرور على قلب هايدي، وربت
 على كتف رقية، وهي تنصت إليها...

اتسعت عينا رقية قبل أن تنهي كلامها من شدة الألم
 الذي زاد هذه المرة عن المرات السابقة، يبدو أن وقت
 خروج مولودها لنور الحياة قد آن.

أسرعت هايدي لتُخبر الطيبة، وحمل المساعدات رقية
 على سرير متحرك إلى غرفة العمليات، وهي تضغط
 بأسنانها على قطعة قماش، وتمسك بيد أختها التي كاد
 يقف قلبها من القلق، وأدخلوها لإجراء العملية، بينما
 خالد يذهب ويعود مُتَحجِّجًا بقضاء إجراءات المشفى

ومتطلبات الأطباء؛ حتى لا ينتظر ويجمع بهدى في مكان واحد، وهي كذلك لا تطيل الحديث، وتجاوب إجابات محدودة عند سؤاله عن حال رقية.

بعد بضعة شهور من تجديدات الحبس، وبعد إثبات تقرير الطب الشرعي وموافقته مع اعترافات علاء في قتل أخته؛ حُدد موعد للمحاكمة، وقد أضحت عفاف كأرض بور من شدة الحزن والندم.

تجلس بقاعة المحاكمة بجوار زوجها الحزين الصامت الذي لا يستطيع أن يظهر تماسكه، ولا يتمكن من مواساة زوجته، فكلاهما مشتركان في الأزمة؛ كلٌّ منها ظنَّ أنَّ الرعاية - دون تربية مشتركة مؤسسة على قواعد - كافية لإخراج أبناء أسوياء!

تنتظر نطق الحكم على ابنها ويمتزج شعورها كونها أم بشعور الخصم في الوقت نفسه، المجني عليه جزء منها، والجاني أيضًا حُمِّلَ شهورًا في الرحم نفسه، وما بيدها سوى الاستسلام لما آلت إليه الأمور دون تدخُّل.

ويقف علاء داخل القفص ينتظر عقابًا يُكفِّر ذنبه المؤلم الذي لا يفارق ذهنه، عيناه تنظران إلى القضاة كأنها تتوسلان إليهم كي يُنجزوا في إصدار الحكم، وقلبه لا يبالي، لا يهمه

سوى التخلص من ذاك الضمير الذي استيقظ متأخراً، انتبه فجأةً إلى يد رجل استغلت انشغال الجميع وانتباههم إلى ما يقوله القضاة تُنكره؛ أخذ الورقة التي أعطاه إياها ذلك الرجل وأخفاها في ملابسه كما أشار له.

ترتمق أعين القضاة الحاضرين، وقلوبهم مشتتة بين لوائح القوانين التي توجههم إلى الحكم، وبين روح الأبوة التي تُحتم عليهم أن يرحموا قلب أمٍّ أهلكتها الأحزان، كان لا بد من النطق بعد ذلك الصراع الشعوري، مأل أحد المستشارين والقاضي إلى الإعدام كي يكون عبرةً لكل أولئك الذين تسول لهم أنفسهم أن يفكروا في مثل ذلك، خاصة بعد أن تداولت الصحف والقنوات هذه الجريمة طيلة تلك الفترة، أما المستشار الآخر فاعترض على الحكم بالإعدام؛ فخفف الحكم قليلاً.

عاد انتباه علاء إليهم من جديد على صدمة الحكم!

﴿يَا أَيُّهَا الَّذِينَ آمَنُوا كُتِبَ عَلَيْكُمُ الْقِصَاصُ فِي الْقَتْلِ الْحُرُّ بِالْحُرِّ وَالْعَبْدُ بِالْعَبْدِ وَالْأُنْثَىٰ بِالْأُنْثَىٰ فَمَنْ عُفِيَ لَهُ مِنْ أَخِيهِ شَيْءٌ فَاتَّبِعْهُ بِالْمَعْرُوفِ وَأَدِّ إِلَيْهِ بِإِحْسَانٍ ذَلِكَ تَخْفِيفٌ مِنْ رَبِّكُمْ وَرَحْمَةٌ فَمَنِ اعْتَدَىٰ بَعْدَ ذَلِكَ فَلَهُ عَذَابٌ أَلِيمٌ﴾ ^(١٠).. بعد الاطلاع على أوراق القضية، وتطابق تقرير

الطب الشرعي مع اعترافات المتهم؛ حكمت المحكمة
حضورياً على المتهم «علاء عماد السيد» بالسجن المؤبد مع
الشغل والنفاذ»

- مؤيد؟!.. كيف سيتحمل عذاب ندمه خمسة وعشرين
عاماً؟ يريد أن تنتهي حياته كي ينتهي توبيخ ضميره..
حُشر في سيارة الترحيلات إلى السجن بعدما ودعه أبواه،
ولا زال قلبه فاطر المشاعر.

دخل الليل ولما تنته العملية بعد، والقلق يطرق قلب
«خالد» أمام غرفة العمليات، وظلّ يسير ذهاباً وإياباً
بعدما ذهبت هايدي، يهيمهم بالدعاء، والكلمات التي
قالتها قبيل دخولها تدق عقله، لا يعلم ما في الوصية التي
أمرته بقراءتها، لماذا قالت هذا اليوم بالأخص؟! يفكر في
ذلك ويزداد خوفاً وقلقاً، جلس على أحد المقاعد في لحظة
دخول والديه وأخته خديجة، الذين تأخروا بسبب توديعهم
«أحمد» المسافر إلى «ماليزيا» لِيُدْرَس اللغة العربية هناك.

- ألف مبروك يا فندم.. تتربى في عزك!

قطعت مساعدة الطيبة حديثهم وهي تحمل المولودة
التي تكاد لا ترى من صغر حجمها، ويدو على ملامحها
الحزن، حتى أنها لم تقف وأسرعت بالمولودة إلى «الحضانة»..

أسرع خالد ليطمئن على زوجته، لكن لم يُسمح له بالدخول، وأخبروه أنها لم تفق من المخدر بعد، لكنّ تعبيرات وجوههم ونبراتهم تُخفي أمراً ما؛ أثار ذلك غضبه وثار في وجه الطبيبة التي أمامه:

- فيه إيه أنا عاوز أشوف مراقي، أنتوا مخبيين علينا إيه بالظبط؟!

- اهديا فندم ما فيش حاجة، المدام لسه ما فاقتش من «البنج»، وما ينفعش حضرتك تدخل دلوقتي!

عاد وجلس من جديد بجوار والده بعدما نجحوا في إخماد ثورة غضبه وأعادوه، لكنهم جميعاً تعجبوا من حركة الممرضات ونظراتهنّ، وكثرة الدخول والخروج من الغرفة التي لا يوجد فيها شخص غير رقية؛ فاستوقفت مريمُ إحداهنّ بعيداً عنهم لتستفهم منها:

- يا بنتي الله يكرمكم.. فهميني فيه إيه؟ داخلين طالعين، وشكلكم مخبيين حاجة، قولي في إيه الله يستر عرضك.

- بصي يا حاجة، هوبس جرعة «البنج» زيادة شوية، وهتأخر لماً تفوق. - لأ، في حاجة تاني يا بنتي كلامك ده مش داخل دماغني، ده ابني قال أديلها يبجي ثلاث ساعات في العمليات، مش معقول كل ده ولسه ما فاقتش.

- ما أعرفش يا حاجة بقى أنا ماليش دعوة، عندكم
الدكتورة روحوا اسألوها أنا ما أعرفش بقى!.. كانت
تتمتم وجسدها يرتجف وهي تتكلم.

وصلت سيارة الترحيلات إلى السجن قرب منتصف
الليل لُبعد المسافة بين المحكمة والسجن، وكل واحد
من كانوا داخل السيارة مربوط بآخر من خلال حلقات
«الكلايش»، نزلوا واصطفّوا في طابور، دخل علاء من
بوابة السجن بخطوات مرتجفة، لم يعتقد أن الأمر سيصل
إلى هذه المرحلة، سجن وسنوات ستمر كالقرون، يبدو أنه
اتخذ القرار الخطأ عندما سلم نفسه.

حرره الشرطي من مقابضه، وأدخله الغرفة التي
سُيُحجز بها بعد الحكم، وأغلق بابها بإحكام ثم انطلق،
لم يرد علاء على تساؤلات المساجين عما جرى، وتركهم
ودخل دورة المياه التي بداخل الغرفة، ليبدل ملابسه التي
ابتلّت عرقاً داخل سيارة الترحيلات المكتظة بالمجرمين؛
وقع على الأرض مستنداً على الباب من تعب الطريق
الشديد، وسحب الورقة من جيبه، كانت رسالة زادت من
ألم ضميره...

«قلبي معاك يا ابني والله، أنا مقدر حالتك دلوقتي، ومتخيل شكلك وأنت مكسور ومتحطم، والدنيا كلها بتتفرج عليك، قلنا لك لو كررت عملتك دي تاني هيبقى فيها موتك، ما كملتش أسبوع ونشرت الصور وفبركت فيديوهات كمان، بصراحة لو كُنَّا خلصنا عليك وقتها ما كانتش نارنا هتهدى، وكُنَّا مش عارفين إزاي ندوقك من نفس الكاس، لحد ما عرفنا إن عندك أخت، وبصراحة «مارفيللا» الصديقة الوفية ساعدتنا بشكل كبير لو فضلنا نخطط له سنين ما كُنَّا ش هنقدر ننفذه، وسهلت لأمين الطريق، والسمة أكلت الطعم بسرعة.

ما كانش نفسنا الأمور توصل للدرجة دي، إحنا ناس طول عمرنا ما أذينا حد، لكن سمعة بناتنا أغلى من كنوز الدنيا.. أخيراً نارنا بردت، وخذنا تار كل بنت ذليتها وكسرت نفسها؛ اشرب بقى عشان تحس بشعور كل بنت نفسيتها ادمرت بسببك، كفاية فضيحتك قدام الناس كلها كده، ورميتك بين أربع حيطان مذلول ٢٥ سنة...».

زادت هذه الكلمات من سوء حالته النفسية، وشعر بألم كل فتاة كان سبباً في كسرهما، ظل يتأفف والدم يغلي داخله، تسارعت أنفاسه وعينه تتلفت في المكان كأنها تبحث عن شيء ما، نهض من مكانه وأمسك بأداة تشبه شفرة حلاقة الشعر يستخدمها المساجين للحلاقة؛ لأنَّ السجن يمنع

دخول الأدوات الحادة، وقبض يده بقوة حتى برزت عروق ذراعه وقطع شرايينه، وسقط ودماؤه تسيل وروحه تصعد مع قطراتها.

وصل محمود أخيراً إلى المشفى بعدما ذهب خالد إلى الحضّانة ليرى ابنته ويستفسر عن المدة التي ستقضيها هناك.. خرجت الطبيبة من غرفة العمليات عابسة الوجه تتأفف؛ هرول الجميع إليها وأحاطوا بها متلهفين من أجل الاطمئنان على رقية، نظرت إليهم وهي تشعر بخيبة أمل

- فين زوج المريضة؟

- حضرتك أنا أخوها تحت أمرك.

- أهلاً وسهلاً.

- للأسف حصل نزيف أثناء الولادة، وحاولنا على قدر استطاعتنا لكن قضاء الله كان أقوى!.. اتسعت أعينهم جميعاً فرغاً، وفي صوت واحد:

- يعني إيه؟!

- البقاء لله!

عاد خالد بعد الانتهاء مما ذهب إليه، تكبّلت خطواته وهو ينظر إلى أولئك المدعورين بعين كئيبة، تتسارع دقات

قلبه وترتجف أنامله، وشفتاه عجزتا عن الحديث، جميعهم يكون ولم يره أحد وهو على حاله تلك سوى خديجة؛ هرولت إليه وعانقته ويرتجف لسانها «البقاء لله» لم تحمله قدماه فسقط على الأرض وازدادت آهاته.

- آآآآآ.. إنا لله وإنا إليه راجعون، إنا لله وإنا إليه راجعون، كأنها كانت حاسة؛ عشان كده كانت بتوصيني، الله ما أخذ.

ظلّ يجفف دموعه ويستودع الله أمانته بالدعاء، ودخل الغرفة ليودّع مليكة قلبه ذات الوجه المبتسم المنير، وطالت نظرته إلى وجهها كأن عينه تودّ ألا ترى بعده أبداً، يشعر أن روحه أضحت خاوية بعد فراقها.

كانت ليلة كئيبة على الجميع، ذهبت رقية ذات الروح الطيبة التي تسري في قلوبهم جميعاً، ولكن هذه أقدار ولا يستطيعون أن يغيروها.. أنهموا الإجراءات اللازمة، ونقلوا جثتها إلى مدافن عائلة زوجها بالشرقية، وكانت جنازتها ذات جموع ضخمة لا يعلمون كيف تجمعت، وتسير بسرعة كأنها تتلطف إلى لقاء ربها.

رجع خالد بعد بضعة أيام إلى شقيقته، يحمل صغيرته على يده، وتدور عيناه في كل ركن في المكان، كل شبر يحمل ذكرى لها، هنا كانت تجلس، وهناك كانت تترتل آيات

القرآن، كانت تعتز بهذه الهدية، وتضع ذاك الوشاح على رأسها وهي تصلي...

ناول «رقية» الصغيرة إلى أمِّه، وتركها متجهًا إلى غرفة النوم، وجدها مرتبة كما كانت تحب أن تراها، تضع كتبه على يمين مكتبه، الأهم منهم فوق المهم، وبجوارها الأوراق البيضاء مرصوفة وفوقها علبة الأقلام.. تذكر وصيتها وضرورة قراءتها فور عودته كما قالت؛ فتح حقيبتها وبحث حتى وجد تلك الورقة المعطرة، فتحها وشرع في القراءة، سالت عيناه بالدموع لما يرى...



الحياة مواقف، ولكل موقف بداية ونهاية، فأما البدايات
فربما تُجبر عليها، وأما النهايات فباختيارك.

أحمد العرابي



اقتربت من أبيها وعلى وجنتيه الدموع تسيل، ربت على كتفه وجففت دموعه، وهي تستشعر معنى صدق الحب والوفاء لزوجته؛ احتضنها بين ذراعيه، ولا تزال عبراته تتدفق من عينيه.. دخلت زوجة أبيها وهما على هذه الحال؛ اقشعرَّ جسدها لما تری، واقتربت منها ويرتجف قلبها:

- ما لكم بتعطوا إليه؟! انتبه لحضورها المفاجئ ذاك، وابتسم ابتسامة عريضة، وقهقه ضاحكاً وهو يجفف عبراته، وأجابها:

- كُنَّا جايين في سيرتك يا ستي! انتفضت وحدقت فيها متعجبةً، وأردفت بصوت مرتجف:

- هو أنا هيحصل حاجة ومخبين عليّ؟!

علت ضحكاتهما دون إجابة، وقد زاد قلقها وكادت تبكي وهي ترمقه وهو يضحك ويتسلل إلى مكتبه، وفتح أحد أدراجة، وأخرج منه دفترًا وسحب منه ورقة.. نظر إليهما وقد شحب وجهه من جديد، وناول الورقة لرقية وهو يرتجف:

- افتحي الورقة واقري اللي فيها وأنتِ هتفهمي!.. توقفت الألسنة عن الحديث، ونابت عنها الأوجه التي عمَّها الريب، والأذان تنتظر في إصغاءٍ لما سيقرأ...

«حيبي خُوَيْلد..»

قد جمعني الله بك بعد صبرٍ ومخالفة للهوى، وها أنا
الآن أحصد ثمار ذلك بزواج صالح لا أمرٍ يَهْمُه سوى أن
يجمعنا الله في الجنة كما جمعنا في الدنيا، أعلم زوجي الحبيب
أن أكثر ما يؤلم أي امرأة مهما تكن مؤمنة ومطبقة لأمر
دينها وراضية بقضاء الله أن تشاركها أخرى في قلب زوجها،
ولكن إن كانت تلك الأخرى أقرب إليها من نفسها؛ فربما
يختلف الأمر قليلاً؛ لذلك يا عزيزي أوصيك بالتالي:

أوصيك إن قُدِّر لي أن أفارق الدنيا قبلك أن تُخلفني
بزوجة أصلح مني وأتقى، تشاركني فيك في الجنة لا
الدنيا؛ لأنني حقاً لن أتحمل أن تشاركني فيك أخرى، لذلك
اخترت أنا من تصاحبني في الجنة وتقاسمني مملكتك هناك.

اخترت لك أختي الأمانة الوفية هدى (هايدي).. لا
أرى غيرها أنسب لك بعدي، ولا أحرص على تربية أبنائي
- إن كتب الله لي أن أنجب منك - فلا تخالف وصيتي...

روكا

هرولت رقية الصغيرة وارتمت بين ذراعي هايدي،
وقبّلت يديها ورأسها، وكلتاها جهشت أعينها وذرفت،
تنظر إليها نظرة فخرٍ وبهاء...

- ربنا يبارك فيك يا أوفي صديقة وأحن أم.. بجد مش عارفة أشكرك إزاي، عمري ما حسيت لحظة إنك زوجة أب، وأكيد عشان قلبك الصافي وصبرك على ابتلائك ده؛ ربنا سبب لك الأسباب ونولك اللي في بالك.

- بيقولوا فاقد الشيء لا يعطيه، لكن فاقد الحنان هو أكثر واحد بيعرف إزاي يعطيه، ورقية رغم الفترة القليلة دي علمتني الحب والنقاء؛ فمهما عملت مش هقدر أوفي جميلها، كفاية إنها أثرت فيّ بأخلاقها قبل كلامها.

تمّت

الجمعة/ ٢٩ ذو القعدة ١٤٣٩

١٠ أغسطس ٢٠١٨

محمد الباسم



خاتمة

حاولتُ تقديمَ نموذجٍ واقعيٍّ قدر استطاعتي، وبكل صدق لم أكن بطلاً أو مُبدعاً في ذلك؛ فما هي إلا شخصيات حقيقية تُحيط بي، وتأثر بهم وأُؤثر أحياناً، وانحصر دوري في تجسيد الأحداث وإبداء الرأي، وتقديم ما أعتقد أنه الصواب من باب النصيحة لا أكثر، متبعاً في ذلك الاختصار؛ حفاظاً على أوقاتكم.

وأرجو من الله أن تصل رسالتي واضحة، فإن وُفِّقْتُ في توصيل الفكرة فهذا من ربي فضلٌ ومنّة، وإن قصرت فهذا من نفسي الناقصة، وأسأله الإخلاص.

ويُسعدني تلقي آراء حضراتكم عبر حقول التواصل هذه:

  **Albassem 1414**

 **01026037088**

#روكا #اتقل_هتفهم



شكر واجب

إلى هؤلاء... فمن دونهم ما استطعتُ إتمامَ هذه الرواية،
ولكل منهم دورٌ كبير، وخاصةً مَنْ زودوني بالمعلومات
الطبيّة، والقانونية، والفنية...

فلكم مني شكرٌ مُعطرٌ بأريج المسك والعنبر

أحمد الديب

دار العلوم - القاهرة

أحمد العربي

دار العلوم - القاهرة

إيهاب زكيّ

حقوق - القاهرة

عبد الرحمن إسماعيل

طب الأزهر - القاهرة

سلوى حمزاوي

قناة Adsoo Ink



التواصل مع داركتاب

Email: darkitabone@gmail.com

fasbook: darkitabone

البيدج داركتاب

٠١٠٩٧٥٥٣٣٢٨